

# NOTAGANAGAXI ANE IDÍ JOÃO

João judeu. Libakedi me nomiigomi ijaa nioxoa anodita Tiago. Negeniditediogi Jesus modiotibece, odaa jogoika me nomiigomigipi, odaa jogodiotibece. Jesus iolatedicoace nigijo negeniditediogi dooze goneleegiwadi anodiotibece. João jigijaa nigica Jesus ane dagaxa me yemaa, catedi nigijoeledi anodiotibece. Liwigotigi nigijo dooze anodiotibece, ijokijo João baadogoyeloadi mijo minaagina ane diotibece Jesus. Alaticoci nigotaga Éfeso, odaa jigidiaa lemagadi dagaxa moxiigodi. João ijoa eletidi ane idí itiwatadigidi liwakateditigi loiigi Cristo codaa jegepaa idí lotaganagaxi Apocalipse. (Awiniteloco miditaga Mateus 4.21; Marcos 1.19; Lucas 5.10; João 13.23; 19.26; 21.7,20,24).

João idí nagadi notaganagaxi eotibige nigina oko moyakadi moyiwagadi Jesus me Lionigi Aneotedogoji, Nigijoa ane niige Aneotedogoji me Gonewikatitogodi. João iciaceketege Jesus lotaga Aneotedogoji, nigijo Aneotedogoji maleekoka diigenatakate mowote inoatawece niginoa analeeginoa natigide. João yalagata Aneotedogoji Godiodi me yexogotetege Jesus ane Lionigi. Codaa João eliodi me yalagata nigica Liwigo Aneotedogoji. Ijoawaanigi godoxicegetedi ane yalagatalo João, Jesus loenataka anoikee ane leegodi me icogotedibigimece ditibigimedi odaa jegenagi digoina iigo. João aagaga yalagata nigica ane liigaxinaganenegegi Jesus nigina meote anigida godoxicegedi, codaa yalagata Jesus me ikee me nigijaa Gonewikatitogodi, codaa Jesus me diniciaceketetege nigica paon aneo mewi me yewiga oko, codaa me nilokokena nigina iigo. João aagaga yalagata Jesus me nigijaa iwi anigoteta codaa me ilokatidi inatawece oko ane dogonakatoteda nigicota owidijegi noko. Eledi yalagatalo lawikodico Jesus, lemegegi, codaa anodaagee naga yewigatace.

---

## Jesus oyatedigi me Lotaga Aneotedogoji

**1** <sup>1</sup>Nigijoa anoyatedigi me Notaga akaaginiwa anigicatibige daga iigo inoatawece niginoa ane jinataga. Odaa iniwa Nigijoa anoditalo me Notaga miniwataga Aneotedogoji, codaa iniaaginiwa Aneotedogoji. <sup>2</sup>Akaaginiwa miniwataga Aneotedogoji maleedigicoateda inoatawece niginoa ane jinataga. <sup>3</sup>Aneotedogoji iige meote inoatawece niginoa ane jinataga. Agica idi ane daga loenatagiteda. <sup>4</sup>Okanicodaagica ane yewiga, yewiga leegodi Iniaaginiwa. Nigina meote lewiga oko, liciagi nagana lokokena ane ikeeta oko anewi. <sup>5</sup>Nagani lokokena idi miditaga nexocaga. Codaa nexocaga ayakadi daga ipeedi.

<sup>6</sup>Nigijjo eledi João anodita João Batista. Nigijjo goneleegiwa liigexegi Aneotedogoji. <sup>7</sup>Aneotedogoji iige João me yalagata anodaagee nagaca lokokena, eotibige minatawece oko oyakadi moyiwagadi nagaca lokokena, leegodi lotaga João. <sup>8</sup>Pida João anigijaa lokokena, pida enagi me yalagata nagaca lokokena. <sup>9</sup>Nigijjoa anepewewi me lokokena, ane nalotedeloco inatawece oko, jegenagi digoina iigo.

<sup>10</sup>Odaa jiginaagitedice digoina iigo. Codaa jejepaa eote nigina iigo, pida nigina okotigi digoina iigo agoyowoogodi. <sup>11</sup>Enagi miditaga nigidi epaa nipodigi, pida nigidi loiigi agodibatege. <sup>12</sup>Pida ijotawece nigijjo anodibatege Nigijjoa ane lokokena, anonakato, Aneotedogoji бага yajigote nagatetigi me lionigipi. <sup>13</sup>Aleegodi ane licogegi eliododipi, codaa aleegodi eliododipi moyemaa lionigipi, eleditace aleegodi lowooko goneleegiwadi, pida ida aneetetege leegodi miniaaginiwa Aneotedogoji eote me gela lewiga.

<sup>14</sup>Nigijjoa anewi me Notaga dinanatedigi me goneleegiwa, odaa ja inaagite mokotaga. Idioka limedi meletedogodomi, codaa me nikeetedogowa inoatawece anewi niginoa ane ikee anodaageeteda Aneotedogoji. Jinataga mida loniciwaga, leegodi mokiniwatece me Lionigi nigijjoa Eliodi ane ideite ditibigimedi.

<sup>15</sup>João Batista ijo me yalagatalo, mee, “Joaniginiaaginiwa anejitece nigijjo meji, ‘Odaa nigidiaagidi nige leecawaanigi me jano, enagi ane dagaxa me gonegegi, aiciagi, leegodi akaaginiwa jotigide maleedaga janitini’”.

<sup>16</sup>Idioka limedi mokotawece jibagatege ane icogotibigimece miniwataga ane dagaxa mele, leegodi dagaxa meletedogodomi. <sup>17</sup>Moisés najigotedogowa liigenatakanegeco Aneotedogoji, pida Jesus Cristo бага nikeetedogowa me godemaa Aneotedogoji, codaa eleditace nikeetedogowa anewi nigica anodaageeteda Aneotedogoji. <sup>18</sup>Agica ini oko baanaga nadi Aneotedogoji. Pida oniniwatece Lionigi anidioka limedi me ipegitetege Eliodi, baaniginiaa nikeetedogowa anodaageeteda Aneotedogoji.

### Latematigo João Batista

<sup>19</sup>Joanigidaagee João eetece anodaageeteda Jesus, nigica naga oniige icoa lacilodi judeutedi midataga João nigijjoa sacerdotitidi ijaagijjoa leviitatedi. Niigexedi oicogoticogi manitaga nigotaga Jerusalém. Nigijjo nogotota João, odaa jogoige modita, “Amakaami ida makaami?” <sup>20</sup>João igenaga me dinelogodi, adiwitaka, negeetiogi, “Anegemegee Cristo, Nigijjoa ane niige Aneotedogoji me godewikatidi”. <sup>21</sup>Odaa jogoigetace, modita, “Enice, amakaami? Akaami Elias?” Naga ninigodi meetiogi, “Anegemegee”. Nogoigetace, modita, “Anagakamagakaami ica ane yelogoditedibece lowooko Aneotedogoji, ane yalagata Moisés?” Odaa ja ninigodi meetiogi, “Anegemegee”. <sup>22</sup>Odaa jogoigetace, modita, “Enice igrage eni makaami? Jopoogotibige me jowoogotaga anakaami me ininigotaga nigijjo anetigodiige”.

<sup>23</sup>Igaanaga ninigoditigi João, eetece nigijjoa lotaga Isaías, nigijjo liotagi Aneotedogoji ane yelogoditedibece lowooko Aneotedogoji. Odaa jegee,

“Ee nigina ane datematika midi nipodigi ane yadilo,  
ane digica nigeladimigipi, anee,

‘Nigina bogoenitiwaji naigi ane igotetece Goniotagodi’”.

<sup>24</sup>Nigidi ane igotibeci liigexedi fariseutedi jogoige João, <sup>25</sup>Modita,  
“Meni dagakaami Cristo, nigicoa liigexegi Aneotedogoji me godewikatidi,  
codaa otegexaagaga akaami Elias, otegexaagaga akaami nigijo ane  
yelogoditedibece lowooko Aneotedogoji, ane yalagata Moisés. Enice,  
igaamee manilegenitiniwace oko?” <sup>26</sup>Naga igidi João, meetiogi, “Ee бага  
jillegenagata ninyogodi. Pida digoina gadiwigotigitiwaji ini goneleegiwa  
ane digica mowoogotitiwaji. <sup>27</sup>Nige leecawaanigi me jano, odaa  
jagagenagi ane dagaxa me gonegegi, aiciagi, otegexaagaga jakadi daga  
ee liotagi me jowilece leejetedi liwelatedi”. <sup>28</sup>Nigica noko monigetice  
João idei digoida manitaga aca nigotakawaana ane liboonagadi Betânia,  
ane ideitice daato akiidi Jordão, aneite João me nilegetiniwace oko.

### Waxacoco ane niwakatee Aneotedogoji

<sup>29</sup>Negeledi noko João ja naditege Jesus migo midataga. Odaa  
João jegee, “Digawinitege! Niginoa joaniginaagina Waxacoco ane  
niwakateetedi Aneotedogoji, ane noga libeyacegeco inatawece oko  
digoina iigo. <sup>30</sup>Jigijo me idalagatalo, nigijo meji, ‘Nige leecawaanigi me  
jano, odaa jagagenagi goneleegiwa ane dagaxa me gonegegi, aiciagi,  
leegodi akaaginiwa maleedigicatibige me janitini’. <sup>31</sup>Emegeeta agepece  
jowoogodi aniniwa. Pida janagi inilegetiniwace oko jatitioigi ninyogodi,  
jaotibige loigi Israel moyakadi moyowoogodi anijoa”.

<sup>32-33</sup>João egidaa diitigi me yalagatalo Cristo, mee, “Ee ajowoogodi nigica  
anijoa. Pida Aneotedogoji, ane idiige me jinilegetiniwace oko, jatita ninyogodi,  
nelogotediwa, meetediwa, ‘Icota manati Liwigo Aneotedogoji me dinikateloco  
lacilo goneleegiwa. Odaa nigidoa goneleegiwa jigidaagidoa ane ixotediwece  
oko Aneotedogoji Liwigo me yajigota loniciwaga’. Ee jinadi Liwigo Aneotedogoji  
me dinikatelogo Jesus icogotibigimece ditibigimedi macataga yotibi. <sup>34</sup>Ewi me  
jinadi nigida niciagi, odaa ewi nigijaagijoa Lionigi Aneotedogoji”.

### Odoejedi anodiotibece Jesus

<sup>35</sup>Negeledi noko, idiaagitace João icaagicoa itoataale anodiotibeci. <sup>36</sup>Nigica  
naga naditece Jesus me ixomagatedijo, odaa jegeetiogi João, “Digawinitiwaji.  
Nigijoa digoida, nigijoa Waxacoco ane niige Aneotedogoji”. <sup>37</sup>Nogowajipata  
nigijo itoataale anodiotibeci, odaa jogoigalatece Jesus. <sup>38</sup>Naga nilokotetege Jesus,  
odaa ja naditetege moigalatece. Odaa ja nigetediniwace, meetediogi, “Amiina  
ica anoleetibigetiwaji?” Odaa jogoigidi moditalo, “Rabi, igatione ica gadigeladi?”  
 (“Rabi” nigina anejinaga “Goniigaxinogodi”). <sup>39</sup>Jesus meetediogi, “Anagitiwaji,  
awini ane yotokagadi”. Odaa jigigotibeci, jognadi ane lotokagadi Jesus. Odaa  
jigidiaagi miniwataga nigijo noko. Naga doletibige me deez lakata me nigoitijo.

*(João 1.36)*

<sup>40</sup>Onijoteci nigijoa itoataale ane wajipatalo lotaga João, ane igaalatece Jesus, liboonagadi André, nioxoa Simão Pedro. <sup>41</sup>Agica ane yopagadi André jigigo doletibige Simão nigijo nioxoa. Naga yakadi, oada jegeeta, “Ja jakataga Nigijoa ane niige Aneotedogoji me godewikatidi, ane liboonagadi Cristo.” <sup>42</sup>Odaa André ja yadeegi Simão miniwataga Jesus. Naga iwiteta Jesus, meete, “Nigida makaami akaami Simão, akaami lionigi João. Odaa natigide ja gaboonagadi Cefas”. (“Cefas” idaagida me “Pedro”, nigina anejinagata “wetiga”).

#### **Jesus eniditeta Filipe ijaa Natanael modiotibece**

<sup>43</sup>Negeledi noko, Jesus ja lowoogo migo eledi nipodigi ane liboonagadi Galiléia. Odaa ja dakapetetege Filipe, oada jegeete, “Anagi, aniwitibici!” <sup>44</sup>Filipe elatibige nigotaga Betsaida, ane ligeladi André ijaa Pedro. <sup>45</sup>Filipe ja doletibige Natanael, iganaga yakadi, oada meeta,

“Jakataga iniwa goneleegiwa ane liboonagadi Jesus, nigijoa lionigi José, nigelademigitigi nigotaga Nazaré. Moisés akaa idi nigica anodaageeteda maditaga lotaganagaxi liigenatakanegeco Aneotedogoji, codaa me nigijo anoyelogoditedibece lowooko Aneotedogoji oidi anodaageeteda miniwa.”

<sup>46</sup>Odaa mee Natanael, “Anigica jinadi oko anele anelatibige nigotaga Nazaré”. Odaa Filipe ja ninigodi, meeta, “Anagi, awini”.

<sup>47</sup>Naga naditetege Jesus Natanael menagi miniwataga, odaa mee, “Digawiniticogitiwaji digoida. Nigina goneleegiwa yelogo melatibige Israel, codaa nigina goneleegiwa ainaale eledi oko”. <sup>48</sup>Natanael ja ige Jesus, meetalo, “Amiica ica madowoogoti?” Jesus naga igidi, meeteta, “Anigicatibige Filipe degeniditagawa, jinaditagawa midiaagoni anicooti libatadi nagada niale ‘fiigoigo’”. <sup>49</sup>Natanael meetalo Jesus, “Iniotagodi, nigida makaami, akaami Lionigi Aneotedogoji, jagakamagakaami ninionigi-eliodi godoiigi Israel”. <sup>50</sup>Odaa Jesus meeteta, “Mige adadiwagati leegodi mejitagawa me jinaditagawa libatadi nagajo niale? Pida nigida makaami icota manati eletidi yoenataka ane dagaxa me libinienaga yayoketice nigida ananati”. <sup>51</sup>Eledi meeteta Jesus, “Ewi mejitagawatiwaji, icota manati me domoke ditibigimedi, odaa anatiwaji niaanajotedi Aneotedogoji igotibeci ditibigimedi, naga dinikatiniwace meetaga ane Ee, Goneleegiwa ane jicogotibigimece ditibigimedi”.

### Jesus onode migo ica nadonegegi

**2** <sup>1</sup>Naga ixomagatedijo itoataale nokododi meniditediogi nigijo anodiotibece, jigijo ica nadonegegi manitaga nigotakawaana Caná, mido nipodigi Galiléia. Nagajo eliodo Jesus eledi idiaagi miditaga nigidi nalokegi. <sup>2</sup>Odaa Jesus ijaagijo anodiotibece eledi onodetiogi me igotibeci miditaga nadonegegi. <sup>3</sup>Igaanaga dinelio viinyo, odaa jigigo nagajo eliodo Jesus miniwataga, meetalo, “Age-eegica viinyo, ja ma”.

<sup>4</sup>Odaa meeteta Jesus, “Eiido. Aleeditibige madiigeni. Leegodi anigicota limedi me jikee ane Ee”. <sup>5</sup>Odaa nagajo eliodo Jesus jegeetiogi nigijoa niotaka, “Nigica ane i-igetedagawatiwaji, odaagawii”. <sup>6</sup>Onidiwa icoa seete bootitedi nelecoli, idoatawece oyatita wetiga lamogo moyoe. Onadatecibeci yalitedini onaniteci taalía liitilo ninyogodi. Nigidi noiigi oibake nigida ninyogodi nigidoo bootitedi me diniwilegi lodoe Aneotedogoji, mina epaa lakatigi. <sup>7</sup>Nigidiaagidi meetediogi Jesus nigijoa niotaka, “Anoleenagati ninyogodi nigidoo bootitedi”. Odaa jogonoleenagadi negepaa niolakatedi nigidiwa bootitedi. <sup>8</sup>Odaa ja iigetace Jesus, meetediogi, “Natigide okatecigica anogaa, adeegita ane dowediteloco nalokegi”. Odaa jogoyadeegita. <sup>9</sup>Odaa nigijo ninyogodi ja viinyo. Igaanaga ici nigijo ane dowediteloco nalokegi, ayowoogodi nigica ane icogotigi nigida viinyo. Pida ijokijoa nigijoa niotaka anonoga nigijo ninyogodi bogoyowoogodi ane icogotigi nigijo viinyo. Odaa nigijo ane dowediteloco nalokegi jegenidita nigijo ane wado. <sup>10</sup>Meeta, “Nigida moko godakatigi modoejegi me jacipagata nigina

viinyo ane dagaxa mele. Igaanaga eliodi me nacipaga nigina gododenigipi, odaa jagaga jajicaga nigina viinyo ane degewi ina mele. Pida akamagakaami ja moteteni nigida viinyo anele, odaa natigide ekajici.”

<sup>11</sup>Joanigidaa niciagi digoida nigotakawaana Caná, midi nipodigi Galiléia, negeote Jesus odoejegei godoxicegedi. Ikee nimawenegegi ane icogotigi miniwataga Aneotedogoji. Odaa nigijo anodiotibece jегeпаanaga oyiwigadi.

<sup>12</sup>Nigidiaagidi Jesus ja lixigagawa, nagajo eliodo, nioxoadipi, ijaagijo nigijo anodiotibece me dinikatiniwace manitaga nigotaga Cafarnaum. Odaa jigidiaagi onatecigijoa nokododi.

### Jesus igo Aneotedogoji ligeladi

*(Mateus 21.12-13; Marcos 11.15-17; Lucas 19.45-46)*

<sup>13</sup>Naga nipegi ica lalokegi judeutedi anodita Páscoa, odaa Jesus jogopitacedibigimece manitaga nigotaga Jerusalém. <sup>14</sup>Igo minitaga Aneotedogoji ligeladi. Joanigidiaagi nigicotediogi goneleegiwadi anoyaa godinadi, waxacocoli, yotipitedi. Eledi icotediogi ica ane nicotiniwace moiikoagetema ninyelo nigidi noiigi. <sup>15</sup>Odaa Jesus jегeote lalakenaganagadi waca-lolaadi, ja niticoitedice iditawece digoida we niogó Aneotedogoji ligeladi. Eletidi nixotedice nigijoa waxacocoli ijaagijoa godinadi. Odaa jagaga ilaagagaditedice nigijoa dinyelo, ninyelo nigijoa goneleegiwadi ane nicotiniwace moiikoage dinyelo. Yamagatedini ijoa nameejatedi. <sup>16</sup>Odaa meetediogi nigijoa nanaanogododi yotipitedi, “Adeegitedicogi nigidiwa yotipitedi digoida wetice. Jinaga domagaleegawiitetiwaji ganoojetekegi digoina catiwedi Eiodi ligeladi micataga daga oojetekaxi eloodo.” <sup>17</sup>Odaa nigijo anodiotibece jogonalagatibige nigijoa notaga maditaga lotaganagaxi Aneotedogoji, nigijoa notaga anee, “Dagaxa me jemaa gadigeladi, Inoenogodi. Nigida yemaanaganegegi ideloadi, micataga noledi daga yalegi catiwedi yaalegena.”

<sup>18</sup>Odaa icoa lacilodi judeutedi jогоige Jesus, moditalo, “Awii godoxicegedi me anikeenitogowa ganagatetigi mawii nigida gadoenatagi?”

<sup>19</sup>Naga igidi Jesus, meetediogi, “Niganikanititiwaji ligeladi Aneotedogoji, odaa inawacetacibige catiwedi itoatadigida nokododi”. <sup>20</sup>Odaa moditalo, “Nigini diimigi, ligeladi Aneotedogoji, yadeegi 46 nicaagape nogoigodi moyoe. Odaa nigida makaami agakati daganawacenitacibige catiwedi itoatadigida nokododi”. <sup>21</sup>Pida Jesus ageetetece nigini diimigi, Aneotedogoji ligeladi. Pida eeteta epaa lolaadi ane liciagi nigini Aneotedogoji ligeladi. (Leegodi Aneotedogoji Liwigo me digeladetigilo.) <sup>22</sup>Igaanaga yewigatace Jesus, odaa nigijo anodiotibece jogonalagatibige mijo me yalagate nigijoa notaga. Odaa jегeпаanagoyiwigadi Aneotedogoji lotaga, codaa moyiwigadi nigijoa notaga aneete Jesus.

### Jesus yowoogodi anee onitecibeci oko

<sup>23</sup>Nigijo me ideite Jesus digoida Jerusalém midi nalokegi anodita Páscoa, eliodi oko oyowoogodi me Niginiaaginiwa ane niige Aneotedogoji me godewikatidi, leegodi monadi godoxicegetedi aneote. <sup>24</sup>Pida Jesus anakatotediogi, leegodi me yowoogodi anodaagee nigidi noiigi. <sup>25</sup>Leegodi miniwa ayopotedibige eledi oko daga yelogoditalo anodaagee nigidi noiigi, Iniaaginiwa yowoogodi nigica ane lowoogo okanicodaagica oko.

### Jesus dinotaganegetege Nicodemus


**3** <sup>1</sup>Ica goneleegiwa liboonagadi Nicodemus, one fariseu, codaa me lacilo judeutedi. <sup>2</sup>Odaa ica enoale, jigigo dalitalo Jesus, odaa oneetalo, “Goniigaxinogodi. Jowoogotaga makaami niigaxinaganaga ane niige Aneotedogoji, igaataga agica ane yakadi meote niginoa godoxicegetedi libinienaga ane oeni, daaditigicoateda Aneotedogoji makaamitaga”.

<sup>3</sup>Naga igidi Jesus, meeteta, “Ejitagawa nigina anewi, anida ane jaoga. Agica ane yakadi me nadi ninioxigi Aneotedogoji nige daga gela menitacini.” <sup>4</sup>Odaa jegee Nicodemus, “Igame nimawenegegi ina goneleegiwa oxiiigodi me yakadi menitacini? Ayakadi mopitaciwece le eliodo oditaga jegenitacini.” <sup>5</sup>Naga ninigodi Jesus, meeteta, “Ejitagawa nigina gogegi gonegegi. Nigina oko idoka yakadi me dakatiwece ninioxadi Aneotedogoji nige dinilaatece nigicoa loenataka ane beyagi, codaa nigeo Liwigo Aneotedogoji me yewigatace liwigo. Odaa ini Aneotedogoji Liwigo minitaga, odaa micataga nigina oko daga gelatace menitini. Nige dinilege, ja ikee me dinilaatibece, codaa ja ika meote loenataka ane beyagi. <sup>6</sup>Nigina godolaadi dinoe leegodi godiododipi. Pida godiwigo aagaga dinoe leegodi Aneotedogoji Liwigo. <sup>7</sup>Enice jinaga domogopoo mejitagawa me leeditibige me gelatace maniitiniwace. <sup>8</sup>Micataga nigina niocodi. Igo ane yemaa me diiticogi, codaa akaami akati majipaata layaagegegi niocodi. Pida agowoogoti nigica ane icogoticogi, otegexaagaga nigica ane diiticogi. Joanigidaagee inatawece nigina oko Aneotedogoji Liwigo aneo me gelatace menitini liwigo”.

<sup>9</sup>Naga ige Nicodemus meetalo, “Igamodaageeta?” <sup>10</sup>Naga ninigodi Jesus, meeteta, “Nigida makaami akaami niigaxinaganaga gonegegitigi godoiigi Israel. Agowoogoti inoa anejitedagawa? <sup>11</sup>Ejitagawa nigina anewi. Ejinagatece nigina ane jowoogotaga. Codaa jatematiiga nigina ane jinataga. Pida akaamitiwaji agabaatege niginoa godotaga. <sup>12</sup>Codaa agiwagatitetiwaji niginoa yotaga nigina mejitece niginoa aninoatigi digoina iigo. Odaa amiida ica ganimawenegegitiwaji madadiwagati nigejitece aninoatigi digoida ditibigimedi? <sup>13</sup>Agica oko baanigica migo ditibigimedi. Emoka Ee, me Ee, Goneleegiwa midiaagejo digoida ditibigimedi, codaa jigidaa jicogotibigimece ditibigimedi.

<sup>14</sup>Analakitibige Moisés nigijo jotigide me nanyoketi nigijo lakeedi gapilecege noenatagi, nanyoketi ditibigimedi iwogo digoida nipodigi ane yadilo. Odaa joanigidaagee leeditibige Ee, Goneleegiwa ane jicogotibigimece ditibigimedi,





(João 3.1-4)

magaga etidayoketinece iwogo. <sup>15</sup> Amaleegaga inatawece nigina ane idadiwagadi, ida lewiga ane dagadiaagica liniogo miniwataga Aneotedogoji.

<sup>16</sup> Aneotedogoji eliodi me yemaa okotigi digoina iigo, joanigidaa leegodi me yajigo nigijoa oniniwatece me Lionigi lemaanigi, eotedibige minatawece nigina anoyiwagadi agalee nigo, pida jigida lewiga ane dagadiaagica liniogo miniwataga Aneotedogoji. <sup>17</sup> Aneotedogoji niige Lionigi me yewikatidi inatawece oko. Anige Lionigi me iwi, oditaga ilokatiditeda oko leegodi loenataka ane beyagi.

<sup>18</sup> Nigina oko aneyiwagadi Aneotedogoji Lionigi, Aneotedogoji agalee iwi codaa ailoikatidi nigini oko. Pida nigina oko ane degetiwagataka, бага iwi Aneotedogoji, codaa бага ilokatidi, leegodi ageyiwagadi Liboonagadi oniniwatece me Lionigi Aneotedogoji. <sup>19</sup> Nigijoa ane lokokena enagi minataga oko digoina iigo. Pida nigina oko dagaxa moyemaa nexocaga, agoyemaa lokokena, leegodi mowote niginoa ane beyagi. Odaa leegodi me dogoyemaa lokokena, Aneotedogoji iwi, codaa ilokatidi nigidi oko. <sup>20</sup> Nigina oko aneo ane beyagi, ayemaa lokokena. Codaa agenagi



manitaga lokokena, leegodi ayemaa digica ane nadi niginoa loenataka ane beyagi. <sup>21</sup>Pida nigina oko aneo nigina ane igenaga, joaniginiaagenagi manitaga lokokena eotibige me yelogotelogo loenataka, leegodi eo ane yemaa Aneotedogoji”.

### Jesus iniaa João Batista

<sup>22</sup>Nigidiaagidi Jesus ijaagijo anodiotibece jigigotibeci miditaga nipodigi Judéia. Odaa jigidiaagi onatecigijoa semaanatedi, Jesus ja iige nigijoa anodiotibece monilegetiniwace oko. <sup>23</sup>João бага idei digoida Enom, ipegitege Salim, leegodi digoida begeliodi ninyogodi. João aagaga nilegetiniwace oko anodiita. <sup>24</sup>Maleedigicatibige dogoniwilo.

<sup>25</sup>Ica eledi anodiotibeci João jogodinotigimadetege icoa goneleegiwadi judeutedi. Odinotigimadetigi lakatigi judeutedi me dinibinie lodoe Aneotedogoji. <sup>26</sup>Odaa nigijoa anodiotibeci João anodinotigimadetege judeutedi jigigotibeci midataga João, modita, “Goniigaxinogodi. Nigijoa ane ideite makaamitaga daato akiidi Jordão, nigijoa ane gadalakitalo, jigidaagidoda digoida nilegetediniwace oko, codaa eliodi oko anodiitalo”.

<sup>27</sup>Naga ninigodi João, meetiogi, “Nigina oko idoka yakadi ganigica nige Aneotedogoji yajigote. <sup>28</sup>Akamagakaamitiwaji owoogoti leegodi jigijoa mejitagawa, ‘Maleedegemegee Cristo, Nigijoa ane niige Aneotedogoji me godewikatidi. Pida ee бага idiige Aneotedogoji maleedigicatibige menagi Cristo me joetece naigi’. <sup>29</sup>Nigina ane wado, nagani awicije ane liomagata, ja nebi. Nigina lokaagedi nigina ane wado ninitibece nigina naga yowoogoditege lotaganegegi ane wado. Odaa ee idiniciaceeketege nigina lokaagedi nigina ane wado, eliodi me idinitibeci. <sup>30</sup>Igaataga leeditibige me leegitibigimece nagatetigi Cristo, odaa eemoda бага leeditibige me naxaceti iboonagadi”.

### Ica ane icogotibigimece ditibigimedi

<sup>31</sup>Nigijoa ane icogotedibigimece ditibigimedi dagaxa me gonegegi, agica ane nagaxatelogo. Pida nigina anelatibige iigo, ida aneetege iigo, codaa eetece aninoatinigi digoina iigo. Pida Nigijoa ane icogotedibigimece ditibigimedi бага dagaxa me gonegegi, agica liciagi, leegodi icogotedibigimece ditibigimedi, agelatedibige nigina iigo. <sup>32</sup>Niginiwa eetece niginoa ane nadi, codaa ane wajipate. Pida agewi ina mica ane dibatege lotaga. <sup>33</sup>Nigina oko ane dibatege lotaga ikee mewi niginoa Aneotedogoji lotaga. <sup>34</sup>Nigijoa ane niige Aneotedogoji, eetece Aneotedogoji lotaga, leegodi Aneotedogoji agica liniogo me yajigote Liwigo. <sup>35</sup>Aneotedogoji, ane Eniodi, yemaa Lionigi. Odaa yajigoteta nagatetigi me iige inoatawece. <sup>36</sup>Nigina aneyiwagadi Aneotedogoji Lionigi jigida lewiga ane dagadiaagica liniogo miniwataga Aneotedogoji. Pida nigina ane daga dibatege Aneotedogoji Lionigi agica lewiga miniwataga Aneotedogoji, codaa Aneotedogoji bigidioka limedi me yelatetema nigini oko, codaa iloikatidi.

### Jesus yotaganenege aca iwaalo samaritaana

**4** <sup>1</sup>Icoa fariseutedi ja nibodicaga Goniotagodi Jesus mepaga eliodi anodiotibece, codaa nilegetediniwace eliodi oko caticedi João. <sup>2</sup>(Pida anigijniaa Jesus nilegetediniwace oko, pida nigijo anodiotibece baanigijaa onilegetiniwace oko.) <sup>3</sup>Igaanaga yowoogodi Goniotagodi nigijoa fariseutedi naga nibodicaga, odaa ja noditedicogi nipodigi Judéia, odaa jogopitedicogi nipodigi Galiléia. <sup>4</sup>Odaa anigotetece leeditibige me yakagiditedeloco nipodigi Samaria.

<sup>5</sup>Odaa jigicotedicogi aca nigotaga anodita Sicar, ane idei nipodigi Samaria. Nagani nigotaga ipegitege nigijo nipodigi jotigide gonelokodi Jacó ane yediatece nigijo lionigi ane liboonagadi José. <sup>6</sup>Joanigidiaagi nagaca nalice ocagataga loenata Jacó. Odaa ejime seis lakata me gocidi nigicotedicogi Jesus manitaga nalice, odaa ja nicotedini liniogotibece nagani nalice, leegodi Jesus ja dinigaaxe me diniwaje.

<sup>7-8</sup>Odaa nigijo anodiotibece Jesus jigigotibeci manitaga nigotaga odinoojetetibige anoyeligo. Odaa aca iwaalo nigeladimatigi Samaria jigigo noga ninyogodi manitaga nalice. Odaa jegeeteta Jesus nagajo iwaalo, “Adedianita ganinyogodi, jacipoda”.

<sup>9</sup>Nagajo iwaalo naga ninigodi, meetalo, “Iniwa-aagodi. Ica mabo-oo gadaalegena manipokitiwa ininyogodi, igaataga a-aami judeu, begeyo iwaalo samaritaana?” Nagajo iwaalo meetalo Jesus nigida ligegi, leegodi nigidi noiigi judeutedi ailaagatege noiigi samaritaanotedi.

<sup>10</sup>Naga ninigodi Jesus meeteta, “Dogowoogotawaanigi nigica ane yajigo Aneotedogoji, codaa dogowoogoti ane Ee, ane jipokotagawa ninyogodi me jacipe. Dogowoogoti, daganagawini anipokitiwa odaa ja jajigotagawa ninyogodi aneo lewiga oko”.

<sup>11</sup>Odaa nagajo iwaalo ja ninigodi Jesus, meetalo, “Iniwa-aagodi, agaca gadeo daga anogowaa ninyogodi, igaataga nagani nalice le-eegitinece. Igame icogoteeniticogi ica ninyogodi aneo godewiga? <sup>12</sup>Domige dagaxa ma-aami gonegegi, agodaga gadi-iciagi jotigide gonelokodi Jacó, ane nenyagaditogodomi nagani nalice? Ijaagijo wa-aakata ninyogodi nagani nalice, li-oonigipi, codaa me neijedi”.

<sup>13</sup>Naga ninigodi Jesus nagajo iwaalo, meeteta, “Okanicodaagica ane wacipeta ninyogodi nagani nalice, icotaca me yeloadi ecibi. <sup>14</sup>Pida nigica ane wacipeta nigida ninyogodi ane jedianagatece, agaleegica daga yeloadi ecibi. Igaataga nigida ninyogodi ane jedianagatece liciagi nigina lacilotibige ninyogodi ane digica me ipe, ideite catiwedi oko laalegena, aneo lewiga oko ane dagadiaagica liniogo miniwataga Aneotedogoji”.

<sup>15</sup>Odaa nagajo iwaalo ja dipokotalo Jesus, meetalo, “Iniwa-aagodi, adedianita ica ninyogodi, amanagawi-iini age-ee ide-eemadi ecibi, odaa age-ee le-eeditibige daga janagoda jowedi digoina nalice”.

<sup>16</sup>Odaa meeteta Jesus, “Emiita gadodawa, odaa adopilitijo”. <sup>17</sup>Odaa nagajo iwaalo ja igidi Jesus, meetalo, “Agicoda yodawa”. Odaa jegeete

Jesus, “Analiiki gagegi menitiwa, ‘Agica yodawa’. <sup>18</sup>Igaataga nigida makaami jigijoa ciinco gadodawadi, codaa nigini anini makaamitaga natigide agadodawa. Joanigidaa manaliiki meni me digica gadodawa”.

<sup>19</sup>Meetalo Jesus nagajo iwaalo, “Iniwa-aagodi. Amina natigide ja jowoogodi ma-aami nigina anonelogoditogowa lowooko Aneotedogoji. <sup>20</sup>Jotigide godaamipi odogowetetalo Aneotedogoji ditibigimedi nagadi wetiga. Pida a-aamitiwaji judeutedi me-eenitogowa me le-eeditibige me jogowegatalo Aneotedogoji idokida digoida nigotaga Jerusalém”.

<sup>21</sup>Naga igidi Jesus, meeteta, “Digawini liciagi. Iwagati anejitagawa. Icota noko nige dagadiaa ogeetetalo Aneotedogoji ditibigimedi nagadi wetiga, otegeaagaga manitaga nigotaga Jerusalém. <sup>22</sup>Nigina akaamitiwaji samaritaanotedi agowoogoti nigica anogeteta. Pida nigida moko anoko judeutedi бага jowoogotaga ane jogeegata. Igaataga Aneotedogoji бага ikeetediogi judeutedi nigica anodaagee me yewikatidi oko. <sup>23</sup>Pida enagi nigica noko codaa jigicota mina anodogetetalo Aneotedogoji catiwedi laalegena, joanigidiaagidi anodogetetalo Aneotedogoji odatika liwigo, codaa jigidaagida anepegewi mejinaga. Igaataga Aneotedogoji ane Godiodi joaniginaa doletedibige oko liciagi modogetetalo. <sup>24</sup>Aneotedogoji Niwigo. Joanigidaa leegodi me leeditibige nigina ane dogetetalo, me datika liwigo me dogetetalo, joanigidaa nigica gonimawenegegi anepegewi mejinaga me jogeegatalo Aneotedogoji”.

<sup>25</sup>Odaa meetalo nagajo iwaalo, “Baga jowoogodi menagi Nigicoa ane libo-oonagadi Cristo, Nigicoa ane ni-iige Aneotedogoji me godatamagateetege niginoa godaxakawepodi. Nigina nigenagi, odaa ja nelogoditedogowa inoatawece ane daga jowoogotagateda.” <sup>26</sup>Naga igidi Jesus, meeteta nagajo iwaalo, “Jegemegee ane gadotaganegeni, Ee Cristo”.

<sup>27</sup>Acaagaca nagaca lakata jogonotalo nigijjo anodiotibece. Odaa eliodi moyopo Jesus me yotaganege nagajo iwaalo. Pida agica ane ige, degetetalo, “Amiini anoleetibige?” Otegeaagaga oditalo, “Igame leegodi motaganegeni ajo iwaalo?”

<sup>28</sup>Odaa nagajo iwaalo ja yoya niboote. Odaa jigigo manitaga nigotaga, igo me yatematitioigi nigidi nigeladimigipitigi nagani nigotaga, meetiogi, <sup>29</sup>“Diganagi, awi-iinitiwaji ini aaginaga eetece ijoatawece nigijjoa baanaga jowee! Maniginiaaginiwa icoa Aneotedogoji ane ni-iige?”

<sup>30</sup>Odaa eliodi oko ja noditicoaci nigotaga, jigigotibeci miniwataga Jesus.

<sup>31</sup>Maleedogototalo nigijjo nigeladimigipitigi nigotaga, odaa nigijjo anodiotibece jogoditalo Jesus, “Goniigaxinogodi, ele mecogotace aniodi”. <sup>32</sup>Pida naga ninigodi, meetediogi, “Ida ane jeligo, ane digicata mowoogotitiwaji”. <sup>33</sup>Odaa ja dinigetiwage, modi, “Manigicaa ane nadeegitalo liweenigi?” <sup>34</sup>Odaa ja yelogoditediogi Jesus anodaa diitigi nigijjo ligegi, meetediogi, “Iweenigi anejita, nigina me jao Aneotedogoji ane yemaa, ane idimonyatedicogi digoina iigo, codaa nigina me jigodi ibakedi ane najigotediwa. (Joanigidaa dagaxa me jao niwaló odaa ja micataga daga iweenigi). <sup>35</sup>Joanigidaa aneeta nigijjo nigegegi, anee,

‘Egidiwateda cwaatolo epenaitedi nigepaa limedi monopilagaditedio nawodigijedi.’ Pida ejitagawatiwaji anoleetibigimoace digawini nipodaga, nawodigijedi jegei, jegele me inopilagatagatedio. <sup>36</sup>Nigijo ane libakedi me nopilagaditedio nawodigijedi dibatege nedianegegi. Idaagee nigina ane nadeegi oko moyakadi lewiga ane dagadiaagica liniogo miniwataga Aneotedogoji liciagi nigina ane nopilagaditedio nawodigijedi. Odaa idaagee nigina aneyatedi Aneotedogoji lotaga, inaagina nigina ane yatecogotee oko moyakadi lewiga idokida linikegi. (Leegodi monadeegi oko miniwataga Aneotedogoji). <sup>37</sup>Ewi nigida nigegi anodita, ‘Ini oko anetanaga, iniaa eledi baga nopilagaditedio nawodigijedi.’ <sup>38</sup>Natigide gadiigenitiwaji memii anopilagaditedio nigidiwa ane daga gatanigijegi. Eledi oko ane enanaganaga, odaa akaamitiwaji aniboloiteeni nigidi libakedi”.

<sup>39</sup>Eliodi samaritaanotedi nigeladimigipitigi nagani nigotaga jogoyiwagadi Jesus leegodi lotaga nagajo iwaalo, negeetiogi, “Eetetece ijoatawece nigijoa baanaga jowee”. <sup>40</sup>Igaanaga onotalo Jesus nigijoa samaritaanotedi, odaa jogodipokotalo midiaagite miditaga. Odaa jigidiaagite itoataale nokododi.

<sup>41</sup>Odaa jigijotace eliodi oko anoyiwagadi Jesus leegodi mowajipatalo lotaga. <sup>42</sup>Odaa modita nagajo iwaalo, “Nigina natigide jegejiwagataga igaataga ja jajipaagatalo me dotaga, odaa agejiwagataga digidoka leegodi manatematiitedogowa. Pida ja jowoogotaga mewi niginiaaginiwa nigicoa Cristo, Nigicoa anenagi me Gonewikatitogodi”.

### Jesus icilatidi lionigi ica goneleegiwa gonegegi

<sup>43</sup>Naga ixomagatedice nigijoa itoataale nokododi, Jesus ja noditedice nipodigi Samaria, odaa jigigo nipodigi Galiléia. <sup>44</sup>Igaataga mee Jesus, “Nigina ane yelogoditedibece lowooko Aneotedogoji agodeemitetibige miditaga epaa nipodigi”. <sup>45</sup>Igaanaga icotedicogi Jesus digoida Galiléia, nigijo nigeladimigipi ele modibatege. Leegodi nigidi oko eledi oicogotocogi mijotaga nigijo nalokegi anodita Páscoa digoida nigotaga Jerusalém, joanigidiaagonadite ijoatawece nigijoa Jesus loenataka.

<sup>46</sup>Odaa Jesus jogopitacedicogi digoida nigotaga Caná nipodigi Galiléia. Joanigidiaa yelite negeote ninyogodi me viinyo. Oninica goneleegiwa gonegegi nigeladimigipitigi nigotaga Cafarnaum. Nigini goneleegiwa liotagi inionigieliodi. Nigijo lionigi nigini goneleegiwa deelotika digoida nigotaga Cafarnaum. <sup>47</sup>Wajipatibece Jesus me icogotedicogi Judéia, odaa jiginiwatedigi Galiléia. Odaa jigigo miniwataga Jesus, dipokotalo migo digoida Cafarnaum me icilatidi lionigi, leegodi jona doletibige me yeleo. <sup>48</sup>Odaa meeteta Jesus, “Idoka adadiwagatitiwaji nigina manati niginoa godoxicegetedi libinienaga aniniokiniwateda Aneotedogoji me yakadi meote”. <sup>49</sup>Odaa nigijo goneleegiwa ja dipokotacalo Jesus, meetalo, “Iniotagodi. Adinageni managi maleedaga yeleo ionigi”. <sup>50</sup>Naga ninigodi Jesus, meeteta, “Opiliticogi gadigeladi. Gadionigi ayeleo.” Odaa nigijo goneleegiwa jegejiwagadi nigijoa lotaga Jesus, odaa jogopiticogi ligeladi. <sup>51</sup>Igaanaga opiticogi ligeladi, naigitece ja dakapetege liotaka. Odaa modita, “Gadionigi ja ici.” <sup>52</sup>Odaa

ja digikatece nagaca lakata naga icí lionigi. Nogoninigodi, modita, “Jotigi-noko, seete lakata menoale naga ika dapicogo-lolaadi”.<sup>53</sup> Odaa nigijo goneleegiwa ja nalagatibige nagajo lakata negeeteta Jesus, “Gadionigi ayeleo.” Odaa nigijo goneleegiwa codaa me iditawece loiigiwepodi jogoyiwagadi Jesus.

<sup>54</sup> Jigitoataale Jesus meote godoxicegetedi digoida Galiléia, negeno me icogotedicogi Judéia.

### Jesus icilatidi ica alejaado ane dagadiaa ditinege

**5** <sup>1</sup> Nigidiaagidi jigijo ica nalokegi, lalokegi judeutedi. Odaa Jesus ja dowicetedibigimece nigotaga Jerusalém. <sup>2</sup> Catiwedi nagani nigotaga onani aca niwilana ane nolee ninyogodi. Anitawece diniwotaa, idoa ciinco lapoaco aninoa liwalajoli. Nagani niwilana ipegitege nigica lapoagi-nelegi nigotaga, ane liboonagadi “Lapoagi waxacoco.” (“Betesda” liboonagaditigi nioladi judeutedi nagani niwilana.) <sup>3</sup> Owidi eelotaginadi ane iwotinigi iigo midoataga lapoaco nagani niwilana. Idiwa goladi, idiwa alejaadotedi, codaa inoa ane dagadiaa mewaligi. Iditawece oibeo nigini ninyogodi me ditinege. <sup>4</sup> Igaataga modi mida noko me dinikatini nigica aanjo aneote me ditinege nigini ninyogodi. Odaa nigina eelotaginaga anepaga odoejeji me waxoditini ninyogodi ja icí okanicodaagica ane latopagi leelotagi. <sup>5</sup> Idiaagiwo ica goneleegiwa eelotaginaga. Jonegeote 38 nicaagape me deelotika. <sup>6</sup> Jesus naga naditedeloco nigidi goneleegiwa, odaa ja yowoogodi naga leegi mido me deelotika. Odaa ja ige Jesus, meeteta, “Emaani me gadicili?”

<sup>7</sup> Odaa meetalo Jesus, “Iniotagodi. Agica ane idokoletinigi ninyogodi nigina nigicota me ditinege. Nigina naga domegeji me jaxoditini, pida jigidi eledi eelotaginaga odoejeji me waxoditini”.

<sup>8</sup> Meeteta Jesus, “Adabititi. Abaata gagelate, odaagawaligi”. <sup>9</sup> Odaa agica daga leegi nigijo goneleegiwa ja icí. Naga dibata ligelate, odaa jegewaligi. Nigijo noko saabado naga icilatidi Jesus nigijo goneleegiwa alejaado.

<sup>10</sup> Odaa nigijoa lacilodi judeutedi modita nigijo goneleegiwa, “Nigina noko me saabado. Gonajoinaganegeco agadikani moyagati gagelate nigina me saabado”. <sup>11</sup> Naga ninigodi nigijo eelotaginaga baanaga icí, meetiogi, “Nigijoa goneleegiwa ane idicilatidi joanigijaa idiige, meetediwa, ‘Abaata gagelate, odaagawaligi’”. <sup>12</sup> Odaa modita, “Amiijo ica ane gadiigeni mabaata gagelate, odaagawaligi?” <sup>13</sup> Pida nigijo goneleegiwa ayowoogodi ane icilatidi. Igaataga dagaxa meliodi oko, codaa Jesus agaleegicoa, jogopi.

<sup>14</sup> Nigidiaagidi Jesus jigicote nigijo goneleegiwa catiwedi Aneotedogoji ligeladi. Odaa jegeeteta, “Digawini, nigida makaami ja gadicili. Odaa jinaga domagaleegawii gadoenatagi ane beyagi, adigicatace ganinyaagi caticedi nigijo aneni”. <sup>15</sup> Odaa nigijo goneleegiwa ja noditice, jigigo midiwataga nigijoa lacilodi judeutedi. Odaa ja yelogoditioji me Jesus nigijo ane icilatidi. <sup>16</sup> Odaa jigidaa oyatedigi moiatetedibeci Jesus, odoletibige nimawenegeji

moyeloadi leegodi me icilatidi nigijo goneleegiwa me saabado. <sup>17</sup>Meetediogi Jesus, “Eiodi diba codaa nigina natigide, joanigidaa leegodi magaga jiba”.

<sup>18</sup>Joanigidaa leegodi nigijoa lacilodi judeutedi negepaanaga odoletibige moyeloadi Jesus. Igaataga odiletibige daataga yotetteda nigijo niigenatakanegegi leegodi saabado, eleditace leegodi nigina mee me Eliodi nigicoa Aneotedogoji, odaa diniciaceeketetege Aneotedogoji.

### Ica nagatetigi Jesus

<sup>19</sup>Odaa Jesus ja igidi nigijoa lacilodi judeutedi anodakapetege, yalagate me Aneotedogoji Lionigi, negeetediogi, “Ejitagawatiwaji nigina anewi. Aneotedogoji Lionigi dogokiniwatece ayakadi meote ganigica. Pida eote inokina nigina ane nadi Eliodi meote. Inoatawece niginoa Eliodi aneote, Lionigi eledi eote. <sup>20</sup>Igaataga Eliodi yemaa Lionigi, ikeeteta inoatawece niginoa aneote. Codaa icota me ikee eletidi loenataka ane dagaxatace me libinienaga caticedi niginoa eletidi loenataka, anopootiwaji. <sup>21</sup>Digo mijoataga Eliodi me yewikatidi niginoa émagaga, meotace me newiga, Lionigi idaagee eote me yewigatace nigina ane yemaa me yewikatiditace. <sup>22</sup>Iniaaginiwa Eliodi aiwi ane igote oko, pida yajigote Lionigi idatawece nagatetigi me iwi oko anee, odaa jejepaa yowoogodi anigote. <sup>23</sup>Eotedibige minatawece oko odeemitibige Lionigi, liciagi anodigotalo Eliodi modeemitigilo. Nigina ane daga deemitetigilo Aneotedogoji Lionigi, odaa adeemitigilo Eliodi ane niige.

<sup>24</sup>Ejitagawatiwaji nigina anewi. Nigina ane wajipatalo yotaga, odaa eyiwagadi Nigijoa ane idimonya, joaniginiaa ida lewiga miniwataga Aneotedogoji ane dagadiaagica liniogo. Aneotedogoji agalee iwi ane igote, otegexaagaga icata lawikodigi, pida ja iwoko néмага, ja yewiga. <sup>25</sup>Nigida anejitagawatiwaji, ewi. Enagi noko, codaa jigicota niginoa émagaga mowajipata ligegi Aneotedogoji Lionigi, odaa ja newigatace. <sup>26</sup>Eiodi liciagi nigina lacilotibige ninyogodi, leegodi jiginiaageote oko me yewiga. Joanigidaa me najigotediwa Ee Lionigi me jao oko me yewigatace. <sup>27</sup>Najigotediwa inagatetigi me jiwi anejigota oko, igaataga Ee, Goneleegiwa ane jicogotibigimece ditibigimedi. <sup>28</sup>Jinaga adinopootiwaji leegodi niginoa anejitedagawa. Igaataga icota nigica noko mowajipata igegi inoatawece niginoa émagaga. <sup>29</sup>Noditicoaci libecoli. Nigijo anowo anele, newigatace, codaa idiokaanaga limedi me newiga miniwataga Aneotedogoji. Pida nigijo anowo ane beyagi eledi newiga, pida bigidioka limedi me nawikodeega.” (Odibatege lawikodico ane digica liniogo.)

### Ica anoikee aniniwa Jesus

<sup>30</sup>Egidaagee me notaganegetediniwace Jesus, meetediogi, “Ajakadi me jao ganigica moka eetece. Pida idioka limedi me idiwoditema Eiodi ligegi nigina modinigetiwani nigina oko me jiwi anodaagejigotiogi. Nigina me jiwi anejigota nigina oko, jao nigina ane igenaga, leegodi ajoletibige daga jao ane emaga jemaa. Pida joletibige me jao ane yemaa Eiodi, ane idimonya.

<sup>31</sup> Degemokee mejitece ane Ee, daganagawini nigina oko agodibatege yotaga. <sup>32</sup> Pida jigijo eledi oko ane yelogoditibece anodaageji. Jowoogodi mewi niginoa ane yelogoditedibece anodaageji. <sup>33</sup> Akamagakaamitiwaji iigeni oko moige João. Odaa João jegeetiogi nigica anewi. <sup>34</sup> Ajopotibige eledi oko daga yelogodi anodaageji. Pida ejitece niginoa yotaga, amaleegaga eote Aneotedogoji gadewiga miniwataga.

<sup>35</sup> João liciagi nagana noledagaxi ane ibake giliojeenio, anoyalegi, odaa jigidi. Odaa onatecigijoa nokododi jegemaani maniniitibecitiwaji leegodi nigijoa liigaxinaganegeco, ane liciagi nagana noledagaxi. <sup>36</sup> Pida ini eledi aneetece anodaageji, codaa бага dagaxa me gonegegi nagaxatologo nigijoa João lotaga aneetece anodaageji. Igaataga nigida ibakedi Eiodi ane najigotediwa nigepaa jigodi, joanigidaa ikee niginiaaginiwa ane idimonya, codaa ikee ane Ee. <sup>37</sup> Iniaaginiwa Eiodi ane idimonya, eledi eetetece anodaageji. Pida nigida makaamitiwaji anigica dagajipaatalo me dotaga, otegexaagaga icoateda manati anodaageeteda. <sup>38</sup> Lotaga Eiodi agicoa catiwedi gadaalegena, igaataga agadadiwagatitiwaji, ane Ee liigexegi. <sup>39</sup> Eliodi malomegenitelogotiwaji Aneotedogoji lotaga, odaa jagaleetibigetiwaji digidioka limedi me gadewiki leegodi meliodi malomegenitologo Aneotedogoji lotaga. Idiaagidiwa Aneotedogoji lotaga oyalagatiwa anodaageji. <sup>40</sup> Pida nigida makaamitiwaji agemaani managi meetaga, daganagi daganagawini ida gadewiga ane dagadiaagica liniogo.

<sup>41</sup> Ajoletibige dogodeemitetibigiji nigina oko. <sup>42</sup> Eliodi me gadowoogotitiwaji. Codaa jowoogodi me degemaanitedatiwaji Aneotedogoji catiwedi gadaalegena. <sup>43</sup> Nigina me janagi, Eiodi idiige, pida agabaatigitiwaji. Pida degenagi eledi ane ibake anepaa nagatetigi, odaa bagabaategetiwaji. <sup>44</sup> Igame ganimawenegegitiwaji me iwagatakani? Ane gademaanigi midokida madiniwenigidenitiwagatiwaji. Pida nigida makaamitiwaji agoleetibige Aneotedogoji me gadiwenigidenitetiwaji. Aniniokiniwateda me Aneotedogoji, agica eledi. <sup>45</sup> Jinagaleetibigetiwaji dagakaami yakapedipi, daga jotagatibigagaji miniwataga Eiodi. Pida Moisés baanigijaa gadajicitiwaji, leegodi manibeonitegetiwaji liigaxinaganegegi meo gadewiga. <sup>46</sup> Igaataga digiwagatitetiwaji nigijoa Moisés lidiko, daganagawini adinakatonitiwaji, igaataga Moisés jegepaa idí anodaageji. <sup>47</sup> Pida nige daga iwagatitedatiwaji nigijoa ane iditedini Moisés, odaa idaagee agiwagati niginoa yotaga”.

### Jesus niodegetediniwace noiigi-nelegi

(Mateus 14.13-21; Marcos 6.30-44; Lucas 9.10-17)

**6** <sup>1</sup> Nigidiaagidi ja digetedita Jesus ica weiigi-nelegi anodita “Niweiigi Galiléia”. Eledi liboonagadi nigidi weiigi me Tiberiades. <sup>2-4</sup> Ica lalokegi judeutedi anodita Páscoa jigipegiteloco. Odaa ica noiigi-nelegi jogoigalatece Jesus, leegodi monadi nigijoa godoxicegetedi aneote nigijo me nicilatiditediniwace eelotaginadi. Odaa Jesus ja dalagatetedibigimece ica lojotagadi, odaa jigidiaa nicote ijaagijo anodiotibece.



<sup>5</sup>Igaanaga noletedini Jesus, oadaa ja naditetege ica lapo-nelegi ane odiitalo. Odaa Jesus jegeete Filipe, “Igametaga jakataga liweenigi ina noiigi-nelegi?” <sup>6</sup>Pida eote Jesus nigida ligegi onidaagida me dineeteta Filipe, igaataga Iniaaginiwa ja yowoogodi nigica aneote.

<sup>7</sup>Odaa jegee Filipe, “Onidaagida me inedianagatiniwace mokateciginitibige, oadaa domaga jopoogotibige caticedi miniwata taalia beexotedi me jinoojeteegatigi paon”.

<sup>8</sup>Odaa nigijo ane-diotibece, ane liboonagadi André, nioxoa Simão Pedro, meetalo Jesus, <sup>9</sup>“Ini lioneega digoina idiwa ciinco nipaontedi noenataka oyatita ‘cevaada’, idiaagidiwa itiwataale nogojedawaanaga. Pida onatecigidiwa agabotema nigina noiigi-nelegi”.

<sup>10</sup>Odaa jegeetediogi Jesus nigidi anodiotibece, “Enitiogi iditawece nigidi noiigi-nelegi monicoteloco nadegocawaanigi”. Eliodi nadegocawaanigiteloco anei. Odaa ijotawece ja nicotiniwace. Onicoa ciinco miili goneleegiwadi minitaga nigijo lapo (we iwaalepodi inaa nigaanigipawaanigi). <sup>11</sup>Igaanaga iditawece nicotiniwace, oadaa Jesus ja dibate nigijoa ciinco paontedi, oadaa ja diniotagodedibigimece Aneotedogoji. Naga ninoketedini nigijoa paontedi, oadaa ja yajigotediogi nigijo anodiotibece monediatiniwace iditawece nigijo oko ane nicotiniwace. Odaa idaagigote nigijoa itiwataale nogojedawaanaga. Odaa negepaa lica me niodaga nigijo oko. <sup>12</sup>Igaanaga nitiminaga, oadaa jegeetediogi Jesus nigijo anodiotibece, “Atecoogoteeni inoa liwailidi ane iigotedice adaganiadi”. <sup>13</sup>Odaa jogoyatecogotee nigijoa liwailidi paontedi ane iigotedice lapinaga nigijo noiigi-nelegi. Odaa nigijoa liwailidawaanaga anonioda nigijo anodiotibece Jesus noleenagadi dooze etacanitedi nelecoli.

<sup>14</sup>Nigijo oko anonadi nigijo godoxicegedi libinienigi aneote Jesus, modi, “Odaa agalee jawienatakanaga niginiaaginiwa, Nigicoa ane yelogoditedibece lowooko Aneotedogoji, ane niigetedicogi Aneotedogoji digoina iigo”. <sup>15</sup>Igaanaga yowoogodi Jesus mewi modoletibige moyadeegi me domogowo me inionigi-eliodi, oadaa ja dinogatedice, jogopitacedibigimece nigijo lojotagadi, pida onanigijoatece.

### **Jesus ewaligitedeloco ditibigimedi ninyogodi**

*(Mateus 14.22-33; Marcos 6.45-52)*

<sup>16</sup>Igaanaga dawike, nigijo anodiotibece Jesus ja dinikatiniwace negepaa miditaga weiigi. <sup>17</sup>Odaa jogowaxoditinigi niwatece, jigigotibeci digetitacicoace manitaga nigotaga Cafarnaum. Ja leegitece gocidi, ijaa Jesus anigicoa micotediogi. <sup>18</sup>Odaa jogodakapetege ica niwocotaga, jegeote ebekadi nelecoli. <sup>19</sup>Ejinaga domaga seis leegoa me nolaakanaga, oadaa jognaditege Jesus. Ewaligitedeloco ditibigimedi ninyogodi. Nigipegite nagajo niwatece, oadaa jегepaanaga doitibigiwaji, leegodi agoyowoogodi me Jesus. <sup>20</sup>Negepaageetediogi, “Jegemegee. Jinagadoiitwaji!” <sup>21</sup>Odaa ja nixomagatice laadi, jogoyexagatedi catinedi liwatece. Odaa agica daga leegi nagajo niwatece jigicoticogi daato anoyemaa me diiticogi.

### Ica noiigi-nelegi odoletibige Jesus

<sup>22</sup>Naga nigoi nigijo oko ane nenyagatiniwace daato weiigi, nigidi noiigi oyowoogodi mokajotece nagajo niwatece anidiaagi miditaga. Codaa oyowoogodi me digicoateda Jesus me waxoditedini mijotaga nigijo anodiotibece, codaa agicoa Jesus mijotaga nigijo anodiotibece naga noditice nagajo niwatece. <sup>23</sup>Pida icoa eletidi niwateceli anokaga, ane icogoticogi nigotaga Tiberiades. Nigidiwa niwateceli jogodipegi nigijo anei nigijo lapo-nelegi moyeligo paantedi ane yediatetece Goniotagodi Jesus, naga igodi me diniotagodete Aneotedogoji. <sup>24</sup>Igaanogonadi me digicoateda Jesus ijaagijo anodiotibece nigijo aneiticoace, odaa nigijo lapo-nelegi jogowaxoditinigilo nigijoa niwateceli, odaa jigigotibeci nigotaga Cafarnaum odoletibige Jesus.

### Jesus diigaxinagatetece ica niginiaaginiwa ica paon aneo oko me newiga

<sup>25</sup>Odaa nigijo lapo-nelegi jogoyakadi Jesus daato weiigi. Odaa jogoige, moditalo, “Goniigaxinogodi. Igaatigi ica naganooticogi ina?” <sup>26</sup>Naga ninigodi Jesus, meetediogi, “Ejitagawatiwaji nigina anewi. Nigida makaamitiwaji agoletibigiji leegodi manati nigijoa godoxicegetedi ane jaote (oditaga jegemaanitiwaji madinakatoni ane idimonya Aneotedogoji). Pida nigida makaamitiwaji oleetibigijitiwaji leegodi melici nigijoa paantedi ane jediatagadicitiwaji, odaa ja gaditiminitiwaji. <sup>27</sup>Jiniginoka adineloati mabaa makati gaweenigi anepaga ma. Pida adinoniciwagatitiwaji makati gaweenigi anepaga daga dinelio, aneo gadewiga miniwataga Aneotedogoji ane dagadiaagica liniogo. Ee, Goneleegiwa ane jigogotibigimece ditibigimedi, jegemaga jajigotagawatiwaji nigida niweenigi, igaataga Eiodi, Aneotedogoji, ja ikee me najigotediwa inagatetigi.”

<sup>28</sup>Odaa jogoige Jesus, moditalo, “Amiini ica ane leeditibige me jaoga ica ane yemaa Aneotedogoji?” <sup>29</sup>Naga ninigodi Jesus, meetediogi, “Nigica nibakedi ane leeditibige mawii, ane yemaa Aneotedogoji, yemaa nigina me iwagatitiwaji niginiwa Aneotedogoji ane nimonyatedagawa”. <sup>30</sup>Odaa moditalo, “Amiida ica godoxicegedi libinienigi anawii, odaa jejejiwagataga niginoa gadotaga? Amiida ica anawii me jinataga? <sup>31</sup>Jotigide godaamipi me ideidi mididi nipodigi ane yadilo, oyeligo nigijo paon ane icogotibigimece ditibigimedi anodita ‘maná’. Igaataga mee Aneotedogoji lotaga, ‘Ja yajigotediogi loiigi paon ane icogotibigimece ditibigimedi analee oyeligo’”.

<sup>32</sup>Odaa jegeetediogi Jesus, “Ejitagawatiwaji nigina anewi. Anigijaa Moisés ane yajigo paon ane icogotibigimece ditibigimedi moyeligo jotigide godaamipi. Pida Eiodi baaniginiaa yajigo paon anewi me icogotibigimece ditibigimedi. <sup>33</sup>Igaataga paon ane yajigo Aneotedogoji jiginiaaginiwa niginiwa ane dinikatedini icogotedibigimece ditibigimedi, aneote lewiga oko digoina iigo”. <sup>34</sup>Odaa jogodipokotalo, moditalo, “Goniotagodi. Enice godedianegegitece inoatawece nokododi nigica paon anenita”.

<sup>35</sup>Odaa jegeetediogi Jesus, “Jegemegee paon aneo lewiga oko. Odaa nigina anenagi meetaga ja micataga daaditagadiaa nigicile. Codaa ane idadiwagadi ja micataga daaditagadiaa yeloadi ecibi. <sup>36</sup>Odaa jegejitagawatiwaji me dagadadiwagati, idaagida naga domagadati. <sup>37</sup>Inatawece nigina oko ane najigotediwa Eiodi, enagitibeci meetaga. Nigina anenagitibeci meetaga, ajiticoiticoace. <sup>38</sup>Igaataga aidinikati me jicogotibigimece ditibigimedi daga janagi jao inokina nigica ane emaga jemaa, pida idinikati me janagi jao ane yemaa Aneotedogoji, leegodi jiginiaa idimonya. <sup>39</sup>Codaa jigidaa yemaa Eiodi, ane idimonya. Yemaa me digicata ane jiniaditema inatawece nigina ane najigotediwa. Pida yemaa me jewikatiditace iditawece nigicota owidijegi noko. <sup>40</sup>Joanigidaa ane yemaa, Nigijoa ane idimonya. Yemaatedibige minatawece nigina anonadi Lionigi Aneotedogoji, odaa oyiwagadi, modibatege lewiga miniwataga ane dagadiaagica liniogo, codaa me jaotace me newiga nigicota owidijegi noko”.

<sup>41</sup>Odaa icoa judeutedi ja notaganagateloco odakapetege Jesus leegodi nigijo meetediogi, “Ee paon ane icogotibigimece ditibigimedi”. <sup>42</sup>Odaa modi, “Idoa anigidaagidoa ijoa Jesus, lionigi José? Godowoogotagipi nigijo eliododipi. Igaamee ina me yakadi mee me icogotedibigimece ditibigimedi?”

<sup>43</sup>Igaanaga ninigodi Jesus, meetediogi, “Jagabo motaganitibecetiwaji. <sup>44</sup>Inoka yakadi menagi meetaga, nigina Eiodi ane nadeegitediwa. Eiodi ane idimonyatedinigi nigina iigo. Odaa nigina anenagi meetaga jewikatiditace nigicota owidijegi noko. <sup>45</sup>Nigijo jotigide nigijo anoyelogoditedibece lowooko Aneotedogoji, oiditini, ‘Aneotedogoji iigaxi inatawece oko’. Inatawece nigina anowajipatalo Eiodi liigaxinaganegeco, joaniginaagenagitibeci meetaga. <sup>46</sup>Ageji daantigica ane nadi Eiodi. Pida emoka Ee ane jicogotibigimece miniwataga Aneotedogoji, бага jinadi Eiodi.

<sup>47</sup>Jemaa mejitagawatiwaji nigina anewi. Nigina ane idadiwagadi idiokaanaga limedi me yewiga miniwataga Aneotedogoji. <sup>48</sup>Jegemegee paon aneo oko lewiga ane dagadiaagica liniogo. <sup>49</sup>Jotigide gadaamipi oyeligo maná mido nipodigi ane yadilo. Pida bigidokee me nigo. <sup>50</sup>Pida nigina ane yeligo paon ane icogotibigimece ditibigimedi baadagadiaa yeleo. <sup>51</sup>Ee jegemegee paon ane icogotibigimece ditibigimedi aneo oko lewiga ane dagadiaagica liniogo. Nigica ane yeligo nigidi paon, odaa idiokaanaga limedi me yewiga miniwataga Aneotedogoji. Nigidi paon ane jajigo, yolaadi, jaotibige okotigi nigina iigo moyakadi lewiga.”

<sup>52</sup>Odaa nigijo judeutedi ja dinotigimadetiwege, modi, “Igamodaagee idoa goneleegiwa ina mee me yakadi me najigotedogowa lolaadi me jelicaga?”

<sup>53</sup>Odaa jegeetediogi Jesus, “Ejitagawatiwaji nigina anewi. Nige degelicitatiwaji lolaadi Goneleegiwa ane icogotibigimece ditibigimedi, ane Ee, codaa nige dagacipetalo yawodi, nigida makaamitiwaji agica gadewiga ane dagadiaagica liniogo miniwataga Aneotedogoji. <sup>54</sup>Pida nigina ane yeligo yolaadi, codaa me wacipetalo yawodi, bigidiokaanaga limedi me yewiga. Codaa jewikatidi nigicota owidijegi noko. <sup>55</sup>Igaataga yolaadi бага paon anewi me yaagadi me godigicile, codaa yawodi godacipagadi anewi me yaagadi

me godeloadi ecibi. <sup>56</sup>Nigina ane yeligo yolaadi, codaa ane wacipetalo yawodi, idiokaanaga limedi mini meetaga, codaa ite Ee minitaga. <sup>57</sup>Eiodi anida nimawenegegi meote me yewiga okanicodaagica oko, joaniginiaa ane idimonya. Odaa jiginiaagaga leegodi me idewiga. Odaa idaaee nigina ane yeligo yolaadi, codaa me wacipetalo yawodi, idiokaanaga limedi me yewiga miniwataga Aneotedogoji, Ee leegodi. <sup>58</sup>Joanigidiaa paon ane dinikatini icogotibigimece ditibigimedi. Aliciagi nigijo paon anoyeligo jotigide gadaamipi, igaataga agaleegica me newiga. Pida nigina ane yeligo paon ane Ee bigidiokaanaga limedi me yewiga”. <sup>59</sup>Jesus eetetece niginoa notaga nigijo me diigaxinaga manitaga liiakanagaxi judeutedi digoida nigotaga Cafarnaum.

### Notaga aneo lewiga oko

<sup>60</sup>Eliodi nigijo oko anodioteece nogowajipatalo nigijoa lotaga, modi, “Niginoa lotaga galadi, dakaketibige me jibagatege. Amijjo ane yakadi me dibatege inoa lotaga?” <sup>61</sup>Agica ane yelogoditalo Jesus, pida ja yowoogodi nigidi noiigi anodioteece moyalomege, dinotigimadetiwage leegodi nigijoa lotaga. Joanigidiaa leegodi me nigetediniwace, meetediogi, “Manigicaa jao mileenitomi leegodi ijoo yotaga? <sup>62</sup>Amiida ica gadowoogotiwaji dagadati Ee, Goneleegiwa ane jicogotibigimece ditibigimedi, nige jopitibigimece ditibigimedi anejo maleedaga icatibige daga janagi digoina iigo? <sup>63</sup>Liwigo Aneotedogoji jegepaageo oko me yewiga. Nigida agica oko anida nimawenegegi meo. Pida yotaga, loniciwagawa Liwigo Aneotedogoji meo oko me yewiga. <sup>64</sup>Odaa idi nigina akaamitiwaji agetidadiwagadi me idimonya Aneotedogoji”. Meetediogi Jesus nigida ligegi leegodi nigijo maleekoka eniditiediogi nigijo analee odiotibece, akaa yowoogodi ane dogoyiwagaditeda, codaa akaa yowoogodi nigijo ane yajigo modibatalo nigijo nelogododi. <sup>65</sup>Egidaa diitigi Jesus me notaganegetediniwace, meetediogi, “Joanigidiaa mejitagawatiwaji nigina oko idoka yakadi menagi meetaga, nigeote Eiodi me yakadi menagi”.

<sup>66</sup>Nigidiaagidi eliodi nigijo oko anodioteece Jesus ja dinogaticoace, odaa agaleegodinadeegitege. <sup>67</sup>Odaa Jesus jagaga nigetediniwace nigijo dooze anodiotibece, meetediogi, “Akaamitiwaji aagaga emaanii mopili?”

<sup>68</sup>Naga ninigodi Simão Pedro, meetalo, “Goniotagodi. Amaleegagijo ica ane jiiigata? Igaataga niginoa gadotaga onikeetogowa anodaagee me jakataga godewiga ane dagadiaagica liniogo miniwataga Aneotedogoji. <sup>69</sup>Ejiwagatakanaga codaa jowoogotaga nagakamagakaami ane niige Aneotedogoji mawii godewiga. Akaami Lionigi Aneotedogoji ewikegi”.

<sup>70</sup>Odaa ja ninigodi Jesus, meetediogi, “Ja gadixipeniticetiwaji akaami dooze. Pida oniniteci nigina akaamitiwaji, nigini diaabo”. <sup>71</sup>Nigina meote nigida ligegi, eeteta Judas nigijo lionigi Simão Iscariotes. Leegodi Judas, idaaagida mida aneetege nigijo dooze anodiotibece, pida jigijaa yajigo Jesus modibatalo nigijo nelogododipi.

### Nioxoadipi Jesus oyajoi

**7** <sup>1</sup>Nigidiaagidi Jesus igotedeloco nipodigi Galiléia. Agidiaagite nipodigi Judéia, leegodi nigijoa lacilodi judeutedi digoida Judéia odoletibige moyeloadi. <sup>2</sup>Jigipegeteloco lalokegi judeutedi, anodita “Lalokegi nopecetiidi”. <sup>3</sup>Odaa nigijoi nioxoadipi Jesus moditalo, “Anotitice Galiléia, emii Judéia amaleegaga onadi nigina anodiotibigagadici niginoa godoxicegetedi anawiite. <sup>4</sup>Igaataga nigina ane yemaa me yelogo, ayagaditini nigina loenatagi. Genaga awiite niginoa ane libinienaga, odaa ele mikeenitiogi inatawece oko”. <sup>5</sup>Pida otegexaagaga nigidi nioxoadipi agoyiwagadi. <sup>6</sup>Odaa jegeetediogi Jesus, “Anigicota limedi me jikee ane Ee. Pida akaamitiwaji bogokanicodaagaca lakata noko yakadi memii. <sup>7</sup>Nigina okotigi digoina iigo agica leegodi dogoyelatagadomitiwaji, pida Ee bogoyelatomi. Igaataga jikeetiogi niginoa loenataka ane beyagi. <sup>8</sup>Emiitiwaji miditaga nalokegi. Ee bagaleedegejigo igaataga anigicota limedi me idinikee ane Ee”. <sup>9</sup>Joanigidaa ligegitediogi, odaa jigidiaagitedice Galiléia.

### Jesus igo miditaga nalokegi

<sup>10</sup>Igaanaga leecawaanigi migotibeci nigijoi nioxoadipi miditaga nalokegi, odaa Jesus jagaga igo. Pida dinagaditedini migo, agica ane yowoogodi. <sup>11</sup>Icoa lacilodi judeutedi jogodoletibige Jesus miditaga nalokegi. Modi, “Igamige digetedigi?” <sup>12</sup>Ica lapo-nelegi miditaga nigijoi nalokegi, eliodi oko oxatiniwace nigina me notaganaga oyalagatalo Jesus. Idi oko anodi, “Nigijoa goneleegiwa doane mele”. Odaa idiaageledi modi, “Amitigica ica mele, mina ninaaletediniwace oko”. <sup>13</sup>Pida agica ane yalagatalo me lodoe oko-nelegi, leegodi odoitiogi nigidiwa lacilodi judeutedi.

<sup>14</sup>Igaanaga ixomagatediijo liwigotigi nigijoi nokododi me naloogo, odaa jagaga icotedio Jesus, ja dakatediwece Aneotedogoji ligeladi, odaa ja niigaxitediniwace oko. <sup>15</sup>Nigijoi lacilodi judeutedi eliodi moyopo, modi, “Igaamee ina me yowoogodi inoatawece? Igaataga niginoa goniigaxinogododi agica dogoiigaxi”.

<sup>16</sup>Naga ninigodi Jesus, meetediogi, “Niginoa ane jigaxinagatece agemaga yowooko, pida icogotedibigimece miniwataga Aneotedogoji, ane idiige. <sup>17</sup>Nigica ane yemaa meo ane yemaa Aneotedogoji, joaniginiaa yowoogodi migewi me icogotedibigimece miniwataga Aneotedogoji niginoa iigaxinaganegeco, ogoa domige emaga yowooko. <sup>18</sup>Nigina ane diigaxinagatece epaa lowooko, nigini doletibige me dinikeenaganegé. Pida nigina ane doletibige meo me yelogo Aneotedogoji, nigini begewi, codaa me igenaga. <sup>19</sup>Moisés yajigotedagawatiwaji liigenatakanegeco Aneotedogoji. Pida agica nigina akaamitiwaji aneyiwagadi liigenatakanegeco. Igaataga idioka limedi moleetibigetiwaji madeloati.”

<sup>20</sup>Nogoninigodi nigidi oko-nelegi, moditalo, “Nigida makaami ejime dakatiwagaji niwigo abeyacegegi. Igaataga agica ane doletibige me

gadeloati”. <sup>21</sup>Meetediogi Jesus, “Nigijo me jao godoxicegedi libinienigi, odaa akaamitawecetiwaji jogopoo. <sup>22</sup>Digawini! Nigina me saabado akagititiwaji lolaadogo nigaanigawaanigi me ikeeni meledi ida aneetege Aneotedogoji loiigi, leegodi lajoinaganegegi Moisés. Codaa anigijaagijotace Moisés liigenatakanenegegi, pida jotigide gadaamipi maleedigicata Moisés nagakaagida me lakatigi. <sup>23</sup>Akagititiwaji nigaanigawaanigi lolaadogo nigina me saabado, noko ane daga domaga yakadi mica gabakedi, me iwitece lajoinaganegeco Moisés. Enice, igaamee ina me gadelatomi, leegodi me jicilatiditece nigijo goneleegiwa ijoatawece libeyacegeco me saabado? <sup>24</sup>Ikanitiwaji me gadigoati oko leegodi anee mida moko, pida oleetibige ane igenaga codaa anewi nigina mawini eledi oko anee.”

### Nigica aniniwa Jesus

<sup>25</sup>Onica ica nigeladimigipitigi nigotaga Jerusalém, anodi, “Nigidoa jigidaagidoa nigicoa goneleegiwa anodoletibige moyeloadi. <sup>26</sup>Pida digawini! Dotagatedibece lodoe nigina noiigi, niginoa godacilodi agica mowote, agica ligegi dogodakapetege. Migoyowoogodi mewi nigidoa goneleegiwa nigidaagidoa Icoa ane niige Aneotedogoji meote godewiga? <sup>27</sup>Pida Nigicoa ane niige Aneotedogoji nigenagi, agica ane yowoogodi nigica ane icogotedicogi. Igaataga бага jowoogotaga ane icogotedicogi nigidoa goneleegiwa. (Odaa nigidoa goneleegiwa ayakadi daantigidaagidoa Nigicoa ane niige Aneotedogoji.)”

<sup>28</sup>Egidaagee me diigaxinaga Jesus catiwedi Aneotedogoji ligeladi, ja yawice me dotaga, mee, “Migewi madowoogotitiwaji, codaa migewi mowoogoti ane jicogotocogi? Ajanagi daga jibake emaga inagatetigi. Nigijoa ane idiige ewi. Pida nigida makaamitiwaji agicoa mowoogoti. <sup>29</sup>Pida Ee бага jowoogodi, igaataga ida anejitege, codaa jegepaa idimonya”.

<sup>30</sup>Odaa jogodoletibige moniwilo Jesus, leegodi nigijoa lotaga. Pida agica ane dibatalo, leegodi anigicota limedi me yeleo. <sup>31</sup>Eliodi oko nigijo lapo-nelegi jogoyiwagadi. Odaa modi, “Ajawienatakanaga nigina nigenagi Nigicoa ane niige Aneotedogoji meote godewiga, ageote godoxicegetedi ane nagaxatelogo niginoa aneote nigidoa goneleegiwa.”

### Oiige icoa iodagawadi moniwilo Jesus

<sup>32</sup>Onatecigijo nigijo fariseutedi owajipata ligegi nigijo lapo-nelegi moyalagatalo Jesus, pida oxatiniwace. Joanigidaa leegodi nigijo fariseutedi ijaagijo nigijo anoiige sacerdotitidi moiige niodagawadi me domogodibatalo Jesus. <sup>33</sup>Odaa jegeetediogi Jesus nigijo oko, “Aleegi minaagejo makaamitagatiwaji. Nigidiaagidi jopiticogi miniwataga Nigijoa ane idiigetedinicogi digoina iigo. <sup>34</sup>Icota moleetibigijitiwaji, pida apinitibigiji agadakati, igaataga agakati degemiitiwaji ane jiticogi”.

<sup>35</sup>Odaa modi nigijo lacilodi judeutedi, “Igamige diitedicogi ina nige dagadiaagicoa me jakataga? Domige igo miditaga godoiigi judeutedi ane idei midiwataga nigotadi noiigi greego? Ogoa, mige igo me niigaxitediniwace idi ane daga godoiigi? <sup>36</sup>Ajowoogotaga nigica ane

diitigilo nigijoa lotaga nigijo negeetedogowa, ‘Oleetibigijitiwaji, pida agaleegeee madakati, apinitibigiji leegodi agakati degemiitiwaji ane jiiiticogi.’”

### Lacilotibige ninyogodi aneo godewiga

<sup>37</sup>Nigijo owidijegi noko me naloogo, jigijaagijo nigica noko ane dagaxa me gonegegi. Odaa nigijo noko dabiditedini Jesus, ja yawice me dotaga, mee, “Nigica ane yeloadi ecibi, anagi meetaga, acipe! <sup>38</sup>Mee Aneotedogoji lotaganagaxi, ‘Laalegena nigina oko ane idadiwagadi liciagi nigina lacilotibige ninyogodi. Latoagegi ninyogodi aneo godewiga icogotiwece laalegena’”. <sup>39</sup>Jesus eeteta Liwigo Aneotedogoji modibatege nigina anoyiwagadi. Pida anigica dogodibatege Liwigo Aneotedogoji, igaataga Aneotedogoji anegeote Jesus me dagaxa me gonegegi, leegodi anaga yeleo codaa anaga yewigatace.

### Dawalacetiwage oko

<sup>40</sup>Igaanaga owajipatalo lotaga Jesus nigijo noiigi-nelegi, eliodi oko modi, “Dicewi nigidoa goneleegiwa nigidaagidoa nigicoa ane yelogoditedibece lowooko Aneotedogoji”. <sup>41</sup>Pida idi ica eledi oko anodi, “Jigidaagidoa Nigicoa ane niige Aneotedogoji meote godewiga”. Pida ica eledi oko modi, “Nigicoa ane niige Aneotedogoji aicogotedicogi nipodigi Galiléia. <sup>42</sup>Igaataga mee Aneotedogoji lotaganagaxi, ‘Nigicoa ane niige Aneotedogoji meote godewiga ida aneetege licogegi Davi, codaa idiaagaga lanikadi manitaga nigotakawaana Belém, ane ligeladi Davi’”. <sup>43</sup>Odaa nigijo noiigi-nelegi ja dawalacetiwage leegodi Jesus. <sup>44</sup>Odaa idi ica anodoletibige moniwilo, pida agica ane dibatalo.

### Lacilodi judeutedi ageniwagatakanaga

<sup>45</sup>Odaa nigijoa iodagawadi anoiige ja dopiticogi minitaga nigijo lapo fariseutedi ijaagijo nigijo anoiige sacerdotitedi. Odaa jogonigetiniwace nigidiwa iodagawadi, moditiogi, “Igaamee ina me digicoateda manadeegitetiwaji?” <sup>46</sup>Nogoigidi, moditiogi, “Anigica daga jinataga ane dotaga liciagi nigijoa goneleegiwa me dotaga”. <sup>47</sup>Odaa nigijoa fariseutedi moditiogi nigijoa iodagawadi, “Nagaga etigadinaalenitiwaji? <sup>48</sup>Agica aneyiwagadi nigijoa goneleegiwa niginoa lacilodi judeutedi, otegexaagaga nigidiwa fariseutedi. <sup>49</sup>Pida nigidi noiigi agoyowoogodi gonajoinaganegeco ane najigotedogowa Moisés, odaa Aneotedogoji icota me iloikatidi”.

<sup>50</sup>Onijoteci fariseu ane liboonagadi Nicodemus, nigijo ane igo dinotaganegetege Jesus nigijo enoale, meetiogi, <sup>51</sup>“Gonajoinaganegeco anikatogodici daga jiigenatakanaga motacidetibigo okanicodaagica goneleegiwa nige dogodoejegi me jajipaagata, codaa nige daga jowoogotaga ane loenatagi”.

<sup>52</sup>Nogoninigodi, modita, “Domige akaami eledi elatibige nipodigi Galiléia? Awiniteloco Aneotedogoji lotaganagaxi, odaa jogowoogoti me digica ane yelogoditedibece Aneotedogoji lowooko ane icogoticogi nipodigi Galiléia.”

<sup>53</sup>Odaa nigidiaagidi ijotawece nigijo oko jogopiticogi niginoa ligelatedi.



**8** <sup>1</sup>Odaa Jesus jigigo minitaga lojotagadi anodita me “Lojotagadi Oliveira”.

### **Aca iwaalo ane dogolagataka**

<sup>2</sup>Igaanaga eledi noko, naga yapacagatege nigoi, jigigotace Jesus minitaga ligeladi Aneotedogoji. Ijotawece nigijo oko-nelegi odilapodetelogo. Naga nicotedini, odaa ja niigaxitediniwace. <sup>3</sup>Nigijo anodiigaxinagatece lajoinaganageco Moisés ijaagijoa fariseutedi oyadeegitalo Jesus aca iwaalo, odaa jogowo me dabidite lodoe nigidi noiigi-nelegi. Nagaca iwaalo odibateloco me dogolagataka. <sup>4</sup>Odaa moditalo Jesus, “Niigaxinaganaga. Nagada iwaalo odibateloco me dogolagataka. <sup>5</sup>Odaa gonajoinaganageco, Moisés ane iditedini, oniigetogowa me inigidaagatece jatiigata wetiga nagana iwaalo ane dogolagataka me jeloataga. Pida bagakaami, amagaga ida ica anakati me leeditibige me enigata?” <sup>6</sup>Moditalo Jesus niginoa lotaga onidaagida modineetalo, domogodoletibige ane leegodi modakapetege. Pida aninigodi. Naga dakagitedini, odaa ja iditedinigi iigo datikate nibedona.

<sup>7</sup>Odopitibigelogo moige Jesus. Odaa ja dabiditedini, odaa jegeetediogi, “Nigica nigina akaamitiwaji ane digica meo anigetigida loenatagi ane beyagi, jiginia leeditibige modoejegi me yokoleteloco wetiga nagada iwaalo”.

<sup>8</sup>Naga dakagitedini, odaa ja iditacedinigi iigo. <sup>9</sup>Igaanaga owajipatalo nigijoa Jesus lotaga, odaa ijotawece opitibeci oninitedibeci dinilotice, leegodi odeemitece magaga inoa libeyacegeco. Odoejedipi nigijo laxokodipi lacilodi me noditicoaci. Odaa yeyagatedice iniokaaniginiwateda Jesus ajaagajo iwaalo ane dabidite lodoe nigijo noiigi-nelegi. <sup>10</sup>Igaanaga dabiditedini Jesus, odaa ja nadi nagajo iwaalo mokanagadatece. Odaa jegeeteta, “Igaataga ijo anodakapetagagi, anetigadatamegenitice? Agica ane nenyagati ijo anodi me leeditibige metigadiloikatiti?” <sup>11</sup>Naga ninigodi meetalo, “Agica ane nenyagati, Iniwa-aagodi”. Odaa jegeeteta Jesus, “Ee agakaami ilaagete. Emii opili, pida jinagaleegawii gadoenatagi ane beyagi”.

### **Jesus nilokokena inatawece oko**

<sup>12</sup>Odaa Jesus jegeetacediogi, “Nigida mee Ee iciagi macataga nagana lokokena ane naloteloco inatawece oko digoina iigo. Nigina oko ane niotici ani nilokokena aneo me yewiga oko, aliciagi nigina oko anigotigi nexocaga”.

<sup>13</sup>Odaa moditalo nigijoa fariseutedi, “Akamaga gadalaki anakaami. Joanigida leegodi gadotaga agica niwaló.” <sup>14</sup>Naga ninigodi Jesus, meetediogi, “Idaagida nige emegejitece ane Ee, pida yotaga бага diniwaloe, ejitece anewi. Igaataga jowoogodi ane jicogoticogi codaa jowoogodi ane jopiticogi. Pida nigida makaamitiwaji agowoogodi ane jicogoticogi, otegeaxagaga nigica ane jopiticogi agowoogodi. <sup>15</sup>Nigida makaamitiwaji gadigoati oko inokina anee mini me yelogo, ane lakatigi, pida Ee aidigoadita oko. <sup>16</sup>Anaga jiwi oko natigide, pida nige jiwi anodaageeta jao nigina ane igenaga, codaa anewi. Igaataga agoka eetece me jiwi oko anee. Pida Eiodi ane idimonya iniwa meetaga. <sup>17</sup>Maditaga

notaganagaxi ane iwotologo gonajoinaganegeco diniditeloco nigina iniwataale oko me niwoditiwage, odaa nigina ane ligegi ewi, leegodi niwoditiwage. <sup>18</sup>Ee ejitece ane Ee, codaa Eiodi ane idimonyaeledi eetetece anodaageji”.

<sup>19</sup>Odaa jogoige, moditalo, “Igame digetedigi icoa gadiodi?” Naga igidi Jesus, meetediogi, “Nigida makaamitiwaji agadowoogoti, otegeaagaga icoateda mowoogoti Eiodi. Dagadowoogotitiwaji, daganagawini aagaga owoogoti Eiodi”.

<sup>20</sup>Meetetece Jesus niginoa lotaga nigijo me diigaxinaga catiwedi Aneotedogoji ligeladi, ipegitetege aca niwokodagaxi anoyate niginoa dinyeelo anoyajigotalo Aneotedogoji. Agica ane dibatalo Jesus me niwilo, igataga anigicota limedi me yeleo.

### Odigikatece aniniwa Jesus

<sup>21</sup>Odaa jegeetediogi Jesus, “Nigida me Ee icota me jopi. Domogoleetibigitiwaji. Pida nigida makaamitiwaji idokeeta me gademagawadi gabeyacegeco. Agakatitiwaji degemii ane jopiticogi”.

<sup>22</sup>Odaa nigijo lacilodi judeutedi dinotaganegetiwage, modi, “Meetedogowa me daga jakataga miniga ica anopitedicogi. Migigo dineloadi?”

<sup>23</sup>Odaa jegeetediogi Jesus, “Akaami nigeladimigipitedigititiwaji digoina iigo. Pida Ee бага igeladi digoida ditibigimedi. Akaami nigeladimigipitedigititiwaji nigina iigo, pida Ee baadaga igeladi. <sup>24</sup>Joanigidaa leegodi mejitagawatiwaji malee gademagawadi gabeyacegeco. Nige daga iwagatititiwaji ane Ee, odaa nige gadelewitiwaji gademagawadi gabeyacegeco”.

<sup>25</sup>Odaa jogoige, moditalo, “Ida makaami amakaami?” Odaa jegeetediogi Jesus, “Nigijo maleeka idinojogotini me jiba negejitagawatiwaji ane Ee.

<sup>26</sup>Owidi inoa anejitece me jakapetagagitiwaji, codaa akaami ilaagetepi. Pida jajipatalo lotaga Nigijoa ane idimonya, codaa jiginokinoateda mejitioji nigina oko digoina iigo. Igataga Nigijoa ane idimonya, ewi”.

<sup>27</sup>Agoyowoogodi Jesus me yalagate Aneotedogoji, ane Eliodi. <sup>28</sup>Joanigidaa leegodi meetediogi Jesus, “Nigotoniteditiwaji meloati Goneleegiwa ane icogotibigimece ditibigimedi, odaa jogowoogotitiwaji ane Ee. Icota mowoogotitiwaji me digica ane jao ane emaga inagatetigi. Pida ejitagawa inokinoateda ane idiigaxitetece Eiodi. <sup>29</sup>Nigijoa ane idimonya etiniwa meetaga. Agica daga idika dogoka eetece, igataga idioka limedi me jao ane yemaa”. <sup>30</sup>Nigijo negee Jesus niginoa lotaga, eliodi oko jogoyiwagadi mewi me Aneotedogoji ane nimonya.

### Ica niotagi iniaa ica ane daga niotagi

<sup>31</sup>Odaa jegeetediogi Jesus nigijoa judeutedi anoyiwagadi, “Nigidioka limeditatiwaji me iwagati yotaga, odaa jagakaami nigina anewi moniotici.

<sup>32</sup>Odaa jogowoogotitiwaji anewi, codaa nigida anewi gadikaniticitiwaji”.

<sup>33</sup>Odaa jogoninigodi, moditalo, “Nigida moko ida anejinagatege licogegi

Abraão. Anigica daga etigodiotage. Igame leegodi ina menitogowa metigodikatice? Igaataga agoko niwilogojegipi.”

<sup>34</sup>Odaa jegeetedioji Jesus, “Ewi mejitagawatiwaji, nigina anidioka limedi meo ane beyagi, joaniginiaa liotagi nibeyacaga. <sup>35</sup>Nigina niotagi agidioka limedi me yakadi midiaagitigi ligeladi niotagodi. Pida nigina nionigi bigidioka limedi me itioji loiigiwepodi. <sup>36</sup>Nige Aneotedogoji Lionigi gadowilecenitetematiwaji gabeyacegeco me gadikanitedice, odaa begewi madinikaniticoace. <sup>37</sup>Jowoogoditiwaji mida anenitege licogegi Abraão, pida oleetibigetiwaji madeloati, leegodi agabaategetiwaji iigaxinaganegeco. <sup>38</sup>Ejitece niginoa ane nikeetediwa Eiodi. Odaa akaamitiwaji jagaga iwitece nigina anagaga iigaxitagadici gadiodi”.

<sup>39</sup>Odaa jogoigidi, moditalo, “Ewi me godiodi Abraão”. Odaa jegeetedioji Jesus, “Dagakaami lionigipitewaji Abraão, daganagawini awii liciagi nigijoa loenataka. <sup>40</sup>Pida jegejitagawatiwaji anewi, yajipakegitalo Aneotedogoji. Pida egidaagenitiwaji moleetibige madeloati. Abraão agica degeo liciagi. <sup>41</sup>Nigida makaamitiwaji bagawii liciagi nigijjo gadiodi”. Nogoninigodi, moditalo, “Iniwa oniniwatece Godiodi, ane Aneotedogoji. Mina oko lionigipi, anewi me lionigipi.”

<sup>42</sup>Odaa jegeetedioji Jesus, “Digawinitiwaji, degewi me Gadiodi Aneotedogoji, daganagawini ademaani, igaataga Ee Lionigi, codaa jigidaa jigogiticogi miniwataga. Anegemaga yoniciwaga me janagi, pida jiginiaa idiige.

<sup>43</sup>Agowoogotitewaji ane diitigi niginoa yotaga, leegodi agemaani mabaatege iigaxinaganegeco. <sup>44</sup>Akaami lionigipitewaji diaabo, codaa inoka emaani mawii nigica ane yemaa. Nigijjo maleeka igo nigina iigo, nagakaa gonematagodi. Agica aneetege nigica anewi, igaataga minitaga agica anewi. Nigina me diwitaka, eo nigica anepaa lakatigi, igaataga awitakegi. Codaa eliodi inoatawece niwitakeco.

<sup>45</sup>Agiwagatitewaji niginoa anejitedagawa, igaataga ejitece nigina anewi. <sup>46</sup>Agica nigina akaamitiwaji ane yakadi me nikeetiwa mida ibeyacegegi. Nigejitece anewi, igrime leegodi me daga iwagatitedatiwaji yotaga? <sup>47</sup>Nigina ane nebi Aneotedogoji, watacotece Aneotedogoji lotaga. Odaa nigida makaamitiwaji agatacolitece Aneotedogoji lotaga, igaataga agica ane enitegetetiwaji”.

### **Anigicatibige digica Abraão niginiwa Jesus**

<sup>48</sup>Odaa nigijjoa lacilodi judeutedi moditalo Jesus, “Ja jowoogotaga mewii nigijjo anejinagata, makaami elatibige noiigi samaritano, codaa nigida makaami ejime dakatiwagaji niwigo abeyacegegi”. <sup>49</sup>Naga ninigodi Jesus, meetediogi, “Agica niwigo abeyacegegi meetaga. Pida jogetetalo Eiodi, pida akaamitiwaji baadaga eemiteetibigiji, leegodi otaganitibigiji. <sup>50</sup>Aidinabaketibece daga emaga joletibige me idelogo. Pida ini anepaga doletibige me dogetetiwa, codaa me ikee anewi. <sup>51</sup>Ewi mejitagawatiwaji, nigina aneyiwagadi yotaga, agalee yeleo”.

<sup>52</sup>Odaa moditalo nigijjoa judeutedi, “Nigina natigide agalee jawienatakanaga me dakatiwagaji niwigo abeyacegegi. Abraão akaa yeleo,

nigijo anoyelogoditedibece Aneotedogoji lowooko eledi akaa nigo. Pida akaami meni nigina aneyiwagadi gadotaga me dagadiaa yeleo. <sup>53</sup>Domige dagaxa makaami gonegegi, agodaga gadiciagi godiodi Abraão anakaa yeleo? Eleditace domige anagaxaateloco nigijo anoyelogoditedibece Aneotedogoji lowooko baanaga akaa nigo? Meni managaxaateloco, pida awitaka!”

<sup>54</sup>Naga ninigodi Jesus, meetediogi, “Degemaga jao me idelogo, agica jao. Pida Eiodi dogetetediwa. Odaa akaamitiwaji meni me Ganoenogodi. <sup>55</sup>Pida agica dogowoogotitewaji. Pida Ee baga jowoogodi. Degejitagawatiwaji me digicoateda me jowoogodi, odaa jegee awitakegi, digo anenitiwaji mawitaka. Pida jowoogodi Eiodi, codaa mejiwagadi lotaga. <sup>56</sup>Jotigide ganelokoditiwaji Abraão ninitibece naga yowoogodi micota noko me janagi nigina iigo. Naga yowoogodi nigijo noko, odaa ja ninitibece”.

<sup>57</sup>Pida moditalo, “Nigida makaami anigicoa otegexaagaga meya-taalia ganicaagape. Igamodaagee ica makati manati Abraão?” <sup>58</sup>Naga ninigodi Jesus, meetediogi, “Ejitagawatiwaji anewi. Anigicatibige Abraão degenitini, naga Ee, codaa idioka limedi me Ee”. <sup>59</sup>Odaa nigijoa judeutedi jogodibatalo wetiadi me domaga oyokoletelogo, pida Jesus ja dinagaditedi. Igotedigi liwigotigi nigijo noiigi-nelegi ane dilapode, odaa ja noditedice Aneotedogoji ligeladi.

### Jesus icilatidi ica golaga

**9** <sup>1</sup>Ica noko ewaligitedibece Jesus, odaa ja nadi ica goneleegiwa ane lanikoa me golaga. <sup>2</sup>Odaa jogoige Jesus nigijo anodiotibece, moditalo, “Goniigaxinogodi. Igaamee ini goneleegiwa me lanikoa me golaga? Mige leegodi epaa libeyacegeco, ogoa domige libeyacegeco eliododipi?” <sup>3</sup>Naga ninigodi Jesus, meetediogi, “Aleegodi libeyacegeco, otegexaagaga libeyacegeco eliododipi me golaga. Pida golaga eotibige me yakadi Aneotedogoji me ikee mida nimawenegegitetece nigini goneleegiwa. <sup>4</sup>Leeditibige me jao libakedi Nigijoa ane idimonya, malee noko. Igaataga nigenoale agaleegica ane yakadi me diba. <sup>5</sup>Codaa maleeginaagejotice digoina iigo, Ee ane jajigota nilokokena inatawece oko”.

<sup>6</sup>Igaanaga nigotedini Jesus meote nigijoa lotaga, odaa ja yawaletedinigi iigo, jegeote napaloakawaanigi yatite lawale. Naga dibate nigijo napaloakawaanigi, odaa ja yocelate ligecooge nigijo goneleegiwa golaga. <sup>7</sup>Odaa jegeeteta nigijo golaga, “Emii, anapiladiti manitaga ninyogotagaxi niwilana ane liboonagadi Siloé”. (“Siloé” amina anejinagata “Nigijo anoniige”). Odaa nigijo golaga jigigo, anapiladiti. Nogopiticogi ligeladi, ja yatetibece.

<sup>8</sup>Ijoa lipecegawadi nigijo golaga, codaa nigijo anelioditibece monadi me dipokotibece, modi, “Aniginiaagini ijo golaga ane nicoti, dipokotibece?” <sup>9</sup>Odaa onica anodi, “Joaniginiaagini”. Pida ica eledi modi, “Aniginiaagini, latopiwa”. Pida ijaagijo nigijo goneleegiwa mee, “Jegemegee nigijo golaga, pida ja idici”. <sup>10</sup>Odaa jogoige, modita, “Ame nimawenegegi aneo matenitibece?” <sup>11</sup>Naga ninigodi, meetiogi, “Nigijoa goneleegiwa ane liboonagadi Jesus oneote yatecogotee onatecigini napaloaga, odaa ja yocelate igecooge, odaa jegeetediwa,

'Emii manitaga niwilana liboonagadi Siloé, anapiladiti'. Odaa jegejigo, naga inapiladiti, odaa ja jatetibece". <sup>12</sup>Odaa jogoigetace, modita, "Igame digetedigi icoa goneleegiwa?" Naga ninigodi, meetiogi, "Ajowoogodi analee digetedigi".

### **Icoa fariseutedi onigetice nigijo goneleegiwa anijo me golaga**

<sup>13</sup>Odaa jogoyadeegi nigijo goneleegiwa ane gela me ici me golaga midiwataga fariseutedi. <sup>14-15</sup>Odaa jogoigetece nigica ane nimawenegegi me yatetibece. Naga ninigodi, meetiogi, "Yocelate napaloaga igecooge. Naga inapiladiti, odaa ja jatetibece". Nigijo noko saabado Jesus meote lategocawaanigi napaloaga, naga yatenegetedibece nigijo goneleegiwa.

<sup>16</sup>Ijo onatecigijoa fariseutedi anodi, "Nigijoa goneleegiwa aneote nigida loenatagi aicogotedigi miniwataga Aneotedogoji, igaataga dibatedigi saabado". Odaa ica eledi modi, "Nigijoa goneleegiwa daga agopeloagi dogowidi libeyacegeco daganagawini ayakadi degeote niginoa godoxicegetedi." Odaa ja dawalace nigijo lapo fariseutedi, leegodi Jesus.

<sup>17</sup>Odaa jogoigetace nigijo goneleegiwa, modita, "Amiida anakatitece ijoa aneote matenitibece?" Naga ninigodi, meetiogi, "Jakadi minaagina nigina ane yelogoditedibece Aneotedogoji lowooko".

<sup>18</sup>Nigijoa lacilodi judeutedi oyakadi nigijo goneleegiwa me daga golaga nigijo jotigide, analee yatetibece natigide. Joanigidaa leegodi moniditiogi eliiododipi.

<sup>19</sup>Odaa nigidiwa lacilodi jogoige eliiododipi, moditiogi, "Ini gadionigitiwaji? Meni me golaga maleekenitini. Odaa igamodaagee ica naga yatetibece natigide?"

<sup>20</sup>Odaa modi nigijo eliiododipi, "Godionigi, codaa jowoogotaga me lanikoa me golaga. <sup>21</sup>Pida ajowoogotaga nigica ane nimawenegegi naga yatetibece nigina natigide, codaa ajowoogotaga anigijo ica aneo me yatetibece. Pida agalee nigaanigi. Dige ageetiwaji. Iniaagini yakadi me yelogodi". <sup>22</sup>Owote nigida ligegi nigijo eliiododipi leegodi odoitiogi nigijoa lacilodi judeutedi. Igaataga nigijoa lacilodi jigijo modinotaganegetigi me dagadiaa oikatio midywa niiakanagaxiidi okanicodaagica oko anee Jesus me nigijaagijoa Nigicoa ane niige Aneotedogoji meote godewiga.

<sup>23</sup>Joanigidaa leegodi modi nigijo eliiododipi, "Agalee nigaanigi. Ageetiwaji".

<sup>24</sup>Odaa jogniditace nigijo ane ici me golaga, modita, "Oleetibige mogeetetalo iniokiniwateda Aneotedogoji ane gadicilatiti. Igaataga jowoogotaga nigijoa goneleegiwa ane gadicilatiti minaagina anowidi libeyacegeco". <sup>25</sup>Naga ninigodi, meetiogi, "Ajowoogodi migowidi libeyacegeco. Baga jowoogodi me ee golaga nigijo jotigide, pida natigide ja jatetibece". <sup>26</sup>Odaa jogoigetace, modita, "Amiini ica aneote? Igamodaagigotedagawa negeote matenitibece?" <sup>27</sup>Naga ninigodi, meetiogi, "Ja jelogoditagawatiwaji, pida agemaani madadiwagati. Igamawii memaani majipaatace? Migakaami eleditetiwaji emaani me iwitibece?"

<sup>28</sup>Odaa jogniwotibige modita, "Akapaga iwitece. Pida oko, baga jiwagatece Moisés. <sup>29</sup>Igaataga jowoogotaga Aneotedogoji me yotaganegetedibece Moisés. Pida nigijoa goneleegiwa agopeloagi ajowoogotaga nigica ane icogotedicogi".

<sup>30</sup>Naga ninigodi nigijo goneleegiwa, meetiogi, “Eliodi me gadopootiwaji! Agowoogotitiwaji ane icogotedigi, pida baanegeote me jatetibece.

<sup>31</sup>Jowoogotaga Aneotedogoji me daga wajipatediogi nigina anidioka limedi mowo ane beyagi. Pida wajipate nigina anoiwenigide, codaa anowo ane yemaa.

<sup>32</sup>Nigijo maleeka yoeteda Aneotedogoji nigina iigo, agica daga jajipaagata dogodi ijoa yatenegetedibece oko ane lanikoa me golaga. <sup>33</sup>Nigijoa goneleegiwa ane idicilatidi daaditaga liigexegiteda Aneotedogoji, daganagawini ayakadi degeote loenatagi”. <sup>34</sup>Odaa modita, “Nigijo manitini nagakaa gadoleeni nigicoa gabeyacegeco. Enige ja gadeedi me godiigaxinegegi?” Odaa jogoyamagatijo, jogonogaticogi wetice liakanagaxi judeutedi.

### Ica oko anetoinaga catiwedi laalegena

<sup>35</sup>Odaa Jesus ja wajipatedibece moiticoitice nigijo goneleegiwa ane icilatidi. Igaanaga dakapetetege, odaa ja ige, meeteta, “Ida makaami iwagati Aneotedogoji Lionigi?” <sup>36</sup>Naga ninigodi, meetalo, “Iniotagodi. Igoataga icoa Aneotedogoji Lionigi anikeenitediwa amaleegaga ejiwagadi?” <sup>37</sup>Odaa jegeete Jesus, “Jaganati. Jegemegee ane gadotaganegeni”. <sup>38</sup>Naga igidi, meetalo, “Iniotagodi, gadadiwagati”. Odaa ja yamagatedini lokotidi lodoe Jesus me dogetetalo.

<sup>39</sup>Odaa jegeete Jesus, “Janagi nigina iigo me jiwi anejigota oko, me inoleketicoace goladi, odaa nigina anodi me yatetibigiwaji jegetoinadi”. (Goladi nigina ane dogoyowoogodi ane yemaa Aneotedogoji.)

<sup>40</sup>Nigijoa fariseutedi anidiaagi midoataga Jesus owajipatalo nigijoa lotaga. Odaa jogoige, moditalo, “Oko domigoko goladi?” <sup>41</sup>Naga ninigodi Jesus, meetediogi, “Dagakaami goladi, daganagawini agakaami laagetedipitetiwaji Aneotedogoji. Pida menitiwaji matenitibece, codaa mowoogoti inoatawece. Odaa joanigidaa leegodi makaami laagetedipitetiwaji Aneotedogoji leegotedi gabeyacegeco”.

### Lapo waxacocoli


**10** <sup>1</sup>Egidaagee Jesus me dotaga, odaa mee, “Ejitagawatiwaji nigina anewi. Nigina ane dakatiwece liotaanigi waxacocoli, ane daga diotiwece epoagi, pida dagaxatio me dakatio, joaniginiaa abejewegegi, olicegegi. <sup>2</sup>Pida nigina ane diotiwece epoagi me dakatio, joaniginiaa begewi me nowienogodi waxacocoli. <sup>3</sup>Odaa nigina ane yowie epoagi yomoketege nigijo nowienogodi waxacocoli me dakatio, codaa nigidiwa niwaxacocoli jogoyowoogoditege lotaganegegi. Niboonagateetiniwace niwaxacocoli nigina meniditege me ixoticogi we liotaanigi. <sup>4</sup>Odaa ja yadeegitedicogi we idiwatawece niwaxacocoli, ijaagijo igo odoe, odaa jogodilokoteloco nigica ane diiticogi, leegodi oyowoogoditege lotaganegegi. <sup>5</sup>Agodilokoteloco nigina ane dogoyowoogodi. Pida бага daleditibige igaataga oilategeeledi oko lotaganegegi” <sup>6</sup>Jesus ida ane iciaceketetege nigida latematigo, pida nigijo oko agoyowoogodi nigica ane diitigilo nigijoa lotaga.

**Jesus diniciaceeketetege nigina nowienogodi waxacoco anele**

<sup>7</sup>Odaa jegeetace Jesus, “Ejitagawatiwaji nigina anewi. Iciagi micataga nigina epoagi anodiotiwece waxacocoli. <sup>8</sup>Ijotawece nigijo anenagitibeci maleedigicatibige me janagi, nigijo abeyacegegipi, codaa molicagaga. Pida niginoa waxacocoli agowatacotece lotaganegegi leegodi me iomagaga. <sup>9</sup>Nigida me Ee iciagi epoagi. Nigina ane niotiwece meetaga, jigida lewiga ane dagadiaagica liniogo miniwataga Aneotedogoji. Yakadi me nakatio, codaa me noditice ane yemaa me diiticogi, codaa yakadi ane yeligo. <sup>10</sup>Nigina olicegegi inoka eletema me dolice, daije, codaa me yaagadi ane daga nebi. Pida Ee бага janagi me jao lewiga oko ane dagadiaagica liniogo miniwataga Aneotedogoji codaa jao moyakadi inoatawece anoyopotibige me newiga digoina iigo, micataga nigina nowienogodi waxacoco me doweditelogo niwaxacocoli, codaa me yediatece inoatawece anoyopotibige.

<sup>11</sup>Ee nowienaganaga anele. Nigina nowienaganaga anele yeleotema niwaxacocoli. (Inatawece anonakato Goniotagodi liciagi niginoa waxacocoli.) <sup>12</sup>Nigina nimeedi, ane daga libakedi me nowienaganaga, codaa ane daga nepiliditeda waxacocoli. Nigina daga naditege diwilecogoni, nigini yaladi waxacocoli, elodi. Odaa diwilecogoni ja dibatalo waxacocoli, codaa ilaagagaditiwaji. <sup>13</sup>Nigijo nimeedi elodi leegodi minoka yowo me dinigaanyetece ninyeelo me diba. Agica meo daga ligecagalegetedi waxacocoli. <sup>14-15</sup>Ee nowienogodi waxacocoli anele. Digo mijoataga Eiodi me idowoogodi, codaa Ee me jowoogodi Eiodi, jigidaagee magaga jowoogodi iniwaxacocoli, nebi aagaga etidowoogodi. Icota me ideleotema iniwaxacocoli. <sup>16</sup>Inoa eletidi waxacocoli ane inepilidi, pida agicatibige minataga nigini lapo judeutedi. Odaa leeditibige magaga ejigotiogi. Odaa owajipata yotaganegegi, odaa jigini oniniteci lapo waxacocoli, iniaa oniniteci nowienogodi.

<sup>17</sup>Eiodi idemaa leegodi me idinajigo metideloadi, pida idewigatace. <sup>18</sup>Agica ane yakadi me ideloadi, nige daga idinajigo, pida idinajigo



(João 10.7)



me etideloadi. Ida inimawenegegi me idinajigo me ideleo, codaa ida inimawenegegi me idinewikatitidaci. Igaataga Eiodi idiige midegeji.”

<sup>19</sup>Odaa nigijoa judeutedi ja dawalacetacoace leegodi nigijoa lotaga Jesus. <sup>20</sup>Eiodi oko anodi, “Nigidoa dakatiogilo niwigo abeyacegegi, joanigidaa me yetole. Igaamee ina majipaatalotiwaji inoa lotaga?” <sup>21</sup>Pida icaeledi oko modi, “Nigina oko anodakatiogi adotaga daga liciagi me dotaga. Codaa niwigo abeyacegegi ayakadi daga icilatidi golaga”.

### Icoa judeutedi ane daga odibatege Jesus

<sup>22</sup>Icoa nokododi limedi niwetaga. Jigicota limedi lalokegi judeutedi moyalagatibige nigijoa maleekoka oiwilegitigi Aneotedogoji ligeladi digoida nigotaga Jerusalém. <sup>23</sup>Jesus igotedigi icaeledi le Aneotedogoji ligeladi anodita, “Licoogadi Salomão”. <sup>24</sup>Odaa nigijoa lacilodi judeutedi jogodilapodetacelogo Jesus, odaa idokee monigetedice, moditalo, “Igaatigi nige anelogotitogowa ica anakaami? Enitogowa nigewi nagakamagakaami nigicoa Cristo, ane niige Aneotedogoji me godatamagateetege niginoa godaxakawepodi.”

<sup>25</sup>Naga ninigodi Jesus, meetediogi, “Jigijoa mejitagawatiwaji ane Ee, pida agadadiwagati. Codaa niginoa godoxicegetedi ane jaote, me jatika nagatetigi Liboonagadi Eiodi ane idimonya, jiginaagoikee ane Ee. <sup>26</sup>Pida agadadiwagatitiwaji nigijoa mejitagawa, leegodi agakaami iniwaxacocoli, <sup>27</sup>Niginoa iniwaxacocoli oyowoogoditege yotaganenegegi. Ee jowoogoditiogi, codaa oniotibici. <sup>28</sup>Jajigotiogi lewiga ane dagadiaagica liniogo miniwataga Aneotedogoji, codaa agalee nigo. Odaa agica ane yakadi me nogaticoace nigina naga ide i baagadi. <sup>29</sup>Eiodi najigotediwa eliodi oko. Eiodi dagaxa meliodi nimawenegegi, agica liciagi. Codaa agica ane yakadi me nogaticce aneiteloce Eiodi libaagadi. <sup>30</sup>Ee iniaa Eiodi, godiciagi dogokinitece oko.”

<sup>31</sup>Igaanaga owajipatalo nigijoa lotaga Jesus, odaa nigijoa judeutedi jogodibatacalo wetiadi me domogoyokoletelogo. <sup>32</sup>Pida naga notaganegetediniwace Jesus, meetediogi, “Owidi ane jaote niginoa anele gadodoetiawaji, niginoa ane niigetediwa Eiodi me jaote. Amiica ijoa yoenataka aneo me leedi madigidaaticetiawaji?”

<sup>33</sup>Nogoninigodi, moditalo, “Ajoleegatibige me jokolenagatagaloco wetiga daga leegodi okanicodaagica gadoenatagi anele. Pida joleegatibige me jokolenagatagaloco leegodi nigijoa gadotaga ane beyagi motaganitibige Aneotedogoji. Igaataga akaami goneleegiwa, pida adiniciaceekenitege Aneotedogoji”.

<sup>34</sup>Naga ninigodi Jesus, meetediogi, “Midiwataga lotaga ganiigaxinaganegeco iwoteloco mee Aneotedogoji, ‘Gadiciagitiwaji gonoenogododi’. <sup>35</sup>Aneotedogoji lotaga idioka limedi mewa, codaa Aneotedogoji eetediyogi me gonoenogododi nigijoa ane yajigotediogi lotaga. <sup>36</sup>Enige ina meji me Ee Aneotedogoji Lionigi, igaamee ina menitiwaji me jotagatibige Aneotedogoji? Igaataga idixipetedice Eiodi, odaa idiigetedicogi nigina iigo. <sup>37</sup>Nige daga jaote ibaketedi ane niigetediwa

Eiodi me jaote, odaa aleeditibigeti waji dagadadi wagati. <sup>38</sup>Pida daga jao libakedi, idokeeta agadadi wagati waji leegodi niginoa yotaga, enice adadi wagati waji leegodi niginoa ibaketedi ane jaote, amaleegaga owoogotiti waji, codaa agica dagadinawieni, miniwa Eiodi meetaga, codaa Ee ejotelogo Eiodi.”

<sup>39</sup>Odaa jogodoletibige moniwilo Jesus leegodi modiletibige daga dotagatedibige Aneotedogoji, pida oiwoko.

<sup>40</sup>Nigidiaagidi jogopitacedicogi daato akiidi Jordão. Odaa jigidiaagite digoida anei João Batista me nilegetiniwace oko nigijo jotigide. <sup>41</sup>Eiodi oko igotibeci midoataga, igaanaga onadi, odaa modi, “João agica dege otege xaagidatece godoxicegedi libinienigi, pida ijoatawece nigijoa lotaga meetece nigidoa goneleegiwa, ewi nigidaagee”. <sup>42</sup>Odaa eliodi nigidi oko jogoyi wagadi Jesus.

### Lemegegi Lázaro

**11** <sup>1-2</sup>Ica goneleegiwa ane liboonagadi Lázaro ligeladi manitaga aca nigotakawaana anodita Betânia. Niwaalepodi, Maria ajaa Marta ane noiigiwepodi. Maria jaganiaagani nagajo ane yatitalo loḡonaka Goniotagodi ladokojegi, odaa nigidiaagidi, ja yati lamodi me yadilonatidi. Odaa ica noko Lázaro ja deelotika. <sup>3</sup>Odaa nigijo niwaalepodi jogodajoinagatalo Jesus, modi, “Iniotagodi, nigijo gademaanigi etidi eliodi me deelotika”.

<sup>4-5</sup>Jesus eliodi me yemaa Marta, ajo nioxoa, ijaa Lázaro. Nigijo naga dibodicetedigi Lázaro me deelotika, odaa jegee, “Nigida neelotagi ageo Lázaro digidioka limedi me yeleo. Pida nigida anee Lázaro onidaagida meo nigina oko modogetetibigimece Aneotedogoji. Jigidaa leegodi nige odogetetiwa, ane Ee Lionigi Aneotedogoji”.

<sup>6</sup>Joanigidaa leegodi nigijo naga dibodicetedigi Lázaro me deelotika, odaa edinopagaditeda itoataale nokododi midiaagite nigijo aneite.

<sup>7</sup>Nigidiaagidi jegeetediogi nigijo anodiotibece, “Jopilagatacicogi Judéia”.

<sup>8</sup>Odaa moditalo nigijo anodiotibece, “Goniigaxinogodi. Anaga leegi nigijoa lacilodi judeutedi me domegetigadigidaatice me domegetigadeloati. Enige jegemaani mopilitacijo!”

<sup>9</sup>Naga ninigodi Jesus, meetediogi, “Idiwa dooze lakata nigina noko mani aligege. Odaa nigina oko anewaligitigi noko adixipe, igaataga naditece ligi. <sup>10</sup>Pida nigina anewaligitigi enoale, aiwoko me dixipe, leegodi nexocaga, codaa agaca lokokena mijotaga”.

<sup>11</sup>Joanigidaa ligegi Jesus, odaa nigidiaagidi jegee, “Godokaagedi Lázaro ja diote, pida ejigo miditaga, jojieteloco”.

<sup>12</sup>Odaa nigijo anodiotibece moditalo, “Goniotagodi, nigokexaa diote, dice ici”. <sup>13</sup>Odiletibige degeete Jesus dogokexaa diote Lázaro. Pida eeteta naga yeleo Lázaro, nigijo mee diote. <sup>14</sup>Odaa nigidiaagidi Jesus ja yelogoditediogi Lázaro naga yeleo. <sup>15</sup>Odaa jegeetediogi, “Jakadi mele me daga Ee miditaga naga yeleo leegodi akaamitiwaji, amaleegaga adadi wagati. Natigide iniga miditaga”.

<sup>16</sup>Odaa nigijo anodita Tomé, ane nikoxeeedi me “Owaadi”, joanigijaageetiogi nigijo eledi anodiotibece Jesus, “Iniga mijoataga amaleegaga godemagawa Goniigaxinogodi”.

### Jesus jiginiaageote oko me yewigatace

<sup>17</sup>Nigijo nigicotedicogi Jesus nipodigi Judéia, pida jegeote cwaatolo nokododi midí Lázaro catiwedi lawimagajegi-wetiga anonaligite. <sup>18</sup>Nagajo nigotakawaana anodita Betânia idiwa itoatadigida ciloomito me yototice nigotaga Jerusalém. <sup>19</sup>Eliodi judeutedi igotibeci odalita Marta, ajaa Maria, igotibeci modalitiogi me ninyaaga, leegodi me yeleo naaginaga.

<sup>20</sup>Igaanaga dibodice Marta niginoa Jesus, odaa jigigo dakapetege. Pida Maria baadegitibige, nigijo aneite me nicoti digoida ligeladi. <sup>21</sup>Nigijo Marta naga dakapetege Jesus, odaa jegeetalo, “Iniwa-aagodi. Daga-aamitibige mokotaga, daganagawi-iini inaaginaga agotaga ye-ee. <sup>22</sup>Pida jowoogodi mokanicodaagica ane ipokitalo Aneotedogoji, odaa yajigotedagawa”. <sup>23</sup>Odaa jegeeteta Jesus, “Yewigatace ganaagina”. <sup>24</sup>Odaa Marta jegeetalo, “Jowoogodi me yewigatace nigica noko nige yewikatiditace Aneotedogoji nigina oko”.

<sup>25</sup>Odaa jegee Jesus, “Ee aneo oko me newigatace, odaa jigidaa diiticogi, midiokanaga limedi me newiga. Nigina ane idadiwagadi icaagica nige yeleo, pida yewigatace. <sup>26</sup>Nigina anelee yewiga, ane idadiwagadi, nige yeleo, yewigatace. De iwagati ida anejitagawa?” <sup>27</sup>Naga ninigodi Marta, meetalo, “Ejiwagadi, Iniwa-aagodi. Codaa gadadiwagati naga-aamaga-aami Nigicoa ane ni-iige Aneotedogoji meote godewiga, nigicoa Aneotedogoji Li-oonigi anenagi nigina i-iigo”.

### Jesus anoe

<sup>28</sup>Igaanaga nigotini Marta me dotaga, odaa jigigo enidita Maria. Odaa ja ixipetice me yotaganege meeta, “Goni-iigaxinogodi jiginoa. Codaa najoinagatedagawa”. <sup>29</sup>Igaanaga wajipata Maria nigijo Marta ligegi, odaa ja dinage me dabiditi, igo dakapetege Jesus. <sup>30</sup>Jesus anegenotediwece nigotakawaana, egidiaagite digoida anei Marta me dakapetege. <sup>31</sup>Nigijoa judeutedi anidiaagi Maria ligeladi monigiwatece, nogonadi me dabiditi me yediiga me noditice, odaa jogodioteci. Odiletibige Maria digigo anoetibece midataga lawimagajegi-wetiga anonaligite Lázaro.

<sup>32</sup>Igaanaga icoticogi Maria aneitedice Jesus, odaa ja dakagitinigi iigo midoataga logonaka. Odaa jegeetalo, “Iniwa-aagodi. Daga-aamitibige mokotaga, daganagawi-iini inaaginaga agotaga ye-ee”.

<sup>33</sup>Igaanaga nadi Jesus Maria me dacaagetibece, codaa nigijo judeutedi ane lixigagawepodi eledi nacaagagatelo, odaa Jesus deemitetetece, codaa agecagalo. <sup>34</sup>Odaa jegeetedio, “Igame analicitetiwaji?” Nogoninigodi, moditalo, “Goniotagodi. Diganagi, awini!” <sup>35</sup>Odaa Jesus jagaga anoe. <sup>36</sup>Odaa modi nigijoa judeutedi, “Ica mewi me yemaa ijoolatigi!” <sup>37</sup>Pida ica

eledi modi, “Icilatidi nigijo golaga. Pida agodagayakadi degeote anigetigida nimawenegegi, odaa ijoolatigi agotağa yeleo?”

### Ica Lázaro naga yewigatace

<sup>38</sup>Odaa Jesus agaleegica lita, eliodi me deemitetece. Odaa jigigo midataga nigijo wetiga-lawimagajegi anoyatice ijoolatigi. Onani aca wetiga nelegi anoyawililetio monibatoo nigijo lawimagajegi-wetiga. <sup>39</sup>Odaa ja diigenatakate Jesus, meetediogi, “Anogaaticetiwaji nagani wetiga nelegi”. Odaa Marta, nagajo niwaalo ijoolatigi meetalo, “Iniwa-aagodi, ejinaga danice. Igaataga jegeote cwaatolo nokododi midi me ye-ee”.



(João 11.41-43)

<sup>40</sup>Naga ninigodi Jesus, meeteta, “Genegejitagawa, nige iwagatakani, odaa jaganati Aneotedogoji meliodi nimawenegegi”. <sup>41</sup>Odaa jogonogatice nagajo wetiga nelegi. Naga iwitedibigimece Jesus ditibigimedi, odaa jegeeteta Aneotedogoji, “Eiodi, eliodi me iniotagodetagawa leegodi manajipaatiwa. <sup>42</sup>Jowoogodi midioka limedi manajipaatiwa. Pida mejitagawa leegodi nigina noiigi digoina, amaleegaga eniwagatakanaga nagakamagakaami anadimonyaa”. <sup>43</sup>Igaanaga nigotedini Jesus me dotaga, odaa ja dapaawe, mee, “Lázaro, anagi, anotitice!” <sup>44</sup>Odaa Lázaro ja noditice. Pida loḡonaka, libaagatedi egidaagee me dinilipaditece liwailidi lipegetege, codaa egajo me nadeegitice leenxo anoilipaditece latobi. Odaa jegeetediogi Jesus, “Anowilecenitibigetiwaji, odaa ikanitice epaagigo”.

**Nigijoa lacilodi judeutedi dinilakidetiwage odoletibige moyeloadi Jesus**  
(*Mateus 26.1-5; Marcos 14.1-2; Lucas 22.1-2*)

<sup>45</sup>Eliodi judeutedi anigotibeci odalita Maria nōgonadi Jesus meote Lázaro me yewigatace, odaa jogoyiwagadi. <sup>46</sup>Pida icaeledi jogopitibeci, odaa jigigotibeci oyelogoditiogi fariseutedi nigijoa loenatagi Jesus. <sup>47</sup>Odaa nigijoa anoiige sacerdotitidi ijaagijoa fariseutedi ja dinatecogotee, modi, “Amiida ica ḡonimawenegegi me joxokojogo? Igaataga nigijoa ḡoneleegiwa jogowidi ḡodoxicegetedi aneote. <sup>48</sup>Daga jikanaga nigida anee, inatawece oko icota moyiwagadi. Odaa nigijoa lacilodi romaanotedi doidetibige dogodiigenataka moyaagadi Aneotedogoji ligeladi, codaa moyaagadi ḡodoiigi”.

<sup>49</sup>Onijoteci nigijoa lacilodi ane liboonagadi Caifás ane enegegi ḡonegegi, meetiogi, “Agica ḡadixakeditiwaji! <sup>50</sup>Agowoogotitiwaji me dagaxa meletogodomi moniniteci ḡoneleegiwa ane yeleotema ḡodoiigi, odaa inatawece ḡodoiigi agalee naaga”. <sup>51</sup>Agepaa lowooko Caifás nigijoa lotaga. Pida Aneotedogoji eote meetece nigijoa notaga ane yelogodi micota Jesus me yeleotetema loiigi, igaataga Caifás joaniginiaa lacilo-sacerdotitidi nigijoa nicaagabi. <sup>52</sup>Nigijoa lotaga ageetalo Jesus daga yeleotetema idiokidi noiigi judeu, pida yeleo meote oniniteci lapo inoatawece lionaga Aneotedogoji ane ilaagiteloco inatawece iigo.

<sup>53</sup>Odaa nigijoa noko ja diiticogi nigijoa lacilodi judeutedi mowo lowoogotece Jesus moyeloadi. <sup>54</sup>Joanigidaa leegodi Jesus me dagadiaagawatedigi nigijoa noiigi digoida Judéia. Pida jigigo manitaga nigotakawaana anodita Efraim, anipegitege nipodigi ane yadilo ane digicata nigeladimigipi. Odaa jigidiaagite ijaagijoa anoditibece.

<sup>55</sup>Ja nipegiteloco nigijoa lalokegi judeutedi anodita me Páscoa. Eliodi oko ane ligeladi niginoa nigotadawaanaga, inoa nipodaga, ja waxoditibigimoace manitaga nigotaga Jerusalém. Anegeya me nakatio nalokegi nigigotibeci dinibinie lodoe Aneotedogoji, ane najoinaganegegi noiigi. <sup>56</sup>Odaa jogodoletibige Jesus, igaanogotiticogi Aneotedogoji ligeladi, odaa ja dinige, modi, “Amiida ica anakatitiwaji? Migenagi Jesus niite naloogo?” <sup>57</sup>Nigijoa anoiige sacerdotitidi, ijaagijoa fariseutedi domogoyemaa moniwilo Jesus. Joanigidaa leegodi me najoinaganaga mokanicodaagica ane yowoogodi aneite Jesus, odaa owo libodigi.

### Jesus idiaagite nigotakawaana Betânia

(Mateus 26.6-13; Marcos 14.3-9)

**12** <sup>1</sup>Aniaditibige seis nokododi daga nakatio nalokegi Páscoa, nigigo Jesus mani nigotakawaana Betânia ane ligeladi Lázaro, nigijo ane yewikatiditace Jesus. <sup>2</sup>Odaa jogoyoe liweenigi Jesus nigijo enoale modiniotagodelalo. Marta daxawanataka dedianagatece niweenigi. Lázaro eledi ini nameeja miniwataga Jesus. <sup>3</sup>Odaa Maria ja dibata aca bootawaana ane nolee ladokojegi, idatawece “nardo”, one dakake loojedi. Odaa ja yadotologo loḡonaka Jesus, igaanaga igodi me yadotologo, odaa yatita lamodi me iwilegi. Odaa nigijo lanigi aneletege nigijo ladokojegi jigigotigi initawece diimigi.

<sup>4</sup>Pida Judas Iscariotes, nigijo lionigi Simão, aninaagina ane-diotibece Jesus, nigijo aneyaa Goniotagodi nigidiaagidi miditaga nelogododipi, mee, <sup>5</sup>“Nagada bootawaana ladokojegi yalitini meyo-liitilo, codaa loojedi iniwatadagani taalia beexotedi. Igaamee dogoyaa, odaa nigicoa lojetedi oditogonediati niwace niginoda madewetedipi?” <sup>6</sup>Judas eo nigida ligegi aleegodi daga iwikode madewetedipi, pida leegodi molicegegi. Jegepaa dowediteloco dinyeelo, codaa doliketibigalo dinyeelo.

<sup>7</sup>Odaa jegee Jesus, “Jinagalomegeni Maria! Igaataga yotete nigida ladokojegi lajo nigica noko nigonaligiti yolaadi mida lawimagajegi-wetiga. <sup>8</sup>Niginoa madewetedi bigidioka limedi mina makaamitagatiwaji, pida Ee baadigidioka limedi minaagejo makaamitagatiwaji”.

### Odinilakidetigi moyeloadi Lázaro

<sup>9</sup>Eliodi judeutedi, nogodibodicetigi Jesus miniwatedigi Betânia, odaa jigigotibeci odoletibige. Agigotibeci digijoka leegoditeta Jesus, pida igotibeci magaga oiwi Lázaro, nigijo ane yewikatiditace Jesus. <sup>10</sup>Odaa nigijo anoiige sacerdotitedi jogodinotaganegetigi moyeloadi Lázaro. <sup>11</sup>Igaataga, leegodi Lázaro, eliodi judeutedi agaleegodeemitetigi nigijoa lacilodi, pida jigijapogoyiwagadi Jesus.

### Jesus dakatediwece nigotaga Jerusalém micataga inionigi-eliodi.

(Mateus 21.1-11; Marcos 11.1-11; Lucas 19.28-40)

<sup>12</sup>Naga nigoi, nigijo noiigi-nelegi ane igotibeci lalokegi Páscoa, jogodibodicetege Jesus naga ipegite nigotaga Jerusalém. <sup>13</sup>Odaa jogodibatalo laamotiidi “palmeira”, ja noditicoaci migotibeci odakapetege, napaawagateloco, modi,

“Jogeeगतalo Aneotedogoji.

Codaa jemaanaga Aneotedogoji me ibinie Niginoa anenagi ane ibake nagatetigi Liboonagadi Goniotagodi Aneotedogoji, Niginoa ane ninionigi-eliodi ḡodoiigi Israel”.

<sup>14</sup>Odaa Jesus ja dakapetetege icoda boliicawaanigi, odaa ja waxoditedeloco. Jotigide nagakaageeta Aneotedogoji lotaga nigida niciagi,

15 “Jinagadoiitiwaji,  
 anakaami nigeladimigipitigi nigotaga Jerusalém.  
 Digawinitege!  
 Ganinionigi-eliodi jegenagi,  
 waxoditedeloco boliicawaanigi”.

16 Igaanaga onaditege nigijo anodiotibece, agoyowoogodi nigica anodaa diitigi nigida anee Jesus. Pida nigidiaagidi nogopitedibigimece Jesus ditibigimedi, oada jogonalagatibige nigijoa aneeta Aneotedogoji lotaga, codaa aagaga onalagatibige nigijoa anodigotalo nigijo noiigi.

17 Nigijo noiigi-nelegi anidiaagite midoataga Jesus nigijo negeniditedibige Lázaro midataga lawimagajegi-wetiga naga yewikatidi, joanegepaa oyatematitibece nigida niciagi. 18 Codaa joanigidaa leegodi nigijo oko naga noditicoaci nigotaga, migotibeci odakapetege Jesus, leegodi modibodicetibige meote nigijo godoxicegedi nelegi. 19 Odaa nigijoa fariseutedi ja dinotaganege midiokiditiwage, modi, “Digawini! Agica ica godoenatagi me domaga jaoga ane beyagitema nigida libakedi. Inatawece oko jogodiotece.”

#### Icoa greegotedi igotibeci oiwi Jesus

20 Liwigotigi nigijo oko ane igotibeci nigotaga Jerusalém modogetetalo Aneotedogoji midi naloogo, idiwa icoa greegotedi. 21 Odaa jigigotibeci odakapetege Filipe, anelatibige nigotaga Betsaida, nipodigi Galiléia. Odaa jogodipokota modita, “Goniotagodi, jemaanaga me jinataga icoa Jesus”.

22 Odaa Filipe jigigo eeta André, oada jigigotibeci oditalo Jesus. 23 Naga ninigodi Jesus, meetediogi, “Jigicota noko Aneotedogoji me idinelecatagee, Ee, Goneleegiwa ane jigogotibigimece ditibigimedi. 24 Atacolitece anejitagawatiwaji! Nige dogoyokoletinigi iigo lolagi leyeema, codaa nige dogoyati nagajo lolagi, oada lolagi idioka limedi mokanitece. Pida nagajo lolagi nigonalignitini, oada ja yajigo eliodi leyeema. 25 Nigina ane dagaxa me yemaa me yewigateloco nigina iigo, nigini baadaga yemaa me niotici, codaa icota maniaditema lewiga. Pida nigina ane daga ewianaga yecewe me yewigateloco nigina iigo, baaniginiaagini idioka limedi me yewiga. 26 Nigina ane yemaa me dibatomi, leeditibige me niotici. Odaa anejote jigidiaagaga ite. Odaa Eiodi iwenigide nigina ane dibatomi”.

#### Jesus yalagate ica lemegegi

27 Egidaa diitigi Jesus me notaganegetediniwace, meetediogi, “Nigina natigide ja jogowikomata. Ajowoogodi ica anejatigi igegi. Ajakadi daga jipokotalo Eiodi degeote me idiwoko yawikodigi anicota, leegodi jigidaa ibakedi me janagi”. 28 Odaa jegee Jesus, “Eiodi, ikeenitiogi nigina oko meliodi ganimawenegegi”. Odaa jigijo nigege ane icogotibigimece ditibigimedi, mee, “Jigijo me jikeetiogi meliodi inimawenegegi, codaa ejikeetaciogi”.

29 Nigijo noiigi-nelegi owajipata nigijo nigege. Odaa ijo anodi me niximagaga. Idiaa eledi modi me aanjo yotaganege Jesus.



<sup>30</sup>Naga ninigodi Jesus, meetediogi, “Nigijo nigegi agee leegodi, pida leegodi akaamitiwaji. <sup>31</sup>Jigicota noko Aneotedogoji me iwi codaa iloikatidi oko leegodi libeyacegeco, codaa me iticoitedice diaabo, nigijo ane iige oko anida aneetege nigina iigo. <sup>32</sup>Igaataga nigetidawacetibige madataga nicanaganagate, odaa ja jao moniitiwa eliodi oko inatawece iigo, jaotibige mida lewiga ane digica liniogo miniwataga Aneotedogoji.” <sup>33</sup>Jesus eote nigijoa lotaga onidaagida me ikee anodaagee me yeleo.

<sup>34</sup>Nogoninigodi nigijo noiigi-nelegi, moditalo, “Etigodiigaxitece me iwoteloco notaganagaxi midiwataga gonajoinaganegeco, icoa Cristo, ane niige Aneotedogoji, midioka limedi miniwa mokotaga. Enige igamodaagee ina meni me leeditibige ica Goneleegiwa ane icogotibigimece ditibigimedi monawacetibige mada nicanaganagate? Amiijo ica Goneleegiwa ane icogotibigimece ditibigimedi?”

<sup>35</sup>Naga ninigodi Jesus, meetediogi, “Nagajo lokokena onatecigidiwa nokododi minaagite makaamitagatiwaji. Awaligitiwaji maleegani lokokena me daga nikatiwagaji nexocaga. Nigina anewaligitigi nexocaga ayowoogodi nigica ane diiticogi. <sup>36</sup>Nigina maleegani lokokena, iwagati lokokena ane Ee, amanagawini akatitiwaji makaami lionigipi Aneotedogoji”.

### **Judeutedi agoyiwagadi Jesus**

Nigidiaagidi naga nigotedini Jesus me dotaga, odaa jogopi, ja dinagaditetema nigijo noiigi-nelegi. <sup>37</sup>Idaagee negeliodi monadi Jesus meote godoxicegetedi, pida idokee agoyiwagadi. <sup>38</sup>Joanigidaa nigicotece nigijoa lotaga Isaiás, nigijo ane yelogoditedibece lowooko Aneotedogoji, nigijo mee,

“Iniotagodi Aneotedogoji.

Agica aneyiwagadi godatematiko.

Codaa agica anigetigijo anikeenita ganimawenegegi.”

<sup>39</sup>Codaa agoyakadi degeniwagatakanaga, leegodi eledi mee Isaiás,

<sup>40</sup>“Aneotedogoji ja noxoco ligecoogeli me dagadiaa yatetibigiwaji, codaa yakakagadi laalegenali me dogoyowoogodi ane diitigilo lotaga, codaa me dogodopitalo me nicilatiditediniwace.”

<sup>41</sup>Mee Isaiás nigijoa lotaga nigijo naga yowoogodi Jesus me dagaxa me gonegegi, odaa ja yalagatalo.

<sup>42</sup>Idaagida meliodi anoyiwagadi Jesus nigijoa lacilodi judeutedi.

Pida agica daga dinelogotee moyiwagadi leegodi odoitiogi fariseutedi dogoiticogiticoace wetice niiakanagaxiidi. <sup>43</sup>Domogoyemaatibige digidioka odeemitetibige nigina oko. Odaa agotigica moyocaganegge Aneotedogoji.

### **Lotaga Jesus iwi anodaagee lewiga oko**

<sup>44</sup>Nigidiaagidi Jesus dinigetagatee, mee, “Nigina ane idadiwagadi, agemokee me idadiwagadi, pida aagaga eyiwagadi Nigijoa ane idimonyatedinigi nigina

iigo. <sup>45</sup>Nigina ane idadi aagaga nadi Nigijoa ane idimonya. <sup>46</sup>Janagi nigina iigo me Ee lokokena, jaotibige minatawece anetidadiwagadi agideiticoace nexocaga. <sup>47</sup>Nigica ane wajipatalo yotaga, pida ageyiwagadi, anigica anejigota nigina natigide. Igaataga anaga janagi daga jiwi anejigota oko, pida janagi me jao lewiga oko. <sup>48</sup>Nigina ane daga dibatigi, codaa ane daga dibatege yotaga, jigini ane iwi anodaagigota. Niginoa yotaga joaniginaa anoiwi anodigota nigicota nigica owidijegi noko. <sup>49</sup>Igaataga agica degemaga yolaadi me jotaga, pida Eiodi idimonya. Odaa jiginiaa idiige meji nigina ane leeditibige me igegi. <sup>50</sup>Jowoogodi nigina liigenatakanegegi me yajigota oko lewiga ane dagadiaagica liniogo miniwataga. Ejitece inokinoateda niginoa Eiodi ane niigetediwa me jelogodi”.

### Jesus iwilegi logonaka nigijo anodiotibece

**13** <sup>1</sup>Naga nipegi lalokegi judeutedi anodita me Páscoa. Jesus ja yowoogodi naganipegi me noditedicogi nigina iigo migo miniwataga Eliodi. Idioka limedi me yemaa nigijo ane nepilidi, maleeginaagite digoina iigo, codaa me yemaa negepaagicota noko me yeletetema.

<sup>2-3</sup>Diaabo ja dakatiwece laalegena Judas Iscariotes, nigijo lionigi Simão, ixotiwewece lowoogo me yajigo Jesus modibatalo nelogododi. Jesus yowoogodi Eliodi me yajigote nagatetigitedeloco inoatawece. Codaa yowoogodi me icogotedigi miniwataga Aneotedogoji codaa mopitedibigimece miniwataga Aneotedogoji.

Odaa Jesus ijaagijo anodiotibece naga niataga me niodaga nigijo enoale. <sup>4</sup>Odaa ja dabiditedini Jesus, ja yototedice nagajo nameeja, odaa ja noga nijayogo. Naga dibate aca toaaya, odaa jaganigoetedigi. <sup>5</sup>Nigidiaagidi ja yadotedinigi ninyogodi ica baxia. Odaa ja niwilegitedini logonaka nigijo anodiotibece, eote ane libakedi nigina niotagi. Igaanaga igodi me iwilegi, odaa ja yatite nagajo toaaya.

<sup>6</sup>Igaanaga icote Simão Pedro, odaa jegeetalo, “Iniotagodi. Ayakadi daantagakamagakaami ane iwilegi igonaka.” <sup>7</sup>Naga ninigodi Jesus, meeteta, “Nigina natigide agowoogoti ane diitigi nigida anejigotagawatiwaji. Pida icota mowoogoti nigidiaagidi”. <sup>8</sup>Odaa jegeetalo Pedro, “Iniotagodi. Ica daga jikatedagadici me iwileci igonaka”. Naga ninigodi Jesus, meeteta, “Nige digikaniteda me jiwilegi gadogonaka, odaa agaleegica anenitigi”. <sup>9</sup>Odaa jeege Simão Pedro, “Iniotagodi, dice jinigidokidoateda igonaka me iwileci, pida iwileci ibaagatedi, codaa me yacilo!”

<sup>10</sup>Naga igidi Jesus, meeteta, “Nigijo baanaga igo mánila ja yapidi, odaa idoka leeditibige logonaka me iwilegi. Nigida makaami gadapititiwaji, pida ini oniniteci ane daga yapidi nigina akaamitiwaji”. <sup>11</sup>Jesus yowoogodi nigijo ane yajigo modibatalo nelogododi. Joanigidaa leegodi mee, “Ini oniniteci ane daga yapidi nigina akaamitiwaji.”

<sup>12</sup>Igaanaga igodi Jesus me niwilegitedini logonaka nigijo anodiotibece, odaa ja dinixotacedinigi nijayogo. Odaa jigigotace nicotedini maditaga nameeja. Odaa



(João 13.6-10)

ja nigetediniwace, meetediogi, “Owoogoti anodaa diitigi ijo anejigotagawatiwaji? <sup>13</sup>Adadalitigitiwaji me Ee, ‘Ganiigaxinogodi’, codaa me Ee, ‘Ganiotagodi’. Odaa diitigi anadadalitigitiwaji, igaataga jegemegee. <sup>14</sup>Odaa Ee, ane Ee Ganiotagodi, Ganiigaxinogodi, ja jiwilegi gadogonakatiwaji. Joanigidaa leeditibige me eni madinigiwaatiwagetiwaji miwileci gadogonaka. <sup>15</sup>Ja jao gawinigi, amaleegaga idoka enitatiwaji madinigiwaatiwage. <sup>16</sup>Atacolitece anejitagawatiwaji! Nigina nimeedi anagaxateloce niotagodi leegodi gonegegi. Codaa nigina ane yadeegi nibodigi anagaxateloce nigini ane iige anepaga gonegegi. <sup>17</sup>Nigowoogotitiwaji niginoa anejitedagawa, codaa nigawiite, odaa eliodi gadinikegitiwaji.

<sup>18</sup>Agejitagadici akaamitawecetiwaji. Igaataga jowoogoditibige nigijoa iomagataka. Codaa icota nigijo aneeta Aneotedogoji lotaga, mee, ‘Nigijo ane igiiwatibece me jiniodi, jigijaa analee yakapetegi’. <sup>19</sup>Ejitagawatiwaji nigina natigide, maleedaga icota, amaleegaga nigicota, odaa jagadadiwagatitiwaji makaagee, codaa midioka limedi me Ee. <sup>20</sup>Atacolitecetiwaji nigida anejitagawa. Ane dibatege nigina ane jiige, aagaga dibatigi. Codaa ane dibatigi, aagaga dibatege Nigijoa ane idimonyatedinigi nigina iigo”.

**Jesus ikee nigica ane yajigo modibatalo nelogododi**  
(Mateus 26.20-25; Marcos 14.17-21; Lucas 22.21-23)

<sup>21</sup>Nigidiaagidi naga nigotedi nigijoa Jesus lotaga, odaa ja dogowikomata, odaa yenikamaga meetediogi, “Atacolitecetiwaji anejitagawa. Ini nigina akaamitiwaji ane idajigo modibatiwa inelogododipi”.

<sup>22</sup>Odaa nigijo anodiotibece ja diniwi, nawelatibigiwaji, agoyowoogodi ane diitigi nigijo aneeteta Jesus. <sup>23</sup>Nigijo ane lemaanigi Jesus ini me ipegitetege, dawaketelogo. <sup>24</sup>Odaa Simão Pedro ja yotaganege yatita libaagadi, dipokota me igetece Jesus ganigepitigijo ica aneeteta me yajigo midi nelogododipi.

<sup>25</sup>Odaa nigijo ane-diotibece lemaanigi ja dawaketeloco elipije Jesus, odaa ja ige, oxati meetalo, “Iniotagodi. Amiijo ica anenita?” <sup>26</sup>Naga ninigodi Jesus, meeteta, “Nigini ane jajigota paon liwai ane itimi, joaniginiaa idajigo.” Odaa Jesus ja dibate paon liwai, naga ititedinigi ica niweenigi liwagedi, odaa ja yajigote Judas, lionigi Simão Iscariotes. <sup>27</sup>Igaanaga dibatege Judas nigijo paon, odaa Satanás ja dakatiwece laalegena. Odaa Jesus jegeeteta Judas, “Nigica anigida ane eni me gadoenatagi, adinageni mawii”. <sup>28</sup>Nigijo anidiaagi maditaga nameeja, agica ane yowoogodi ane leegodi Jesus meote nigijo ligegi. <sup>29</sup>Judas jigijaa doweditelogo dinyeelo. Joanigidaa modiletibige daga iige Jesus migo dinoojetetigi anigetigica anoyopotibige me naloogo, migetaga nediatiwace madewetedi beexotedi.

<sup>30</sup>Naga dibatege Judas nigijo paon liwai, odaa ja dinagetice me noditice. Pida jegenoaale.

**Ica gela niigenatakanegegi**

<sup>31</sup>Nigijo naga noditice Judas, odaa jegee Jesus, “Nigina natigide jogonelecagatee Goneleegiwa ane icogotibigimece ditibigimedi, ane Ee, codaa odogetetalo Aneotedogoji Ee leegodi. <sup>32</sup>Nigodogetetalo Aneotedogoji Ee leegodi, odaa iniaaginiwa Aneotedogoji nelecagatee Goneleegiwa ane icogotibigimece ditibigimedi, ane Ee. Aneotedogoji eote nigida aneete natigidawaanigi.

<sup>33</sup>Ionigipi. Agalee leegi minaagejo makaamitaga. Icota moleetibigijitiwaji. Pida ejitagawatiwaji natigide nigijo ane igegitiogi nigijoa lacilodi godoiigi judeutedi me dagakatitawaji memii ane jiiiticogi. <sup>34</sup>Natigide jajigotagawatiwaji gela ganiigenatakanegegi, madinemaanitiwagetiwaji. Digo aneji me gademaanitiwaji, gadiigeni magaga adinemaanitiwage. <sup>35</sup>Nigadinemaanitiwage, inatawece oko oyowoogodi makaami nigina anonitici”.

**Jesus eote leemidi Pedro**

(Mateus 26.31-35; Marcos 14.27-31; Lucas 22.31-34)

<sup>36</sup>Odaa Simão Pedro ja ige Jesus, meetalo, “Iniotagodi. Igame aaticogi?” Naga ninigodi Jesus, meeteta, “Nigina natigide, agakati degemii ane jiiiticogi. Pida nigidiaagidi icota memii”. <sup>37</sup>Naga igetace Pedro, meetalo, “Iniotagodi. Igaamee ica daga jakadi mejigo jiotagadici ina natigide? Ja

idigo me ideleotagadomi”. <sup>38</sup>Naga igidi Jesus, meeteta, “Migewi naga gadigomi me gadelewitomi? Jemaa mejitagawa anewi. Anigicatibige daga dinici okogokoodi manoe, odaa itoatadigida meni me dagadowoogoti”.

### Jesus naigi anigo miniwataga Aneotedogoji

**14** <sup>1</sup>Odaa jegeetediogi Jesus, “Jinagakaami agecagalodipi, codaa jinaga agowikomataatiwaji. Pida anakatoni Aneotedogoji. Eeeledi adinakatoni. <sup>2</sup>Igaataga digoida ligeladi Eiodi idiwa owidi diimaga. Dagaletigidaagee daganagawini akaagejitagawatiwaji. Odaa ejigo jilakidetagadomitiwaji ane onite. <sup>3</sup>Igaanige ejigo jilakidetini ane onitetiwaji. Odaa nige jigodi, odaa ja idopitacijo me gadadeegitiwaji, amaleegaga anejote, jigidiaagaga onitetiwaji. <sup>4</sup>Jogowoogotitiwaji ane jiiiticogi, codaa jogowoogoti naigi ane gadadeegiticogi digoida ane jiiiticogi”. <sup>5</sup>Odaa jegeetalo Tomé, “Iniotagodi, ajowoogotaga ica ane aaticogi. Codaa, igamaleegaga gonimawenegegi me jowoogotaga ica naigi?” <sup>6</sup>Naga ninigodi Jesus, meeteta, “Ee jegemegee naigi ane gadadeegitalo Aneotedogoji, Ee anewi aneetece Aneotedogoji, codaa jegemaga jao lewiga oko. Agica ane yakadi micotalo Eiodi, nige daga Ee jadeegitalo. <sup>7</sup>Nigadowoogotitiwaji, odaa Eiodi aagaga owoogoti. Odaa nigina natigide jogowoogoti codaa jaganati Eiodi.” <sup>8</sup>Odaa Filipe jegeetalo Jesus, “Goniotagodi, enice anikeenitedogowa icoa Gadiodi. Odaa jogokomoda ele”. <sup>9</sup>Naga ninigodi Jesus, meeteta, “Filipe. Ja jotigide me Ee makaamitagatiwaji. Anagadowoogoti? Nigina ane idadi, odaa nadi Eiodi. Enice, igaamee ina menitiwa, ‘Anikeenitedogowa icoa Gadiodi?’ <sup>10</sup>Agiwagatakani mejotelogo Eiodi, codaa Eiodi miniwa meetaga?” Odaa jegeetediogi Jesus nigijo anodiotibece, “Niginoa anejitedagawatiwaji, agejitece emegee. Pida Eiodi aniniwa meetaga, joanegepaageote libaketedi. <sup>11</sup>Leeditibige me iwagatitiwaji me idejo miniwataga Eiodi, codaa Eiodi miniwa meetaga. Nige daga iwagatakanitawaji leegodi niginoa yotaga, enice iwagatakani leegodi nigijoa godoxicegetedi ane jaote. <sup>12</sup>Natigide atacolitecetiawaji nigida igegi. Nigina ane idadiwagadi icota meote niginoa ane jaote, codaa icota meote loenataka ane dagaxa me eloodoli, igaataga ja jopitalo Eiodi. <sup>13</sup>Odaa jao okanicodaagica ananipokitiawatiwaji nigina mabakeni Iboonagadi, amaleegaga ane Ee, Lionigi Aneotedogoji, inelegatidi Liboonagadi Eiodi. <sup>14</sup>Niganipokitiwa mabakeni nagatetigi Iboonagadi okanicodaagica, odaa jajigotagawatiwaji ane gadipoketegi.

### Aneotedogoji niwakatee Liwigo

<sup>15</sup>Nigademaanitiwaji, enice iwagati niginoa iigenatakanegeco. <sup>16</sup>Jipokotalo Eiodi me yajigotedagawa eledi Ganaxawanatitogodi, anidioka limedi mini makaamitagatiwaji. <sup>17</sup>Joaniginia Niwigo ane ikee anewi nigina moyalagatiwa. Nigina okotigi digoina iigo ayakadi dogodibatege, igaataga agoyakadi dogonadi, otegexaagaga oyowoogodi. Pida akaamitiwaji bogowoogoti igaataga ini makaamitaga, codaa icota me digeladetiawaji.

<sup>18</sup>Agadalatitiwaji dogodaa micataga dagakaami exiijigipi. Pida idopitacagawatiwaji. <sup>19</sup>Agalee leegi nige ideleo, odaa nigina okotigi digoina iigo agaleegetidadi. Pida agica daga leegi akaamitiwaji bagadati. Leegodi nige idewigatace, odaa jagaga gadewikitace. <sup>20</sup>Nigicota noko nige idewigatace, odaa jogowoogotitiwaji me emoka Ee me idexogotege Eiodi, codaa akamokakaamitiwaji me gadexocitigi, codaa me emoka Eeta me idexogotagagitiwaji.

<sup>21</sup>Nigina ane dibatege codaa meyiwaḡadi iigenatakanegeco, joaniginiaa idemaa. Odaa Eiodi aagaga yemaa nigina ane idemaa. Codaa Ee aagaga jemaa, codaa me idinikeeta ane Ee.”

<sup>22</sup>Odaa Judas, agijigijo Judas Iscariotes, pida eledi Judas, ige Jesus, meetalo, “Goniotagodi, igamodaageeta ica madinikeenitogowa, nige dagadinikeenitogi ina eledi oko digoina iigo?” <sup>23</sup>Naga ninigodi Jesus, meeteta, “Nigina ane idemaa eyiwaḡadi niginoa yotaga, codaa Eiodi yemaa nigina ane idemaa. Ee iniaa Eiodi janagaga me ḡonoigiwa.

<sup>24</sup>Nigina ane daga idemaa, aḡeyiwaḡadi yotaga. Codaa niginoa notaga anajipaatalotiwaji, aḡemaga yotaga, pida lotaga Eiodi ane idimonya.

<sup>25</sup>Ejitedagawatiwaji niginoa yotaga maleeḡeetibige makaamitaga.

<sup>26</sup>Pida Nigina Ganaxawanatitogodi, Aneotedoḡoji Liwigo, ane niwakatee Eiodi leegodi Iboonagadi, ḡadiḡaxinitecetiwaji inoatawece, codaa eo manalakitibige ijoatawece nigijoa anejitedagawatiwaji.

<sup>27</sup>Jaote mele ḡadaalegenalitiwaji. Joanigidaa ane jaotagadomi. Aneji me jaotagadomitiwaji aliciagi anee nigina oko anida aneetege nigina iigo. Odaa jinagakaami aḡecagalodipi, jinagagowikomataa, codaa jinagadoiitiwaji.

<sup>28</sup>Jagajipaatalotiwaji nigijoa mejitagawa mejigo, pida idopitagawatiwaji. Nigina nigademaanitiwaji enice aniniitibeci leegodi mejitagawa me jopitalo Eiodi.


Eiodi dagaxa meliodi nimaweneḡegi, aiciagi. <sup>29</sup>Ejitedagawa niginoa yotaga, maleedaga icotalo niginoa anejitece, amaleegaga adadiwaḡatitiwaji nige limedi me icotece niginoa anejitedagawa. <sup>30</sup>Aleegi me ḡadotaganegenitiwaji, igaataga nigijoa ane iige oko digoina iigo jigina menagi. Enagi me dakapetigi, pida agica nimaweneḡegitici. <sup>31</sup>Pida amaleegaga oyowoogodi nigina oko digoina iigo me jemaa Eiodi, odaa jaote inoatawece ane niḡetediwa. Xebatiwaji, adabititiniwace, jopilaga!”

### Jesus diniciaceeketege libatadi “uuva”

**15** <sup>1</sup>Odaa jeḡee Jesus, “Ee idiniciaceeketege nigina libatadi ‘uuva’.  
<sup>2</sup>Odaa Eiodi бага liciagi nawodaganaga jeḡepaa doweditedeloco elanigije ‘uuva’.  
<sup>3</sup>Nakagidi inoatawece libiwedi ane deḡetayeteda. Ibinie inoatawece libiwedi anepaga etaye, eotedibige mepaanaga dáwe.  
<sup>4</sup>Nigida makaamitiwaji ja ḡadapiti leegodi me iwagati niginoa yotaga anejitedagawa.  
<sup>5</sup>Ele midioka limeditiwaji me gadexocitigi, odaa Ee idiokaanaga limedi me idexogotagagitiwaji. Nagana libiwe idoka etaye nigalee yexogotege nagada

libatadi ‘uuva’. Jigidaagenitiwaji, idoka akati me áwe nige gadexocitigi.

<sup>5</sup>Ee libatadi ‘uuva’. Odaa akaamitiwaji libiwedi. Nigina anidioka limedi me yexogotigi, Ee aagaga idexogotege, codaa joaniginiaa ane dáwe. Igaataga nige daga gadexocitigitiwaji, odaa agica anakati mawii. <sup>6</sup>Nigina ane daga yexogotigi, joaniginiaa oyaladiticogi we, yadilo micoataga niginoa niale libiwedi anoiladie, odaa jogoyokoletiogi noledi moyalegi. <sup>7</sup>Nigidioka limedi me gadexocitigitiwaji, codaa nigidioka limedi mowoo yotaga, anipokitiwa nigica anemaani, odaa jaotagadomitiwaji. <sup>8</sup>Odogetetalo Eiodi, nigina nige áwetiwaji. Odaa jagakaami nigina anoniotici.



(João 15.1)

<sup>9</sup>Ja gademaanitiwaji digo anigotediwa Eiodi me idemaa. Idoka enitatiwaji midioka limedi me gadexocitigi amaleegaga jikee me gademaanitiwaji. <sup>10</sup>Nigina nigoteteni iigenatakanegeco, odaa idioka limedi me jikee me gademaanitiwaji, digo aneji me jotete liigenatakanegeco Eiodi, odaa idioka limedi me idemaa.

<sup>11</sup>Jegejitedagawatiwaji niginoa yotaga amaleegaga itiwagaji inikegi, odaa eliodi gadinikegitiwaji. <sup>12</sup>Joanigidaa iigenatakanegegi, madinemaanitiwagetiwaji, digo anejigotagawa me gademaani. <sup>13</sup>Agica ane dagaxa me yemaa lokaagetedipi, daga liciagi nigina ane yeleotema lokaagetedipi. <sup>14</sup>Akaami yokaagetedipi nigawii nigina ane jiigetagawa. <sup>15</sup>Agejitagawa makaami iotagipi, igaataga nigina niotagi ayowoogodi nigica aneo nigini niotagodi. Pida ejitagawatiwaji makaami yokaagetedipi leegodi jegejitedagawatiwaji ijoatawece aneetediwa Eiodi.

<sup>16</sup>Anagakamaga adiolaaticetiwaji, pida Ee gadiolaatice, odaa ja gadiomagatiticoace jaotibige memii, codaa me áwe, odaa niginoa gatá abeyagi. Joanigidaagee, Eiodi yajigotedagawatiwaji inoatawece ane ipokitibige, nigina me abakeni Iboonagadi. <sup>17</sup>Joanigidaa me gadiigenitiwaji madinemaanitiwage.

### **Oko anida aneetege nigina iigo nelegetedi nigina anodiotibece Jesus**

<sup>18</sup>Nigakaami nelegetedipi nigina oko anida aneetege nigina iigo, analakitibigetiwaji me Ee odoejegi me Ee nelegedi. <sup>19</sup>Igaataga digida anenitegetiwaji nigina iigo, daganagawini nigina oko etigademaani, igaataga inoka oyemaa nigina ane nebi, anida aneetege nigina iigo. Pida ja gadiomagatiticoace liwigotigi nigina oko, gadixipeniticoace, odaa agaleegica anenitege. Joanigidaa leegodi makaami nelegetedipi. <sup>20</sup>Analakitibige nigijo mejitagawatiwaji, nigina nimeedi anagaxateloce niotagodi. Odaa nigina



oko anida aneetege nigina iigo nigetidiatetibeci, odaa akaami aagaga etigadiatenitibece. Dogoyotete yotaga, odaa tagaga oyotete gadotagatiwaji. <sup>21</sup>Pida leegodi mida anenitigi jigidaa midogodigotagawatiwaji, igaataga agoyowoogodi Nigijoa ane idimonya. <sup>22</sup>Nigina daaditaga janagi, jelogoditogi, agotigica libeyacegegi ane yelogo. Pida nigina natigide agaleegica oko ane yakadi me yagaditini libeyacegegi. <sup>23</sup>Nigina ane Ee lelegedi, aagaga lelegedi Eiodi. <sup>24</sup>Nigina daaditigicoateda godoxicegetedi ane jaote lodoe, ane digica ane yakadi meo licigi, odaa niginoa loenataka ane beyagi agotaga yelogo. Pida nogonadi godoxicegetedi ane jaote, odaa jogoyelatomi, codaa Eiodi moyelatema. <sup>25</sup>Pida mina jigidaagee, icota nigijo ane diniditeloce notaganagaxi midiwataga niigenatakanegeco, nigijo anee, 'Agica ane leegodi moyelatomi'.

<sup>26</sup>Nigijo Ganaxawanatitogodi, Aneotedogoji Liwigo, icota meno, odaa begewi me ikeetagawa anodaageji nigina moyalagatiwa, icogotibigimece miniwataga Eiodi. Jinimonyatagawatiwaji, icogotibigimece Eiodi. Odaa nigeno, jegeetece anodaageji. <sup>27</sup>Odaa akaamitiwaji jagaga enitece anodaageji, leegodi makaamitiwaji meetaga, nigijo maleekoka gadiomagatiticoace, codaa nigina natigide.

**16** <sup>1</sup>Ejitedagawatiwaji niginoa yotaga jaotibige me daga amigiticoace. <sup>2</sup>Etigaditicoiticoace wetice niiakanagaxiidi. Codaa icota noko, nigina anetigadeloati odiletibige dogowo libakedi Aneotedogoji. <sup>3</sup>Odaa jigidaagodigotagawatiwaji leegodi agoyowoogodi Eiodi, codaa Ee agetidowoogodi. <sup>4</sup>Pida ejitedagawatiwaji niginoa yotaga amaleegaga nige icotece, odaa jaganalakitibigetiwaji mijo me jao gadeemidi.

### Ica ane libakedi Aneotedogoji Liwigo

Nigijo maleekoka idinojocagatini me jibaaga agica degejitedagawa niginoa yotaga, leegodi maleegeetibige makaamitagatiwaji. <sup>5</sup>Pida nigina natigide ja jopitalo ane idimonya. Pida agica nigina akaamitiwaji ane idigetece ica ane leegodi mejigo. <sup>6</sup>Pida jagakaami agecagalodipi leegodi me jao gadeemidi. <sup>7</sup>Ejitagawatiwaji anewi. Dagaxa mele mejigo, igaataga daaditaga ejigo, odaa Ganaxawanatitogoditiwaji agenagi. Pida nigejigo odaa ja jinimonyatagawatiwaji.

<sup>8</sup>Nigina nigenagi, odaa ja ikeetiogi nigina oko anodaagee nibeyacegeco, codaa ane igenaga, codaa Aneotedogoji me laagetedipi nigina oko leegotedi loenataka ane beyagi. <sup>9</sup>Codaa ikeetiogi nigina oko minoa libeyacegeco, leegodi me degetidadiwagadi. <sup>10</sup>Eledi ikeetiogi ane igenaga, leegodi jegejigo miniwataga Eiodi, odaa agaleege madatitiwaji. <sup>11</sup>Codaa aagaga ikeetiogi Aneotedogoji me laagetedipi nigina oko leegotedi libeyacegeco, leegodi ja laagedi nigijo ane iige oko digoina iigo.

<sup>12</sup>Eginoa owidi ane domegejitedagawatiwaji, pida agabootegetiwaji dagajipaatalo eletidi yotaga nigina natigide. <sup>13</sup>Pida nigenagi Aneotedogoji Liwigo, ane ikee anewi me yalagatiwa, ikeetedagawatiwaji inoatawece niginoa anepewi. Adotaga degepaa lolaadi, pida eetece

nigica anagaga lajipakegi. Yatematitedagawatiwaji niginoa ane icota manati. <sup>14</sup>Eo modogetetiwa nigina oko, leegodi yelogoditagawatiwaji nigina ane jajigota, ane jema me igegitagawa. <sup>15</sup>Inoatawece ane nepilidi Eiodi, aagaga inepilidi. Joanigidaa meji, Liwigo Aneotedogoji dibatege niginoa yotaga ane jajigota, oada jagaga yelogoditedagawatiwaji.

**Nigijo anodiotibece agecagalodipi, pida nigidiaagidi ninitibigiwaji**

<sup>16</sup>Natigidawaanigi agaleege madatitiwaji. Pida nigidiaagidi icotace madati. Igaataga jegejigo miniwataga Eiodi”.

<sup>17</sup>Oada onica nigijo anodiotibece ane dinotaganege midiokiditiwage, modi, “Amiida ica ane diitigi ijo ligegi meetedogowa me natigidawaanigi oada agaleegicoa me jinataga, oada aleegi ja jinatagatace, eleditace nigina meetedogowa me leegodi nigigo miniwataga Eliodi?” <sup>18</sup>Oada ja dinotaganegetace idiokiditiwage, modi, “Igame diitigi ica ligegi ijo mee, ‘Nigidiaagidi’? Ajowoogotaga aneyatedigi ica ligegi”.

<sup>19</sup>Jesus yowoogodi modoletibige moige, oada jegeetediogi, “Jegejitagawatiwaji natigidawaanigi agaleege madati, pida nigidiaagidi icotace madati. Jowoogodi me domaga agikanitecetiwaji nigica anodaa diitigi nigida igegi. <sup>20</sup>Ejitagawatiwaji nigina anewi. Nigida makaami icota manoenitiwaji, codaa makaami agecagalodipi, pida inigina nigina oko anida aneetege nigina iigo бага ninitibigiwaji. Akaami agecagalodipi, pida nigidiaagidi aniniitibecitiwaji. <sup>21</sup>Gadiciagitiwaji macataga nagana iwaalo naga nipecti me dinigaje, oada jagagecagalo, igaataga jigicota noko lawikodigi. Pida nige dinigaje, oada agalee nalagatibige nigijo lawikodigi. Pida ja ninitibece leegodi naga dinigajetece nigaanigawaanigi. <sup>22</sup>Jigidaagenitiwaji makaami agecagalodipi. Pida nigidiaagidi nigadatitacitiwaji, oada jaganiniitibeci. Codaa agaleegica ane yakadi daga nogatice gadinikegitiwaji.

<sup>23</sup>Nigicota nigica noko me jopiticogi miniwataga Eiodi, oada agalee leeditibige madigee. Ewi nigida anejitagawatiwaji. Nigabakeni Iboonagadi mipokita okanicodaagicata anemaani, oada jigidiaa yajigotedagawa Eiodi. <sup>24</sup>Codaa natigide anigica daga atikani Iboonagadi me ipokitalo Eiodi. Ipokitalotiwaji Eiodi, oada jagabaatege ane gadipoketegi, eotedibige meliodi maniniitibecitiwaji.

**Jesus ja igeke loniciwaga ane beyagi nigina iigo**

<sup>25</sup>Nigijo me gadiigaxinitiniwage, jibake natematiko, anida ane jiciaceeketege. Pida icota noko nige dagadiaa jao ane jiciaceeketege nigina me gadiigaxinitiwaji, pida igenaga mejitece Eiodi. <sup>26</sup>Nigica noko atikanitiwaji Iboonagadi me ipokitalo Eiodi. Pida ejitagawa agalee leeditibige daga jipokotagalocotiwaji miniwataga Eiodi. <sup>27</sup>Igaataga Iniaaginiwaga gademaanitetiwaji. Oada gademaanitetiwaji leegodi mademaani, codaa jagadadiwagati me jicogoticogi miniwataga Aneotedogoji. <sup>28</sup>Jaladi Eiodi, oada ja janagi nigina iigo. Oada natigide jaladi nigina iigo, jopitalo Eiodi”.

<sup>29</sup>Odaa moditalo nigijo anodiotibece, “Nigina natigide ja yelogotece gadotaga, ataleegawii ane iciaceekenitege aneo me daga jowoogotagatece.

<sup>30</sup>Nigina natigide ja jowoogotaga mowoogoti inoatawece, codaa agalee leeditibige digica ane gadigee. Joanigidaa me gadadiwagategegi me icogiticogi miniwataga Aneotedogoji (Leegodi owoogoti codaa me godowooko)”.

<sup>31</sup>Naga ninigodi Jesus, meetediogi, “Jawienataka naga adadiwagatiwaji. <sup>32</sup>Igaataga enagi noko codaa jigicota, odaa akaamitawecetiwaji ilaagitibece, odaa jogopilitaloti waji niginoa gadigelatedi, leegodi madoitiogi lacilodi judeutedi. Odaa jigidaagee nige dagadiaagica mawitibigiji. Pida agoka Eetece, igaataga Eiodi iniwa meetaga. <sup>33</sup>Ejitedagawatiwaji niginoa yotaga, jaotibige mele gadaalegenali leegodi mida anenitigitiwaji. Awikodeeti waji digoina iigo, pida aleeni gadaalegena, igaataga ja jigeke loniciwaga nigina ane beyagi digoina iigo”.

### Jesus yotaganege Eliodi

**17** <sup>1</sup>Naga igotedi Jesus nigijoa lotaga, odaa ja iwitedibigimece ditibigimedi, odaa jegee, “Eiodi. Nagajo lakata me jawikode ja nipegi. Ikeeni me Ee gadionigi, odaa alecatinitibigimece Iboonagadi lodoe inatawece oko, amaleegaga jakadi me jogetetagawa. <sup>2</sup>Leegodi manajicitiwa inimawenegegiteloco inatawece oko me jao midioka limedi me newiga nigijo ananajicitiwa. <sup>3</sup>Nigina oko idiokaanaga limedi me newiga makaamitaga nigina negetigadowoogoti, makamokakaami makaami Aneotedogoji anewi, codaa nigina negetidowoogodi, me Ee, Jesus Cristo anakamaga adimonyaa. <sup>4</sup>Ja gadinelecatagateni lodoe nigina oko digoina iigo, igaataga ja jigodi ibakedi ananajicitiwa me jao. <sup>5</sup>Eiodi, natigide awii me idelogo gadodoe liciagi me idelogo nigijo jotigide maleedigicatibige daga igo nigina iigo.

<sup>6</sup>Ja jikeetiogi anodaageni nigijoa goneleegi wadi ane iomagatiticoace minataga nigina oko digoina iigo, odaa jaganajicitiwa. Ja ganepilidi, odaa jaganajicitiwa. Codaa oyiwagadi gadotaga. <sup>7</sup>Nigina natigide nigijoa goneleegi wadi jogoyowoogodi minoatawece niginoa ananajicitediwa icogotedigi makaamitaga. <sup>8</sup>Igaataga jelogoditiogi gadotaga ananajicitediwa, odaa jogodibatege. Codaa jogoyowoogodi mewi me jicogotibigimece makaamitaga, codaa jegeniwagatakanaga mewi nagakamaga adiigeni.

<sup>9</sup>Jipokoteloco makaamitaga. Pida baadaga jipokoteloco nigina oko anida aneetege nigina iigo, ijoka jipokotelogo nigijo ananajicitediwa, igaataga ganepilidi. <sup>10</sup>Inoatawece niginoa ane inepilidi, ganepilidi. Codaa inoatawece niginoa ane ganepilidi, Ee aagaga inepilidi. Leegodi moniotici, odaa nigina oko jogoilecateetibigimece Iboonagadi. <sup>11</sup>Natigidawaanigi jegejigo makaamitaga. Agaleeginaagejo digoina iigo. Pida nigina anoniotici bagaleeginaagi digoina iigo. Eiodi, ane digica gabatiigi, atikani nimawenegegi Gaboonagadi me otetenitibigi waji nigijoa goneleegi wadi ananajicitediwa, amaleegaga idioka limedi me ilagatiwage, digo anejinaga me godilagatiwage. <sup>12</sup>Nigijo

maleegejote miditaga digoina iigo, jotetetibigiwaji jatika nimawenegegi Gaboonagadi. Nigijoa ghoneleegiwadi ananajicitediwa, ja idoweditologo. Codaa agica ananiaditice, ijokijo nigijo bagakaa aniatagigi, nigijo anakaa dinibikota maniatagigi, eotibige me jinataga nigijo aneeta Aneotedogoji lotaga nigicota.

<sup>13</sup>Pida natigidawaanigi jejejigo makaamitaga. Ejitece niginoa yotaga maleegeetibige nigina iigo, amaleegaga nigina anoniotici eliodi me ninitibigiwaji digo aneji me idinitibeci. <sup>14</sup>Ja jajigotiogi gadotaga. Odaa nigina oko anida aneetege nigina iigo ja nelegetedipi, leegodi nigina anoniotici agaleegica aneetege nigina iigo, digo aneji me digica anejitege nigina iigo. <sup>15</sup>Ajipokotagawa daganogaaticogi nigina iigo, pida jipokotagawa motetenitibigiwaji, adowetiteloco, atamagateenitege nimawenegegi nigijo ane abeyacegegi, diaabo. <sup>16</sup>Agica anoditege nigina iigo, iciagipi me dagaga icata anejitege nigina iigo.

<sup>17</sup>Atikani anewi nigina me iomagatiticoace makamoka ganepilidi. Gadotaga joaniginaa anewi. <sup>18</sup>Anemiitiwa madimonyaatinigi nigina iigo, jigidagaga ejigotiogi me jimonya. <sup>19</sup>Odaa idiniomagaditagadomi leegodi nigina anoniotici. Jao nigida anejitagawa amaleegaga odiniomagaditagadomi makamokakaami me ganepilidi. Atiitiogi gadotaga me iomagatiticoace.

<sup>20</sup>Pida agidioka jipokoteloco, aagaga jipokoteloco nigica eledi anicota metidadiwagadi leegotedi gadotaga. <sup>21</sup>Eledi jipokoteloco amaleegaga idiokaaga limedi me ilagatiwage. Eiodi, jipokotagawa amaleegaga okomokokotege, anejinaga mokomokotiwage, codaa emokeetagagi, codaa amaleegaga eniwagatakanaga nigina oko digoina iigo nagakamaga adimonyaa. <sup>22</sup>Ja jajigo yogeegegitiogi nigina anoniotici, liciagi gadogeegegitiwa, amaleegaga idioka limedi me ilagatiwage, digo anejinaga me godilagatiwage. <sup>23</sup>Idejote miditaga, liciagi makaami meetaga, amaleegaga ewi me ilagatiwage, amanagawini nigina oko digoina iigo eniwagatakanaga nagakamaga adimonyaa, codaa memaani digo anemiitiwa mademaani.

<sup>24</sup>Eiodi. Jemaa nigijo ananajicitiwa odaa anejote jigidiaagaga ite, codaa amaleegaga onadi malecatinitibigimece Iboonagadi, leegodi ademaani maleedigicatibige me oeni nigina iigo. <sup>25</sup>Eiodi ane igenaga. Nigina oko anida aneetege nigina iigo agetigadowoogoti. Pida Ee бага gadowoogoti codaa nigijo ananajicitiwa oyowoogodi nagakamaga adimonyaa. <sup>26</sup>Ja jao metigadowoogoti, codaa egidaa diitigi me gadikeenitiogi, jaotibige me dinemaatiwage digo anemiitiwa mademaani, codaa magaga idejotice miditaga”.

### Ica Jesus nogoniwilo

(Mateus 26.47-56; Marcos 14.43-50; Lucas 22.47-53)

**18** <sup>1</sup>Igaanaga nigotedini Jesus me yotaganege Eliodi, odaa ja noditedice nigotaga ijaagijo anodiotibece igotibeci daato nigijo natoaga anodita “Cedrom”. Ini lapo nialeli enanigijedi, odaa joanigidiaa dakatediwece Jesus ijaagijo anodiotibece. <sup>2</sup>Judas, nigijo ane yajigo Jesus modibatalo nelogododi, eledi yowoogodi anei nigini nialicawaanigi, leegodi elioditibece midiaagitedibige

Jesus ijaagijo anodiotibece. <sup>3</sup>Odaa Judas jigigo nigijo aneite Jesus, yadeegi ijoa iodagawadi romaanotedi ijaagijoa onatecigijoa nowienogododi ligeladi Aneotedogoji, liigexedi fariseutedi ijaagijoa lacilodi sacerdotitedi. Oyadeegi noledagaxiidi inaa lalagonagatedi, codaa me likanaganagatedi.

<sup>4</sup>Jesus akaa yowoogodi inoatawece niginoa analeegicotece modigotalo. Joanigidaa leegodi nigigo dakapetetege, odaa ja nigetediniwace, meetediogi, “Amiijo ica anoleetibigetiwaji?” <sup>5</sup>Nogoninigodi, moditalo, “Joleegatibige Jesus anelatedibige Nazaré”. Odaa jegeetediogi Jesus, “Nigida me Ee, Ee ane Ee!” Judas, nigijo aneyaa Jesus eledi ida me lixigagawepodi. <sup>6</sup>Nigijo negee Jesus, “Nigida me Ee, Ee ane Ee!”, odaa jaganojiceticoace, enitinigi iigo. <sup>7</sup>Odaa ja nigetacediniwace Jesus, meetediogi, “Amiijo ica anoleetibigetiwaji?” Odaa moditacalo, “Joleegatibige Jesus anelatedibige Nazaré”. <sup>8</sup>Odaa jegeetediogi Jesus, “Genegejitagawatiwaji jegemegee. Nige negemaga oleetibigijitiwaji, enice ikaniticoace nigina anoniotibici mopitibece”. <sup>9</sup>Eote nigida ligegi eote micotece nigijo ligegiteta Eliodi, “Eiodi, agica ane aniaditibige otiginitece nigidi ananajicitiwa”.

<sup>10</sup>Simão Pedro idatace lodaajo-ocagataga, naga nixigitice, odaa ja yakagiditice napaagate ijo goneleegiwa ane liboonagadi Malco, ane liotagi lacilo-sacerdotitedi. Nagajo napaagate diigetecogi libaagadi. <sup>11</sup>Odaa Jesus jegeeteta Pedro, “Ixomitiwece gadodaajo lagaagaxi! Aleetibige daaditaga jibatege yawikodigi ane najigotediwa Eiodi?”

### Ica nogoyadeegitedicogi Jesus ligeladi Anás

<sup>12</sup>Odaa nigijoa iodagawadi romaanotedi, ijo lacilo, ijaagijoa nowienogododi Aneotedogoji ligeladi jogodibatalo Jesus, jogoniwilo. <sup>13</sup>Odaa odoejegi oyadeegitedicogi Jesus ligeladi Anás, loxiigadi Caifás, ane lacilo-sacerdotitedi. Joaniginiaa diigenataka nigijo nicaagabi. <sup>14</sup>Caifás, joaniginiaa nigijo ane yajoitiogi nigijoa lacilodi judeutedi me dagaxa mele mokinitece goneleegiwa ane yeleotema noiigi.

### Pedro diwitaka me digicoateda me yowoogodi Jesus

*(Mateus 26.57-58, 69-70; Marcos 14.53-54, 66-80; Lucas 22.54-62)*

<sup>15</sup>Odaa Simão Pedro ijaagijo eledi ane-diotibece Jesus jogoditece lowidi nogoyadeegi Jesus, dinixigagawamigi. Nigijo lixigagawa Simão Pedro lowoogotagi nigijo lacilo-sacerdotitedi. Joanigidaa leegodi me yakadi me diotiwece Jesus naga dakatediwece niogó ligeladi nigijo lacilo-sacerdotitedi. <sup>16</sup>Pida Pedro bigidiaagitice we, ipegitege ijo epoagi nelegi. Odaa nigijo lixigagawa Pedro ane lowoogotagi nigijo lacilo-sacerdotitedi ja noditice, odaa ja yotaganeege nagajo awicije ane yowie nigijo epoagi nelegi. Odaa ja ikatio Pedro me dakatio. <sup>17</sup>Odaa nagajo awicije jegeeta Pedro, “Ica ina daga-aami eledi nigina ane do-ootibece nigidoa aaginaga.” Naga ninigodi, meeta, “Ogoa, agica anejitege!” <sup>18</sup>Nigijoa niotaka ijaagijoa nowienogododi Aneotedogoji ligeladi

owo noledi nelegi aninoa ligoli, leegodi me diwete nigijo enoale. Odaa jigidiaa dabidite me dinitotibigiwaji. Pedro eledi ida mawatiogi aagaga dilowate.

### **Anás nigetedice Jesus**

*(Mateus 26.59-66; Marcos 14.55-64; Lucas 22.66-71)*

<sup>19</sup>Odaa nigijo lacilo-sacerdotitedi ja igetece Jesus nigijo anodiotibece, icaagica ane iigaxitetece, onidaagida me doletibige ane leegodi mowo anodigota. <sup>20</sup>Naga ninigodi Jesus, meeteta, “Idioka limedi me jiiigaxinaga lodoe noiigi-nelegi. Codaa elioditibece me jiiigaxinaga catiwedi niikanagaxiidi, codaa me catiwedi Aneotedogoji ligeladi, aneitibige godoiigi judeutedi me yatecogo. Agica daga idinagaditini me jiiigaxinaga. <sup>21</sup>Natigide, igaamee ina madigee? Anigeetiniwace nigijo anonajipatiwa, igaataga oyowoogodi niginoa ane jiiigaxitece”.

<sup>22</sup>Nigijo negee Jesus nigijo ligeni, odaa ica nowienogodi lapoagi Aneotedogoji ligeladi ja yabaketigi latobi, meetalo, “Ayakadi midegemii magiti nigini lacilo-sacerdotitedi”. <sup>23</sup>Naga ninigodi Jesus, meeteta, “Nige beyagi nigijo igegi, enice anikeenitiwa ica ibatiigi. Pida nigele nigijo igegi, igatime leegodi madabakeni?” <sup>24</sup>Jesus egidaagee moigoetedi, odaa Anás ja diigenatakatalo moyadeegitedicogi minitaga Caifás, nigijo eledi lacilo-sacerdotitedi.

### **Pedro ja diwitakatace me digicoateda me yowoogodi Jesus**

*(Mateus 26.71-75; Marcos 14.69-72; Lucas 22.58-62)*

<sup>25</sup>Egidiaa dabidite Pedro me dilowate, nogoigetace, modita, “Akaami eledi iwitibece idoa goneleegiwa?” Odaa Pedro ja diwitakatace, meetiogi, “Ee ogoal!”

<sup>26</sup>Onijoteci nigijoa niotaka ane litaagi nigijo Pedro ane yakagiditice napaagate, meeta Pedro, “Ica ina daga gadati digoida aneite enanigijedi nialeli.” <sup>27</sup>Odaa Pedro jigijaa naga inaaletace mee me digicoateda me yowoogodi Jesus. Odaa agica daga leegi jaganoe okogokoodi.

### **Pilatos iwi anigotalo Jesus**

*(Mateus 27.1-2, 11-14; Marcos 15.1-5; Lucas 23.1-5)*

<sup>28</sup>Nigidiaagidi jogonotagateedice Jesus ligeladi Caifás, odaa jogoyadeegitedicogi ligeladi-nelegi ninionigi romaanotedi ane liboonagadi Pilatos, jегepaa iige iditawece niigo noiigi judeu. Naga yelogotibige, jogoyooditedicogi Jesus minitaga Pilatos. Odaa agodakatiwece ligeladi Pilatos, leegodi lakatigi judeutedi yoli dogodakatiwece ligeladi eledi oko ane daga judeu. Odoitibige digica lapioyagajegi lodoe Aneotedogoji, igaataga leeditibige me yapiditibigiwaji odaa jogoyakadi moyeligo liweenigi lalokegi Páscoa. Joanigidaa leegodi midiaagiticoace we nigijo diimigi-nelegi, ligeladi Pilatos.

<sup>29</sup>Odaa Pilatos ja noditice ligeladi, jigigo dakapetege, odaa jegeetiogi, “Amiini ica ananatitecetiwaji me libeyacegegi idoa goneleegiwa?” <sup>30</sup>Nogoigidi, modita, “Ajinadeegagatedagawa nigidoa goneleegiwa daaditigicata loenatagi ane beyagi”.

<sup>31</sup>Odaa jegeetiogi Pilatos, “Enice adeegitetiwaji, akamaga awini nigica anemiitalo, iwitece ane ganajoinaganageco”. Odaa nigijoa lacilodi judeutedi modi, “Agica gonagatetigi daga jeloataga oko, akamokakaami mida ganagatetigi”. <sup>32</sup>Joanigidaagee, jegeo micotece nigijo Jesus ligegi, me yalagate anodaagee me yeleo. (Leegodi ijokijo romaanotedi moyakadi moyeloadi oko oyototeloco nicenaganagate.)

<sup>33</sup>Odaa Pilatos ja dakatiwece ligeladi, odaa jegeniditalo Jesus, naga ige, meetalo, “Ewi makaami ninionigi-eliodi judeutedi?” <sup>34</sup>Naga ninigodi Jesus, meeteta, “Ida anadigeetece akamaga gadowoogo? Ogoa, eledi oko yelogoditagawa ane Ee?” <sup>35</sup>Naga ninigodi Pilatos, meetalo, “Nigida me ee, agee judeu! Nigina akamaga gadoiigi inaagina anoiige sacerdotitidi joanegepaa etigadajici meetaga. Enice amiini ica gadoenatagi?”

<sup>36</sup>Naga igidi Jesus, meeteta, “Ininoxigi agica aneetege nigina iigo. Digica aneetege ininoxigi nigina iigo, daganagawini niginoa iotaka odideletomi me dogoika modibatiwa judeutedi. Pida ininoxigi agica aneetege nigina iigo”.

<sup>37</sup>Odaa Pilatos ja igetace Jesus, meetalo, “Enice, ida makaami, akaami inionigi-eliodi?” Naga ninigodi Jesus, meeteta, “Ee inionigi-eliodi, diganaleegalitigi gagegi. Joanigidaa leegodi me janitini, odaa ja janagi digoina iigo mejitece anewi. Nigina oko anida aneetege anewi, joaniginiaa wajipatalo yotaga”. <sup>38</sup>Odaa jegee Pilatos, “Amiijo ica anewi?”

### Agoyemaa moikatedice Jesus

(Mateus 27.15-31; Marcos 15.6-20; Lucas 23.13-25)

Odaa Pilatos ja noditacicogi we me notaganegetaciniwace judeutedi, meetiogi, “Agica jakaditece ane leegodi daga jiigenatakatalo nigidoa goneleegiwa moyeloadi. <sup>39</sup>Pida geme gadakatigitiwaji manipokitiwa me jikatice oniniteci niwilogojegi nigina me nakatio gadalokegitiwaji anodita Páscoa. Emaani me jikatedice idoa ninionigi-eliodi judeutedi?”

<sup>40</sup>Odaa iditawece ja napaawagataceloco modi, “Baadegele daga ikanitedice. Bigida ikanitice Barrabás!” Barrabás one nigina goneleegiwa ane doide, gonematagodi. (Codaa jonigica me idelege ni dagawadi ninionigi-eliodi romaanotedi.)

### Pilatos diigenatakatalo moyeloadi Jesus

**19** <sup>1</sup>Odaa Pilatos ja diigenatakatalo Jesus monalaketedibige. <sup>2</sup>Odaa nigijoa iodagawadi jogoyoetema lale, macataga nagana lale inionigi-eliodi, pida bogodatika lalepigigo moyoe. Odaa jogonixotinece lacilo Jesus, codaa onixomegetedinigi ajo caapa ocagataga nolidigo-lawogo liciagi nagana nicaapa inionigi-eliodi. <sup>3</sup>Odaa moditibigalo me napaawagatelo, “Nigidoa ninionigi-eliodi judeutedi!” Odaa ja diiticogi moyametibigo, onabaketedice.

<sup>4</sup>Odaa ja noditacicogi Pilatos we. Odaa jegeetiogi, “Digawinitiwaji. Inadeegitedicogi digoina wetice, amaleegaga anatitiwaji me digicata



ane jakadi me leegodi daga jiigenatakatalo moyeloadi”. <sup>5</sup>Odaa Jesus ja noditedice we ajaagajo lale lalepigigo anonixotinece lacilo, ajaagajo caapa ane nolidigo-lawogo eledi anonixomegetinigilo. Odaa Pilatos jegeetiogi, “Naganatitwaji! Etidoa nigidoa goneleegiwa!”

<sup>6</sup>Nigijo anoiige sacerdotitedi ijaagijoa nowienogododi Aneotedogoji ligeladi noganaditege Jesus, odaa ja napaawagateloco, modi, “Otonitedeloco nicenaganagate! Otonitedini!” Odaa jegeetiogi Pilatos, “Adeegititwaji, akamaga otonitedeloco nicenaganagate. Igaataga jakadi me digica anigetigida ane leegodi daga jiigenatakatalo moyeloadi”. <sup>7</sup>Odaa nigijoa lacilodi judeutedi jogoninigodi, modita, “Inoa gonajoinaganegeco. Odaa gonajoinaganegegi meetogowa me leeditibige me jeloataga, igaataga mee mone Aneotedogoji Lionigi”.

<sup>8</sup>Igaanaga wajipata Pilatos lotaga lacilodi judeutedi, odaa jegepaanaga doi. <sup>9</sup>Odaa ja dakataciwece ligeladi, igo me igetace Jesus, meetalo, “Igame icogiticogi?” Pida Jesus aigidi. <sup>10</sup>Odaa jegeetalo Pilatos, “Igaamee ina me degemaani madigiti? Agowoogoti mida inagatetigi me gadikanitice, codaa mida inagatetigi me jiigenatakatagawa metigadotoniteloco nicenaganagate?”

<sup>11</sup>Naga ninigodi Jesus, meeteta, “Ida ganagatetigi leegodi Nigijoa ane ideite ditibigimedi me yajigotedagawa ganimawenegegi. Joanigidaa leegodi nigina ane idajigotagawa nelegi libatiigi catedi gabatiigi.”

<sup>12</sup>Naga wajipatalo nigijoa lotaga Jesus, odaa Pilatos ja doletibige nigica nimawenegegitece Jesus me ikatedice. Pida nigijoa lacilodi judeutedi idokee me napaawagateloco, modi, “Nige ikanitedice nigidoa goneleegiwa, amakaami lokaagedi César, anokotawece godiige. Igaataga nigina ane dinanatigi me inionigi-eliodi, lakapetegi César”.

<sup>13</sup>Nigijo Pilatos naga wajipata nigida nigegegi, odaa ja nadeegitedicogi Jesus wetice ligeladi. Odaa Pilatos jigigo nicotini manitaga nibaanco gonege, nigica aneitice nagani baanco liboonagadi “Godipodagaladi wetiga”. (Liboonagaditigi nioladi judeutedi me “Gabatá”.)

<sup>14</sup>Aniaditibige onidateci noko daga nakatio nalokegi Páscoa, nogodinoetege me naloogo. Ja doletibige me seis lakata, negeetiogi Pilatos nigijoa judeutedi, “Digawini! Etidoa ganinionigi-eliodititwaji!” <sup>15</sup>Pida idokee me napaawagateloco, modi, “Eloati! Otonitedeloco nicenaganagate meloati!” Odaa ja nigetiniwace Pilatos, meetiogi, “Ewi memaanititwaji me jiigenatakatalo moyototedeloco nicenaganagate idoa ganinionigi-eliodi?” Pida nigijo anoiige sacerdotitedi modita, “Iniokini César me goninionigi-eliodi. Agica eledi goninionigi”.

<sup>16</sup>Odaa Pilatos ja yajigo Jesus moyototedeloco nicenaganagate, odaa jogoyadeegi nigijoa iodagawadi.

**Jesus nogoyototedeloco nicanaganagate**

*(Mateus 27.32-44; Marcos 15.21-32; Lucas 23.26-43)*

<sup>17</sup>Odaa ja noditedice Jesus, epaa yoyagaditedijo ajo licenaganagate.

Odaa jigigotibeci minitaga lojotagadi ane liboonagadi “Lojotagadi godacilo-libitagi”. (Nioladi judeutedi nigini liboonagadi “Gólgota”).

<sup>18</sup>Joanigidiaa oyelite nogoyototedeloco nicanaganagate ijaagijoa itoataale goneleegiwadi. Odaa odoyate Jesus liwigotigi nigijoa itoa.



*(João 19.17)*

19-20 Odaa Pilatos jegeote lidiko iditeloco taaboa-liwai. Odaa ja diigenataka moyototeloco licenaganagate Jesus ditibigimedawaanigi lacilo. Iditini,

“JESUS ANE ELATEDIBIGE NAZARÉ,  
NINIONIGI-ELIODI JUDEUTEDI.”

Oiditedi nigijoa lidiko me nioladi judeutedi, nioladi greegotedi, ijaa nioladi romaanotedi. Eliodi judeutedi oyalomegeteloco nagajo nidie, leegodi nigijo anoyelite Jesus moyototedeloco nicenaganagate ipegitege nigotaga. 21 Odaa nigijo anoiige sacerdotitedi modita Pilatos, “Jinaga eliiteloco nagada nidie ‘Ninionigi-eliodi judeutedi’. Pida idiiteloco ‘Mee me ninionigi-eliodi judeutedi’”.

22 Naga ninigodi Pilatos, meetiogi, “Ane jiditini, ja diniditini.”

23 Igaanaga oigodi Jesus moyototedeloco nicenaganagate nigijoa iodagawadi, odaa jogodibatalo lowoodi, odaa jogodinilaagagaditigilo onaditecibige nigijoa cwaatolo iodagawadi. Odaa yeyagatice onajoteci nagajo nitoonicogo, anadatawece me lipegetege adinapeegi. 24 Odaa ja dinotaganeege, midiokiditiwage, modi, “Agele daga jaagataga nagada toonicogo. Pida jiwinaaga nigica anepaga dinetetece. Odaa ane dinete ja nebi nagada toonicogo.” Nigida niciagi eo micotece nigijo aneeta Aneotedogoji lotaga, nigijo mee,

“Odinilaagagaditigi yowoodi,  
codaa oiwi anepaga dinetetece,  
odaa ja nebi initoonicogo.”

Odaa nigijoa iodagawadi jigidaagodigotalo nigijoa lowoodi Jesus.

25 Ada mipegitege nagajo licenaganagate Jesus nagajo eliodo, ajo nioxoa, ajaagajo Maria lodawa Clopas, ajaa Maria Madalena eledi ada miditaga. 26 Igaanaga nadi Jesus nagajo eliodo, ijaagijo nigijo ane-diotibece ane dagaxa me yemaa, odaa jegeete nagajo eliodo, “Iniotagodo. Nigidoda goneleegiwa. Ademii micataga daga gadionigi”.

27 Nigidiaagidi Jesus jagaga eete nigijo ane-diotibece, “Nagada iwaalo. Ademii micataga daga gadiodo”. Odaa nigijo ane-diotibece Jesus ja yadeegi nagajo eliodo Jesus me noiigiwa digoida ligeladi ijaagijo nigijo noko.

### Jesus naga yeleo

(Mateus 27.45-56; Marcos 15.33-41; Lucas 23.44-49)

28 Nigidiaagidi Jesus ja yowoogodi naga igodi inoatawece ane leeditibige meote. Odaa jegeo micota nigijo aneeta Aneotedogoji lotaga, nigijo negee Jesus, “Ideloadi ecibi”.

29 Ada ajo lagaagaxi viinyo ane daga dakake loojedi (anepoka lacipagadi niginoda madewetedi). Odaa jogoititini nigijo viinyo nagajo ane liciagi coxao. Odaa jogoigoeteloco nigijo iwogo anoyakagidi libiwe “hissopo”. Odaa jogoyatiwece nioladi Jesus. 30 Igaanaga ici Jesus nigijo viinyo, odaa jegee, “Ja jigodi inoatawece ane leeditibige me jaote.” Naga noletedini, odaa ja yopilagadite liwigo Eliodi.

### Ica iodagawa yapoace liwai Jesus yatitalo apocenigi

<sup>31</sup>Nigijo noko judeutedi jogodinoetege nalokegi, odaa nigijoa lacilodi judeutedi agoyemaa digidiaagite nigijoa goneleegiwadi midoataga licenaganagatedi degepaaeledi noko, leegodi me saabado, noko dagaxa me gonegegi. Joanigidaa leegodi modipokota Pilatos me diigenatakatiogi moninoketedini litili nigijoa goneleegiwadi anoyototologo nicenaganagatedi (owotibige me age me nigo), odaa jogonikatiniwace nicenaganagatedi. <sup>32</sup>Odaa nigijoa iodagawadi jigigotibeci, odaa jogoninoketedini litili nigijo odoejegi goneleegiwa anoyototini. Odaa nigidiaagidi jagaga otota moninoketedini litili nigijoeledi goneleegiwa anabotege Jesus moyototedini. <sup>33</sup>Pida nigidiaagidi nagaga ototalo Jesus, odaa jogonadi mewi naga yeleo. Joanigidaa leegodi me dagadiaagoninoketedini litili. <sup>34</sup>Odaa jigijo iodagawa ane dibata napocenigi, odaa ja yapoace liwai Jesus. Odaa jaganado lawodi, ina ninyogodi. <sup>35</sup>Nigijo ane nadi yalagata nigida niciagi eotibige makaami eleditetiwaji iwagatakani. Yatemati anewi, codaa ijaagijo yowoogodi mewi niginoa latematiko. <sup>36-37</sup>Inoatawece niginoa ane jinataga eotibige me icotece nigijoa aneeta Aneotedogoji lotaga, nigijomee, “Agica otigiditece gabitagi ane dinoke”. Eledi mee Aneotedogoji lotaga, “Oiwitibigimece nigijoa anoyojogotalo apocenigi”.

### Jesus oixotediwece lawimagajegi-wetiga monaligitedini

(*Mateus 27.57-61; Marcos 15.42-47; Lucas 23.50-56*)

<sup>38</sup>Nigidiaagidi José anelatibige nigotaga Arimatéia jigigo yotaganeege Pilatos, dipokota me yadeegi lolaadi Jesus. Joséeledi diotibece Jesus, pida бага dinagaditi me diotibece, igaataga doitiogi nigijoa lacilodi judeutedi. Igaanaga dipokotalo, odaa Pilatos ja ikatece. Odaa José jigigo nikatedini Jesus madataga nicenaganagate. <sup>39</sup>Nicodemus ijo migo lixigagawa José. Nicodemus, nigijo ane igo yotaganeege Jesus nigijoenale naga diiticogi me niigaxitediniwace oko. Nicodemus me lixigagawa José yadeegi triinta ciilo ladokojegi anodita “aloés” awatege ica “mirra”. <sup>40</sup>Odaa José ijaa Nicodemus jogodibata lolaadi Jesus, odaa jогоoilpaditigi nigelateli, oyatitibige nigijo ladokojegi. Owo anepaa lakatigi judeutedi moyoetini nigina némegegi anoixotiwece wetigalawimagajegi. <sup>41</sup>Nigijo anoyelite Jesus moyototedeloco nicenaganagate ipegitege ijoa nawodigijedi niale lawogo aneitice nigijo lawimagajegi-wetiga gela moigodi, analeedigicata émegegi anoixotiwece. <sup>42</sup>Odaa jigidiaa oixotediwece lolaadi Jesus, leegodi nigijo lawimagajegi-wetiga бага ipegitege aneiticoace, codaa eleditace leegodi naga nipegi me nakatio nisaabado judeutedi. (Limedi me nipenaga).

**Agaleegica lolaadi Jesus midataga lawimagajegi-wetiga**  
(*Mateus 28.1-8; Marcos 16.1-8; Lucas 24.1-12*)

**20** <sup>1</sup>Nigijo naga domiingo me nigoitijo, eginaa nexocaga, odaa Maria Madalena jigigo midataga wetiga-lawimagajegi anoyatice lolaadi Jesus. Odaa ja nadi nagajo wetiga nelegi ane nibatoo lawimagajegi-wetiga aneitice lolaadi Jesus naga dawililetice. <sup>2</sup>Odaa ja walokodi migo midataga Simão Pedro, ijaagijo ane-diotibece Jesus lemaanigi. Odaa jegeetiogi, “Jogonogowa Goniwa-aagodi lolaadi, age-eegica midataga wetiga-lawimagajegi, ajowoogotaga nigica anoyaticogi lolaadi.”

<sup>3</sup>Odaa Pedro ijaagijo lokaagedi jagagigotibeci midataga wetiga-lawimagajegi anoyatice lolaadi Jesus. <sup>4</sup>Nigijoo itoa ja waledi, pida nigijoeledi dagaxa me dawé, odaa odoejege me icota anoyatice lolaadi Jesus, ijaa Pedro ja nataligi. <sup>5</sup>Igaanaga dakagitini nigijo anodoejege micotio, iwitiwece nigijo anoyatice lolaadi Jesus, odaa ja nadi nigijoo lipatagaxiidi Jesus, pida adakatio. <sup>6</sup>Nigidiaagidi Simão Pedro jagagicotio, odaa jegepaga dakatio. Odaa ja nadi nigijoo lipegetege anoilipaditigilo Jesus, idiaagitedice nigijo ane iwote. <sup>7</sup>Eledi nadi nagajo leenxo anoilipaditece lacilo Jesus. Nagajo leenxo agawatege nigijoo lipegetege lipatagaxiidi, pida digeticogieledi liwai, dinokomoke. <sup>8</sup>Nigijo lokaagedi Pedro anodoejege mico, jagaga dakatio. Igaanaga nadi, odaa jegetiwagataka mewi naga yewigatace Jesus. <sup>9</sup>Pida egidaagee maleedogoyowoogodi nigijo aneeta Aneotedogoji lotaga, me leeditibige me yewigatace Jesus.

<sup>10</sup>Nigidiaagidi nigijo itoataale anodiotibece Jesus jogopiticogi ligeladi.

**Maria Madalena nadi Jesus**  
(*Mateus 28.9-10; Marcos 16.9-11*)

<sup>11</sup>Maria Madalena idiaa dabidite wetice miditaga anoyatice lolaadi Jesus, anoetibece. Egidaagee manoetibece, naga dakagitini me iwitiwece catiwedi. <sup>12</sup>Odaa ja nadi icoa itoataale aanjotedi yapacaga lowoodi. Idiaa nicotiniwace miditaga anoyatice lolaadi Jesus. Onijoteci nicotini digeticogi lakaagadi nigijo ane iwote Jesus, ijoeledi бага nicote ane dojitedicogi logonaka. <sup>13</sup>Odaa jogoige, modita, “Iniotagodawaana. Igaameni ina me anoenitibece?” Naga ninigodi, meetiogi, “Jinoetibece le-eegodi age-eegica lolaadi Iniwa-aagodi, jogoyadeegi, ajowoogodi nigica anoyaticogi”.

<sup>14</sup>Igaanaga nigotini me dotaga, naga nawiilitetijo, odaa ja nadi Jesus, dabiditedi, pida ayowoogodi nigidaagidoa. <sup>15</sup>Odaa ja ige Jesus, meeteta, “Iniotagodo. Ame leegodi me anoenitibece? Amijoo ica anoleetibige?” Maria diletibige digijigijo nowienogodi niale lawogo. Odaa jegeetalo, “Iniwa-aagodi. Nige naga-aamaga anogowaatice lolaadi Iniwa-aagodi, adiwikodeni anelogotitiwa nigica ana-aanite, odaa jadeegoda.” <sup>16</sup>Odaa jegee Jesus, “Maria!” Naga nilokotijo, odaa ja igidi, yatitalo ioladi hebraico, meetalo, “Raboni!” (Amina anejinaga “Iniigaxinogodi”).

<sup>17</sup>Odaa jegee Jesus, “Jinaga domaga abaatiloco, igaataga anaga jopitibigimece Eiodi. Pida emii opilitio, enitiogi inioxoadipi mejigo miniwataga Eiodi ane Gadiodi, Inoenogodi ane Ganoenogoditetiwaji”.

<sup>18</sup>Odaa Maria Madalena jogopitio, odaa ja yatematitioi nigijo anodiotibece Jesus me nadi Goniotagodi, codaa yatemati ijoatawece nigijoa aneeteta.



(João 20.16-17)

**Jesus jagaga dinikeetediogi nigijo anodiotibece**  
(*Mateus 28.16-20; Marcos 16.14-18; Lucas 24.36-49*)

<sup>19</sup>Ijaagijo nigijo domiingo, naga gocidi, nigijo anodiotibece Jesus idiaagi yatecogo catiwedi diimigi, onibatoo lapoaco, leegodi odoitibige nigijoa lacilodi judeutedi. Pida codaagidoateda Jesus liwigotigi me dilapode, odaa jegeetediogi, “Jemaa mele gadaalegenalitiwaji!” <sup>20</sup>Igaanaga nigotini nigijo ligegi, odaa ja ikeetediogi libaagatedi, liwai ane yapoace apocenigi. Nigijo nogonadi Goniotagodi, odaa eliodi me ninitibigiwaji.

<sup>21</sup>Odaa jegeetacediogi Jesus, “Jemaa mele gadaalegenalitiwaji! Natigide ane igotediwa Eiodi me idimonya, jigidaagejigotagawatiwaji me gadimonyaa mawii ane jemaa.” <sup>22</sup>Igaanaga nigotedini me notaganegetediniwace, odaa ja nawetediniwace, codaa meetediogi, “Abaategetiwaji Aneotedogoji Liwigo. <sup>23</sup>Odaa nigipokitalo Aneotedogoji me napitagadi libeyacegeco eledi oko, odaa Aneotedogoji jagaga napitagadi nigicoa libeyacegeco. Nige degemaani Aneotedogoji me napitagadi oko libeyacegeco, odaa Aneotedogoji anapitagadi nigicoa libeyacegeco.”

**Jesus dinikeeteta Tomé**

<sup>24</sup>Onijoteci nigijo dooze anodiotibece Jesus ane liboonagadi Tomé ane nikoxeedi me “Owaadi”. Tomé agica nigijo noko Jesus nigicotediogi me dilapode nigijo eledi anodiotibece. <sup>25</sup>Odaa nigijo eledi anodiotibece modita Tomé, “Jinataga Goniotagodi”. Pida Tomé dawienataka, meetiogi, “Nige daga jinaditeda adotonadi libecoli liwigotigi libaagadi, codaa nige daga jixotiwece inibedona, codaa nige daga jibatiwece nigijo elaciledi liwai moyojogotalo apocenigi, otegexaagaga ejiwagatakanawaanigi.”

<sup>26</sup>Igaanaga ixomagatedice seete nokododi, odaa nigijo anodiotibece Jesus ja yatecogotace ijaagijo nigijo aneitcoace, pida Tomé jigini mawatiogi. Idoatawece epoaco dinoxoco. Codaagidoataceda Jesus, nagawatediogi, odaa jegeetediogi, “Jemaa mele gadaalegenalitiwaji!” <sup>27</sup>Odaa jegeeteta Tomé, “Dige adeoni ganibedona digoina, codaa digawini ibaagatedi. Abaatiwece eyaciledi digoina iwai. Ikani mawienatakani, bigida iwagatakani”. <sup>28</sup>Naga ninigodi Tomé, meetalo, “Iniotagodi, me Inoenogodi”. <sup>29</sup>Odaa jegeeteta Jesus, “Eka iwagatakani leegodi nagadati. Eliodi linikegi nigina ane idadiwagadi, idaagida me digicata me idadi”.

**Ane leegodi me diniditini nagadi notaganagaxi**

<sup>30</sup>Owidi eletidi godoxicegetedi Jesus aneote lodoe nigijo anodiotibece. Pida agicoa daga diniditologo nagadi notaganagaxi. <sup>31</sup>Pida niginoa notaga diniditedini amaleegaga iwagatakanitiwaji Jesus me nigijaagijoa ane niige Aneotedogoji meote godewiga, codaa me Lionigi Aneotedogoji, codaa amanagawini nige iwagatakanitiwaji, odaa idiokaanaga limedi me gadewikitema leegodi nagatetigi Jesus.



Jesus dinikeetediogi nigijjo anodiotibece digoida nipodigi Galiléia

**21** <sup>1</sup>Nigidiaagidi Jesus ja dinikeetacediogi nigijjo anodiotibece liniogotibece weiigi anodita “Tiberíades” (eledi oyatigi me Galiléia). Digawini anodaagee me dinikeetediogi. <sup>2</sup>Ini Simão Pedro, Tomé ane nikoxeedi me “Owaadi”, Natanael anelatibige nigotaga Caná nipodigi Galiléia, ijoa itoataale lionaga Zebedeu, ijaagijoa eletidi itoataale anodiotibece Jesus. <sup>3</sup>Odaa jegeetiogi Simão Pedro, “Ejigo jomiige”. Odaa nigijjo eledi modita, “Okó, iniga akaami godixigagawa”. Odaa jigigitibeci, jogowaxoditinigi ajo niwatece, odaa ijotawece nigijjo enoale agica libakajetegi otigiditece nogojegi.

<sup>4</sup>Igaanaga yelogotibige, naga nodi aligege, Jesus idiaa dabidite liniogotibece weiigi, miditaga ijo dotiwadi. Pida nigijjo anodiotibece agoyowoogodi nigidaagidoa. <sup>5</sup>Odaa ja dapaawetediogi, mee, “Ionigipi. Agica gabakajetegi nogojegi?” Nagoninigodi, moditalo, “Amitigica ica gobakajetegi”. <sup>6</sup>Odaa jegeetediogi, “Okoleniticogi gadeladitiwaji eledi gwai, ane digeticogi gobaagadi, odaa bagabaatalotiwaji nogojedi”. Odaa jogoyokoletace leladi. Agica daga leegi, agalee domogoyakadi nigijjo leladi moixigitinigi catinedi liwatece, leegodi owidi nogojedi anodibatalo.

<sup>7</sup>Odaa nigijjo ane-diotibece Jesus ane dagaxa me yemaa, joanigijaageeta Pedro, “Nigidoa jigidaa Goniotagodi”. Igaanaga wajipata Simão Pedro modi Goniotagodi, odaa ja dinixotinigi nicaapa, leegodi noga lowoodi me domiige. Naga dinixotinigi lowoodi, odaa ja ipoditinigi ninyogodi, igo midi dotiwadi. <sup>8</sup>Nigijjoa eletidi lokaagetedi бага owaxoditinigi niwatece, onixigitita neladi nolee nogojedi, leegodi aleegita moyototice liniogotibece, onexaa onaniteci taalia meetilo moyetecetice nigijjo dotiwadi ane dabidite Jesus.

<sup>9</sup>Igaanaga digetitacicoace daato, odaa ja waxoditicoace liwatece, odaa jogonadi ini noledi jiginoa ligoli, idiaa nogojedi ditibigimedi, idiaagidi paon. <sup>10</sup>Odaa jegeetediogi Jesus, “Awiite manadeegi nigidiwa nogojedi ane geladi mabaatalotiwaji”.

<sup>11</sup>Odaa Simão Pedro ja waxoditacinigi nagajo niwatece, odaa ja ixigitijo nigijjo neladi, yadeegiticogi lipenagadi. Nolee nigijjo neladi, 153 nogojedi nelecoli. Diganee me nolee nigijjo neladi, pida adawalace. <sup>12</sup>Odaa jegeetediogi Jesus, “Anagitiwaji, aniodi”. Pida agica anabo laalegena daga ige degeetalo, “Amakaami?” Leegodi jogoyowoogodi niginiaaginiwa Goniotagodi. <sup>13</sup>Odaa Jesus jegenagi miditaga, naga dibate ijo paon, odaa ja nediatediniwace. Odaa nigijjoa nogojedi idaagigote.

<sup>14</sup>Jigitoatadigida Jesus me dinikeetediogi anodiotibece nigijjo naga yewigatace.



(João 21.11-12)

### Jesus yotaganege Pedro

<sup>15</sup>Igaanaga niataga me niodaga, odaa Jesus jegeeteta Simão Pedro, “Simão lionigi Jonas, ademaani catedi niginaeledi metidema?” Naga ninigodi meetalo, “Jigidaagee Iniotagodi, gademaani. Codaa owoogoti me gademaani”. Odaa jegeete Jesus, “Enice, owieni iniwaxacoli!” <sup>16</sup>Odaa Jesus ja igetace, meeteta, “Simão, lionigi Jonas, ida makaami ademaani?” Naga ninigodi meetalo, “Iniotagodi owoogoti me gademaani”. Odaa jegeete Jesus, “Enice, adowetitelogo iniwaxacoli!” <sup>17</sup>Odaa jigicota me itoatadigida me ige, meeteta, “Simão, lionigi Jonas, ida makaami ademaani?” Odaa Pedro jagagecagalo leegodi jigitoatadigida Jesus me ige meeteta, “Ida makaami ademaani?” Odaa Pedro jegeetalo, “Owoogoti inoatawece, Iniotagodi. Owoogoti me gademaani”. Odaa Jesus jegeeteta, “Enice, adowetitelogo iniwaxacoli!” <sup>18</sup>Codaa atacolitece nigida anejitagawa. Nigina maleegakaami lioneega, adinoeni, odaa jegemii anemaani me aaticogi. Pida nigakaami oxiiigodi, odaa jigixokenitedice gabaagatedi. Nigenagi eledi, odaa ja igoe gabaagatedi, gadadeegiticogi ane daga domegemaani me aaticogi.” <sup>19</sup>Jesus eote nigida ligegi me ikee anodaagee Pedro lemegegi, me ilecatiditibigimece Liboonagadi Aneotedogoji. Odaa jegeeteta Pedro, “Aniwitici!”

### Jesus yalagate nigijo ane-diotibece ane dagaxa me yemaa

<sup>20</sup>Igaanaga noletijo Pedro, odaa ja naditege nigijo ane-diotibece Jesus ane dagaxa me yemaa, ina me dilokotiogi. Joanigijaa dawaketeloco elipije Jesus, nigijo me niodaga me Páscoa me ige Jesus, meetalo, “Iniotagodi, amijio ica ane gadajicitiogi ganelogododipi?” <sup>21</sup>Igaanaga naditege Pedro nigijo ane-diotibece

Jesus lemaanigi, odaa jegeetalo, “Iniotagodi, igamagagodaageeta lewiga ina goneleegiwa?” <sup>22</sup>Naga ninigodi Jesus, meeteta, “Agica anenitege nige jemaa me yewiga nigepaagicota me idopitijo. Pida akaami leeditibige maniwitici!”

<sup>23</sup>Odaa jigigotice enalaganegegi miditaga nigijo anodiotibece Goniotagodi, modi me daga yeleo nigijo lemaanigi Jesus. Pida anigidaageyatedigi ligegi Jesus, onexaageeteda, “Agica anenitege nige jemaa me yewiga nigepaagicota me idopitijo.” <sup>24</sup>Nigijo ane-diotibece Jesus lemaanigi joanegepaa yelogodi niginoa notaga, codaa jegepaa iditedini, codaa jowoogotaga mewi niginoa aneetalo.

### **Ijoa owidi eletidi Jesus loenataka**

<sup>25</sup>Ijoa owidi eletidi Jesus loenataka. Digidiwatawece diniditedini, ejitibige me daga domagabo nigina iigo nigicoa notaganagaxiidi daga diniditedini ijoatawece loenataka. Odaa jigidaagee. (Amém).